

## Ni been ree xi Apóstoles Jesucrist

<sup>1</sup> Rugajpdiozan lüj dad Teófilo: Loj da gui'ch yalojn rnin graczi ni been Jesús ni balüü tēēman chi guzuloj xchiinman <sup>2</sup> xt chi ziaman xanyabaa. Chi gadaman yaguiaj, gunabeeman bēn naj ree apóstoles, bēn guleman, ni rayal güün reeman, zi'c rēb xSprijt Dios lojman. <sup>3</sup> Chi mal guzagdiaj da'taman loj xgualgütaman, babanman loj ree bengüt. Loj tiuu dxej balüülojman zien volt loj bēn naj ree apóstoles, persi gogbee reeman nabanca-man. Dxej zii ree guneenēman laa reeman xcwent xgualrniabee Dios.

<sup>4</sup> Chi ziz za'nēman laa reeman, guneenēman laa reeman ad yaza reeman Jerusalén, rēbaman:

—Gol gulējz gac cumplid ni na da Dadan zi'c ma rnin lojdi. <sup>5</sup> Walican baroobnijs Waj con nijs, per ma zidyob dxej gui't xSprijt Dios guibannē lējt, laan gac zi'c gualrirobnijs par lējt.

### *Zia Jesús xanyabaa*

<sup>6</sup> Lēn ree dxej zii chi badxaag lasa' reeman con Jesús, gunabdiidx reeman lojman rēb reeman:

—Dad, ¿yanan yayül gualrniabee loj ree bēn Israel ya?

<sup>7</sup> Badxi' Jesúsán rēbaman:

—Ad lējtít rayal gagbee xhie dxejn o xhie horan gac zian. Tijbzi da Dadan ragbee laan din laaman ca' gualrniabee. <sup>8</sup> Per chi ma nabannēdi xSprijt Dios, tia'di gualrniabee. Dxel griidi chiguiedi

diidx loj ree b́en Jerusalén chu najn, nē gra ree guiedx riga' niz Judea nē niz Samaria, xt ree guiedx ren ni riga' ree zija' da't.

<sup>9</sup> Gulox guneeman, ruguiaa reeman laaman dx-ejlczí wajsaman ziaman xanyabaa, abi' biguiajt tijb bēj bata'cwan laaman, dxel ad baguiaatri reeman laaman. <sup>10</sup> La'tgaj ruguiaa reeman ziaman xanyabaa, gulentie tio'p ree b́en najcw lajd naquich lod za' reeman, <sup>11</sup> abi' rēb reeman loj ree apóstoles guin:

—B́en Galilea, ¿chexc zeel sta ruguiaadi xanyabaa? Jesús, b́en baguiaadi zia xanyabaa, laagajcaman yaguaaad stijb, zi'cgajc baguiaadi ziaman.

<sup>12</sup> Chi baza ree xi apóstoles Jesús ruguia' la Olivos, guza reeman zi'ct rza reeman dxej razi-iladx reeman, persi badxin reeman Jerusalén.

<sup>13</sup> Chi badxin reeman, wē'p reeman lēnū ladya lod zojb reeman. Brii laj reeman Béd, Waj, Jacob, Andrejs, Filip, Tumajs, Tol, Matew, Jacob xi'n Alfeo, Simón (b́en guzunē ree b́en cananistas), nē Judas xi'n Jacob. <sup>14</sup> Gra reeman rüjn tijbzi xgab, radxaag lasa' reeman din cwedx guiniab reeman Dios, con ree bijch Jesús con Li xniaaman, con ree b́engunaa ren.

### *Gulej reeman b́en baya'n xluar Judas*

<sup>15</sup> Lēn ree dxej zii bado'p ree b́en rliladx Jesús, naj reeman cost tibgayuu gajl bejn, dxel guzuli Béd galay reeman, rēbaman loj reeman:

<sup>16</sup> —Compniar raliduladx ree Jesucrist, ganin lojdi, gojc cumplid ni bacaa rey Davi loj xtiidx Dios por xSprijtaman xcwent Judas, xin balüü Jesús

loj ree b́en gunaaz laaman, <sup>17</sup> gojquix tijb dux compniaran, n̄e laax been lasa' dxiin raguieenan.

<sup>18</sup> Per con milia ni gudix reeman laax por ni mal beenx, bio' guidxliuj lod gudidya'x, bazuj gui-jquix, goxya'x abi' brii gra xziix. <sup>19</sup> Chi gogbee gra ree b́en Jerusalén ni goc, gunee reeman guidxliuj zii Acédama, r̄en guiēban guidxliuj rejn. <sup>20</sup> Din r̄eb loj libr la Salmos:

Yaya'n d̄ejch lidxix,  
achutziri cwe l̄enan.  
R̄eb t̄ēē lojn:

Yayu ben ren guia'x.

<sup>21</sup> 'Zeel loj gra ree b́en za'n̄e dunuj ree guidib tiamp ni guzun̄e Jesús dunuj ree, <sup>22</sup> diizd chi baroobnijs Waj laaman xt chi ziaman xanyabaa. Loj gra reeman rayal grii tijbaman din ḡūnman dunuj ree yudar yaguie'ch ree loj ree bejn guial walican babanman loj ree benḡüt.

<sup>23</sup> Dxel gulej reeman tio'p reeman: tijb b́en la Xiēb (rn̄iee reeman laaman Barsabás, rn̄iee t̄ēē reeman laaman Justo), gulej t̄ēē reeman b́en la Matías. <sup>24</sup> Dxel gurejdx gunab reeman Dios, r̄eb reeman:

—Dad, l̄uj n̄unbee luxdoo gra ree bejn. Bal̄üü chu loj grop reeman gulejl <sup>25</sup> din gacaman apóstol luar Judas, din baniytix delant lojl por dol ni beenx abi' ziax luar ni rayalix.

<sup>26</sup> Dxel baguiaa reeman chu yayal suert guin, abi' bayal Matías laan. Loj hor zii gajc bayuman loj zachibtib ree apóstoles.

## 2

*Biguiajt xSprijt Dios diizd xanyabaa*

<sup>1</sup> Chi bidxin dxej gojl lanij la Pentecostés, gra ree b́en rliadx Jesucrist bado'p tijbzi luar. <sup>2</sup> Dxejlczi gojc naquie' xanyabaa zi'c bidoxh xt bayu bi lēnū lod riga' reeman, <sup>3</sup> abi' gulentie zi'c bajl dobēz ree, biguiajt reen guijc tijb gaj reeman. <sup>4</sup> Zianz guyu xSprijt Dios luxdoo graczi reeman, dxel guzuloj canee reeman diidx ren ree zi'c cusnee Sprijt guin laa reeman.

<sup>5</sup> Lēn ree dxej zii za' zien ree b́en Israel Jerusalén, baza reeman gra ladczi din cwedx guiniab reeman Dios. <sup>6</sup> Chi biguiejn reeman cayajc naquie', bado'p reeman persi biquiaa reeman. Dxel chi biguiejn reeman rniee gra ree b́en rliadx Jesús xtiidx tijb gaj reeman, ad badxejlt xgab nūjn reeman. <sup>7</sup> Dád badxa loj reeman xt ni'quid badxejlt xhie nūjn reeman, abi' gunabdiidx loj lasa' reeman rēb reeman:

—¿Nid b́en Galilea gra ree b́en canee guin ya?  
<sup>8</sup> ¿Chexc zeel raguiejn ree rniee reeman dux tiidx ree? <sup>9</sup> Du loj ree no'ch ree b́en zēed guiedx riga' ree niz Partia, Media, Elam, Mesopotamia, Judea, Capadocia, Ponto, Asia Menor, <sup>10</sup> b́en zēed tēē ree guiedx riga' ree niz Frigia, Panfilia, Egipto, nē ree guiedx nulen Libia ni riga' ree gajxh Cirene, nē ree b́en zēed Rom, yu' reeman gojl Israel per naban reeman Rom, yu' tēē reeman naj quijb ben Rom per rliadx reeman ni rliadx ree b́en Israel. <sup>11</sup> Nē ree b́en zēed niz Creta nētēē ree b́en zēed guiedx riga' ree niz Arabia no'ch du loj ree. ¡Per dugraczi ree caycaagdiajg con dux tiidx ree niza'cdxoon rūjn Dios!

<sup>12</sup> Graczi reeman badxa da't loj xt ni'quid badxejlt xgab nūjn reeman, abi' guzuloj canabdiidx loj

lasa' reeman rëb reeman:

—¿Xhie rën guiëb gra ni guie?

<sup>13</sup> Per garol reeman baze' laa reeman, rëb reeman:

—Rë' reeman.

*Ni rëb Bëd loj ree bejn*

<sup>14</sup> Dxel guzuli Bëd con zachibtib ree apóstoles guin, guneeman rejs rëbaman:

—Lëjt bën Judea në graczi ree bën zojb Jerusalén, gol bacaagdiajg gol bignia' tëë ni ganin. <sup>15</sup> Ad rë't ree bën guin zi'c naladxidi, din qui gojlri raca gaa rsil. <sup>16</sup> Guie cayajc cumplid ni gunee bën brii laj Joel, bën badëë xtiidx Dios loj ree bejn, chi rëbaman:

<sup>17</sup> Na Dios,

guidxin dxej gaxhal da Sprijtan luxdoo gra ree bejn,

abi' xi'ndi xinguaaw con biingunaa gudëed reex da diidxan,

zien ree ni gulüüloj loj ree xinguiag,

guiáad ree bengol zien ree ni guinie'xhaal reeman.

<sup>18</sup> Dxej zii ree gaxhal da Sprijtan luxdoo ree bën rüjn da dxiinan,

xinguaaw ree në ree béngunaa,

abi' gudëed reeman da diidxan.

<sup>19</sup> Gulün sen ree xanyabaa ni yadxa lojdi,

guiáad loj guidxliuj gulün sen ree

zi'c rejn në bajl nëtëë go'xh.

<sup>20</sup> Guicajy loj gubijdx, guiáad bëëw yayajcan zi'c rejn.

Chi ma gojc zian, dxel guidxin quijb dxej guin,

dxej za'cdxoon gui't Dios bën rniabee,

dxej guiguien guidib xbianiman.

<sup>21</sup> Abi' graczi ree b́en cwedx guiniab laaman güünman laa reeman perdon.

<sup>22</sup> Rēb tēē Bēd loj reeman:

—Yan, gol bacaagdiajg ni ganin lējt b́en Israel: Lējt ragbee guial Jesús b́en Nazaret najman b́en guxhaal Dios, been tēēman milagr ree nē ree ni radxa loj ree bejn zi'c sen din gagbeedi guial Dios guxhaal laaman. <sup>23</sup> Diizd gocli mal nüjn Dios xgab guial zian güünnēdi Jesús, gunaazidi laaman bayüdi laaman loj ree benmal, din gugüjt reeman laaman loj crüjz. <sup>24</sup> Per basban Dios laaman stijb, babēēman laaman loj gualgüjt, din ad gojct nutēē gualgüjt guin laaman. <sup>25</sup> Chi gunee rey Davi xcwent Jesús, rēbaman:

Zianczi baguian dux Dad ree Dios za'nēman naj. Za'man da ladbeen, achetczi zajc guchejb naj.

<sup>26</sup> Zeel yu' luxdon nix, ruzat tēēn Dios zagdxe. majsi guiētan ad rdxebtan,

<sup>27</sup> din ad zusa'ntil naj lēn baa,

ad zatiējbtil xhin xcuerp xi'nl b́en naya nali.

<sup>28</sup> Balüül naj nejz runee gualnaban, chu' tēē luxdon zagdxe guial guibannēl naj.

<sup>29</sup> Basnuu gunee Bēd, rēbaman:

—Ganin loj gradi compniar, diidxliczi dux b́engulal ree Davi güjtaman biguie'ch tēēman, abi' laa xbaaman sta raguiaa ree yan. <sup>30</sup> Per gojcaman b́en badēē xtiidx Dios loj ree bejn, abi' gogbeeman been Dios promejs guial loj xdiaaman grii Cristo b́en nabee. <sup>31</sup> Rulüü ma cuguiaaman gra ni gac, rēbaman guial yaban Cristo loj ree bengüt, ad zaya'ntaman lēn baa ad zaxin tēēt xcuerpaman.

<sup>32</sup> Yan ma basban Dios Jesús, dugran nayajc testiw guial walican babanman. <sup>33</sup> Zia tēeman xanyabaa zisobaman xladbee Dios, persi badēē xSprijt Dios lojman zi'c ma rēbaman, yan ma guxhaal Jesús Sprijt guin loj guidxliuj, por laaman cayajc ni cuguiaadi caguiejn tēedi. <sup>34</sup> Ad Davitan zia xanyabaa, din laagajcaman rēb:

Rēb dux Dad ree Dios loj bēn rniabee naj:

“Gurej da ladbeen,

<sup>35</sup> xt gabecan xin rdxe'ch ree lūj guia'l.”

<sup>36</sup> 'Gradi bēn Israel gol gogbee guial Jesús bēn bacaadi loj crūjz, Dios bacaabee laaman din gacaman Dad, bēn nabee dunuj ree.

*Bachajg zien ree bejn bēn rliladx ree Jesús*

<sup>37</sup> Chi biguiejn ree bēn riga' yagaj ni rēb Bēd, dád guyu naya luxdoo reeman. Abi' gunabdiidx reeman lojman nē loj los demazri ree apóstoles guin, rēb reeman:

—Dad, gol guna, ¿xhie rayal yaguieenan?

<sup>38</sup> Dxel rēb Bēd loj reeman:

—Gol bayagbee xtolidi, gol badxi' tēē lojdi loj Dios, gol gurobnijs por xguialrniabee Jesucrist din gac xtolidi perdon, zian chu' xSprijtaman luxdoodi. <sup>39</sup> Din promejs guin naj par lējt nē par ree xi'ndi nē par gra ree bēn riga' zijt, par gra ree bēn cwe Dios par laaman.

<sup>40</sup> Con ree diidx guie nē mazri ree diidx ren guneenē Bēd laa reeman, rēbaman:

—¡Gol bariica loj ree bēn rūjn ni mal!

<sup>41</sup> Zian gojc, graczi bēn bazoob diidx ni rēbaman gurobnijs. Dxej zii gajc bachajg cost choon mil bejn bēn rliladx ree Jesús. <sup>42</sup> Graczi reeman binal

ni balüü ree xi apóstoles Jesús laa reeman, gubajnnë lasa' reeman zagdxë, gurejdx gunab reeman Dios abi' rado'p reeman persi raw reeman guiadx-til tijbzi zi'c gunabee Jesucrist güün reeman.

### *Ze gubajn ree bén bililadx Jesús yaloj*

<sup>43</sup> Graczi ree bejn radxa da't loj milagr në los demazri ree ni been ree apóstoles guin. <sup>44</sup> Graczi ree bén bililadx Jesucrist gubajnnë lasa' zagdxë, rgui's tëë ni rajp reeman loj lasa' reeman. <sup>45</sup> Ruto' xguidxliuj reeman në gra ni rajp reeman, persi rgui's reeman milia guin loj lasa' reeman zi'ctzi naj ni riaadx tijb gaj reeman. <sup>46</sup> Guixie guixie rado'p reeman lën yadooro' Jerusalén, dxel raguiaj reeman lidx xcompniar reeman rtaw reeman, dád nix yu' luxdoo reeman rën tëë lasa' reeman, <sup>47</sup> ruza't reeman Dios zagdxë, guiáad gra bejn guyën laa reeman. Guixie guixie ragnë Dios din gacxhiey mazri bén rliladx Jesucrist, persi gojc xtol reeman perdon.

## 3

### *Bayajc tijb bén ad rajct rza*

<sup>1</sup> Tijb dxej zë ree Béd con Waj lën yadooro' Jerusalén raca choon wadxë, hor zii naj hor ni rbejdx rniab reeman Dios. <sup>2</sup> Ro' xport yadoo guin zojb tijb bén ad rajct rza diizd gojlaman. Zianczi rbe'c reeman laaman ro' port guin, ni la Port Za'cdxoon, din guiniabaman carda loj ree bén ru lën yadoo guin. <sup>3</sup> Chi baguiaaman Béd con Waj ma chu' reeman lën yadoo guin, gunabaman carda loj reeman. <sup>4</sup> Baguiaa reeman lojman, dxel rëb Béd lojman:



—Baguiaa du lojn.

<sup>5</sup> Chi biguiejnman rëb Bëd zian, dxel baguiaaman loj reeman, naladxaman milia nudëed reeman lojman. <sup>6</sup> Per rëb Bëd:

—Ad ra'ptan plajt ni'qui or par gunen lojl, per ni zajc günan por lüj günanan: Por xguialrniabee Jesucrist bën Nazaret, guzuli, guza.

<sup>7</sup> Dxel gunaazaman yaaman ladbee, bazuliman laaman. Loj hor zii gajc guyu ree guia'man gojl, <sup>8</sup> abi' gutiajsaman, guzuliman guzuloj cazaman. Dxel guyunëman laa reeman lën yadoo guin, cazaman, catiajsaman cuza't tëëman Dios zagdxe. <sup>9</sup> Graczi ree bën cuguiaa laaman cazaman cuza't tëëman Dios zagdxe, <sup>10</sup> dád badxa loj reeman bidxeb tëë reeman guial gojc zian guial nünbee reeman bën guin, ragbee tëë reeman laaman rbej ro' xport yadoo guin ni la Port Za'cdxoon, rniabaman carda.

### *Gunee Bëd loj ree bejn lod la xcurdur Salomón*

<sup>11</sup> Ad riro'nladxt bën bayajc guin Bëd con Waj. Dád badxa loj ree bejn, abi' baxüün reeman wej reeman lod la xcurdur Salomón lod za' ree Bëd con Waj. <sup>12</sup> Chi baguiaa Bëd zian, rëbaman loj reeman:

—Bën Israel, ¿chexc zeel radxa lojdi ni goc? Ad naladxidi por dunujn rza bën guie guial naca'n guialrniabee o guial nayajcan naya delant loj Dios ya. <sup>13</sup> XDios dux bëngulal ree Abraham, Isaac në Jacob, laaman badëë guialrniabee loj Jesús, bën bayüdi loj guxtis. Abi' chi guyën Pilato nuslaaman laaman, ad cwëjbtidi. <sup>14</sup> Luar niniabidi nuslaa Pilato bën naya nali, bën rüjn zi'c rayal, gunabidi baslaaman tijb xin bagüjt bejn. <sup>15</sup> Zian bagüjtidi

bén runee guialnaban. Per basban Dios laaman stijb, abi' dunujn nayajc testiw guial babanman. <sup>16</sup> Bén guie, bén ruguiaadi nünbee tēedi, guyu gojl guia'man por xguialrniabee Jesucrist, bayajcaman guial baliduladxan, zi'c ruguiaa graczi.

<sup>17</sup> 'Ganin lējt compniar, ragbeen guial lējt con ree bén rniabee lējt ni'quid gogbeetidi xhienin beendi chi bagūjtidi Jesús. <sup>18</sup> Per zian been Dios persi gojc cumplid ni rēbaman loj ree bén badēē xtiidxaman loj ree bejn diizd gocli guial sagdiaj Cristo. <sup>19</sup> Zeel gol bayagbee xtolidi gol badxi' tēē lojdi loj Dios din gūnman xtolidi perdon. Dxel yayaalyuj luxdoodi, <sup>20</sup> guixhiaal tēēman Jesús stijb, bén naj Cristo diizd gocli par lējt, <sup>21</sup> majsi yan rayalri suman xanyabaa, xt ma bazuxnejz Dios gra, zi'c rēbaman loj ree bén badēē xtiidxaman loj ree bejn diizd gocli, bén gubajn ree naya delant lojman. <sup>22</sup> Abi' rēb Moisejs loj ree dux bēngulal ree: “Loj xdiaadi cwēē Dios tijb bén gudēē xtiidxaman loj ree bejn zi'c naj, gol bazoob xtiidxaman graczi ni naman lojdi, <sup>23</sup> din graczi ree bén ad zuzoobt xtiidxaman nit reeman, ad zajc tēētri reeman cwent zi'c xbejn Dios.”

<sup>24</sup> 'Gra ree bén badēēd xtiidx Dios loj ree bejn, diizd Samuel con los demazri ree bén badēē xtiidx Dios diizd gulal, mal bagojn reeman ni cayajc ree lēn ree dxej guie. <sup>25</sup> Lējt naj xdiaa reeman, lojdi gac cumplid ni cwēb Dios loj ree dux bēngulal ree chi rēbaman loj Abraham: “Por xdiaal gūnle'n gra ree bēnguidxliuj.” <sup>26</sup> Abi' chi basban Dios xi'nman Jesucrist, yaloj lojdi guxhaalaman laaman din gūnle'man lējt din yabēēcaman gradi loj ni mal rūjndi.

## 4

*Bazuj reeman Béd con Waj loj ree guxtis*

<sup>1</sup> Sta canee ree Béd con Waj loj ree bejn, chi bidxin ree xbixhioz ree bén Israel në suldad rniabee suldad rniaj ree ro' yadooro' Jerusalén, nētēē ree bénsaducew. <sup>2</sup> Dád ralen reeman guial culüü ree Béd con Waj bejn ree, rēb reeman guial yaban ree bejn loj ree bengüt, din laan ma baguiaa reeman chi baban Jesucrist. <sup>3</sup> Zeel gunaaz reeman laa reeman, per guial ma gudxe, zeel badxe' reeman laa reeman ladxguib la'tgaj rareguiaa. <sup>4</sup> Per dád zien ree bén bacaagdiajg ni rēb ree Béd con Waj bililadx xtiidx Dios, gojc reeman cost gaay mil xinguaaw xcwentqui ree bēngunaa.

<sup>5</sup> Chi bareguiaa, guxtis Jerusalén në ree bengol në ree mextr rulüü ley, bado'p reeman loj ciuda guin. <sup>6</sup> Në Anás bidxin yagaj, bén naj bixhioz mazri zobjbloj rniabee graczi ree bixhioz, bidxin tēē bixhioz la Caifás në Waj në Lejandr, nētēē gra ree bén naj lasa' ree bixhioz rniabee guin. <sup>7</sup> Gunabee reeman bica' reeman Béd con Waj, abi' bazuj reeman laa reeman galay lod riga' reeman, dxel gunabdiidx reeman loj reeman, rēb reeman:

—¿Chu banee diidxbee o chu por rüjndi ni guin?

<sup>8</sup> Per guial yu' xSprijt Dios luxdoo Béd dád gognēman laaman, zeel rēbaman:

—Gol bacaagdiajg ni ganin lējt bengol në lējt guxtis, <sup>9</sup> rniabdiidxidi dunujn xhienaag baguieenan bēngogxuu guin yudar, xhie tēē naag gojc zeel bayajcaman. <sup>10</sup> Yanan lojdi din gagbeedi gagbee tēē gra bén Israel xhienaag bayajc bén za' lojdi. Bayajcaman por xguialrniabee Jesucrist

bén Nazaret, bén bacaadi loj crüzj abi' basban Dios laaman stijb. <sup>11</sup> Beennëdi laaman zi'c rüjn ree bén rüjn yu chi rbëëgo'n reeman tijb guiaj, dxel qui ragbeeri reeman guial guiaj guin naj ni mazri lasajc par gacnë yu guin. <sup>12</sup> Achut ben ren rüjn dux tol ree perdon, tijbzi Jesús, din achut mazri guxhaal Dios loj guidxliuj din güünman dunuj ree perdon.

<sup>13</sup> Chi baguiaa ree guxtis guin ad rdxebt ree Bëd con Waj guial rniee reeman, abi' gogbee reeman ad bén basiidt ree mazran achu tëët naj reeman, badxa loj reeman bayünbee tëë reeman laa reeman guial bén binal ree Jesús. <sup>14</sup> Abi' yagaj gajc za' bén bayajc guin, zeel ad bile'tri xhie niëjb reeman contr laa reeman. <sup>15</sup> Dxel gunabee ree guxtis guin barii ree Bëd con Waj din yaya'n laaz reeman din gü reeman diidx. <sup>16</sup> Rëb reeman:

—¿Xhienaag yaguieennë' ree xin guin ree? Graczi ree bén Jerusalén ma ragbee milagr been reex. Abi' ad zajct yarexuu ree. <sup>17</sup> Per chitëë guire'ch xtiidx Jesús, yachejb reex din diizd yan achutziri loj guza't reex laax.

<sup>18</sup> Dxel gurejdx reeman laa reeman gunabee reeman chitëë churi loj guza't reeman Jesús, ad gulüü tëëri reeman xtiidxaman. <sup>19</sup> Per badxi' Bëd con Waj laan, rëb reeman:

—Lëjt gajc gol been xgab: ¿Zagdxë naj yazooban xtiidxidi luar yazooban xtiidx Dios ya? <sup>20</sup> Per ad zajct yacwëëz yaguie'chan gra ni baguiaan baguiejn tëën.

<sup>21</sup> Dxel bachejb ree guxtis guin laa reeman stijb, dxelri baslaa reeman laa reeman zia reeman guial

ad badxejlt xhienaag nudëed reeman laa reeman casti, din graczi ree bejn ruza't Dios zagdxe por ni goc. <sup>22</sup> Nadëd tiuu ijz yu' bën bayajc guin.

*Rbejdx ree bën rliladx Jesús Dios*

<sup>23</sup> Chi baslaa ree guxtis guin Bëd con Waj, baguiaj reeman lod riga' xcompniar reeman bën rliladx ree Jesucrist, abi' be reeman diidx ni rëb ree bixhioz rniabee ree bixhioz në ree bengol rniabee. <sup>24</sup> Chi gulox bacaagdiajg reeman diidx ni be reeman, graczi reeman guzuloj cabejdx canab Dios, rëb reeman:

—Dad lüj rniabee gra, lüj naj bën been xanyabaa në guidxliuj nëtëë nijsdoo con gra ni yu' loj reen.

<sup>25</sup> Por xSprijt tël gunee rey Davi diidx guie ree, chi rëbaman:

¿Chexc zeel ridxe'chnë ree bénguidxliuj Dios?

¿Chexc zeel rüjn reeman xgab ni ad rüjnt wen?

<sup>26</sup> Bado'p ree rey në gra ree guxtis

din su reeman contr dux Dad ree Dios në contr Cristo.

<sup>27</sup> 'Abi' zian ma gojc, Herodes con Poncio Pilato con ree bën Israel nëtëë ree bën ad najt bën Israel, badxajg lasa' reeman luguiedx guie persi guzuj reeman contr xi'n'l Jesús, bën naya nali, bën ba-caabeel. <sup>28</sup> Zian gojc, been reeman zi'c ma beenl xgab diidx gocli. <sup>29</sup> Abi' yan Dad, baguiaa yan ruchejb reeman dunujn. Gognë dunujn nayajcan xbejnl din gac yatie'chan xtiidxil sin guialrdxeb, <sup>30</sup> në con xguialrniabeel yasiajcan bënragxuu ree, yaguieen tën milagr ree por xguialrniabee xi'n'l Jesús, bën naya nali.

<sup>31</sup> Chi gulox gurejdx gunab reeman Dios, guzuloj canij luar lod riga' reeman, dxel guyu xSprijt

Dios luxdoo gra reeman, abi' guzuloj catie'ch reeman xtiidx Dios sin guialrdxeb.

### *Ragnë lasa' ree bén rliladx Jesús*

<sup>32</sup> Graczi ree bén rliladx Jesucrist bidxajg gubajn reeman, rüjn reeman tijbzi xgab, ni'qui tijb reeman ad rëbt guial xieenzi reeman naj ni rajp reeman, din najn par gra reeman. <sup>33</sup> Gognë Dios apóstoles guin ree persi basnuu be reeman diidxli guial baban Dad Jesús loj ree bengüt. Dád beenle' Dios laa reeman. <sup>34</sup> Ni'czi tijb reeman ad biaadxt xhienin, din graczi ree bén rajp guidxliuj o bén rajp yu ya ruto' reeman laan, abi' milia guin <sup>35</sup> rayü reeman loj ree apóstoles guin, persi laa reeman rgui's laan loj gra reeman zi'ctzi naj ni riaadx tijb gaj reeman. <sup>36</sup> Loj reeman no'ch tijb bén brii laj Xiëb, najman xdiaa bén brii laj Leví, zëedaman yuj la Chipre ni riga' loj nijsdoo. Gunee ree apóstoles guin laaman Bernabé, rën guiëban Bén ragu' luxdoo ree bejn zagdxe. <sup>37</sup> Gojpaman tijb guidxliuj, abi' bato'man laan persi badëëman milia guin loj ree apóstoles guin din qui's reeman laan.

## 5

### *Dol ni been ree Ananías con Safira*

<sup>1</sup> Per guyu stijb bén brii laj Ananías, xbéngunaaman brii laj Safira. Bato' tijb xguidxliuj reeman, <sup>2</sup> per baya'nnë xbéngunaaman diidx persi baya'nnëman ta'n milia guin. Sta'nän badëëman loj ree apóstoles guin, rëbaman laan naj gran. <sup>3</sup> Abi' rëb Bëd lojman:

—Ananías, ¿chexc zeel cwëjbil gunabee xindxab lüj? ¿Chexc zeel guyënl nusquieel loj xSprijt Dios, din naya'nnël ta'n milia ni bato' xguidxliujl? <sup>4</sup> ¿Wen nid xguidxliujl gojcan ya? Abi' chi bato'lan, ¿nid xmilialan ya? ¿Chexc zeel balabladxil beenl zian? Loj Diosan nuyënl nusquieel, ad lojt bejnan.

<sup>5</sup> Chi biguiejn Ananías ni rëbaman, biajbaman abi' güjtaman. Graczi ree bën gogbee ni guzacaman dád bidxeb reeman. <sup>6</sup> Dxel bibig bëlzi ree xinguiag, batüüb reex laaman lajd persi biquie'ch reex laaman.

<sup>7</sup> Chi gudëd cost choon hor, dxel bidxin xbégunaa Ananías, ad ragbeetaman ni goc. <sup>8</sup> Dxel gunabdiidx Bëd lojman rëbaman:

—Guna, ¿bato' xguidxliujdi zi'c na lacheelil ya?

Abi' rëbaman:

—An, zianqui bato'nan.

<sup>9</sup> Dxel rëb Bëd lojman:

—¿Chexc zeel baya'ndi diidx persi nuyëndi nusquieedi xSprijt Dios? Laa ree xin biquie'ch lacheelil ziaad ni, yan nëgajc lüj chiquie'ch reex.

<sup>10</sup> Loj hor zii gajc biajb Safira lod za' Bëd, abi' güjtaman. Chi bayu ree xin guin baguiaa reex ma güjtaman, dxel bales reex laaman biquie'ch reex laaman cwë' lacheelaman. <sup>11</sup> Graczi ree bën rliladx Jesucrist në gra ree bën gogbee ni goc, dád bidxeb reeman.

### *Zien ree milagr been ree apóstoles*

<sup>12</sup> Zien ree milagr narooob been ree apóstoles guin loj ree bejn. Graczi ree bën rliladx Jesucrist radxajg lasa' ro' curdur lod rníee reeman xcurdur Salomón. <sup>13</sup> Zagdxe ruza't ree bën luguiedx guin laa reeman, per ad rayaxt reeman guchajg

reeman laa reeman. <sup>14</sup> Abi' guixie guixie caya-jcxhiey ree b́en rlladx Dad Jesús, zi'c xinguaaaw zi'c béngunaa. <sup>15</sup> Xt rbëe reeman b́enragxuu ree lunejz, rguijxh reeman laa reeman loj ree loon nē loj ree da, din chi tēd Bēd, majsi xbalazaman tēd guijc reeman. <sup>16</sup> Nē ree b́en zojb guiedx riga' ree gajxh Jerusalén, zien reeman bidxin Jerusalén, bidxinnē reeman b́enragxuu ree nē ree b́en yu' xindxab luxdoo, abi' graczi reeman bayajc.

### *Gunaaz ree guxtis Bēd con Waj*

<sup>17</sup> Bixhioz mazri zojbloj rniabee graczi ree bixhioz nē ree bénsaducew za'nē laaman, guyu guialnadēdloj luxdoo reeman, <sup>18</sup> abi' gunabee reeman biniaaz ree apóstoles guin persi badxe' reeman laa reeman ladxguiib. <sup>19</sup> Per guxhin zii tijb xi anjl Dios guxhal ro' ree xport ladxguiib guin, abi' babēēman laa reeman, rēbaman:

<sup>20</sup> —Gol chej lēn yadooro', gol biguiedx loj ree bejn xhie naag gap reeman guialnaban tiblyaa con Dios.

<sup>21</sup> Chi bigueijn reeman ni rēb anjl guin, bareguiaal rsildoo wej reeman lēn yadoo guin, guzuloj culüü reeman bejn ree xtiidx Dios.

Guiáad bixhioz zojbloj guin con ree b́en za'nē laaman, bato'p reeman guxtis con gra ree bengol Israel. Abi' gunabee reeman suldad ree din chica' reex apóstoles guin ree lēn ladxguiib guin. <sup>22</sup> Per chi bidxin reex ro' ladxguiib guin, achutri ree apóstoles guin ree yu'. Dxel bicojn reex guxtis guin ree, <sup>23</sup> rēb reex:



—Chi badxinan, baguiaan nayaaw ro' ladxguiib guin zagdxe, laa ree suldad rajp ro' ladxguiib guin za', per chi baxhalan, achutczi yu' lënan.

<sup>24</sup> Dxel bixhioz zobjloj guin con suldad rniabee ree suldad rniaj ro' yadoo guin, con ree bixhioz rniabee ree bixhioz, chi biguiejn reeman zian, guzuloj rëb loj lasa' reeman, ¿ban xt guin chigdi-blagaa ree ni guie?

<sup>25</sup> Loj hor zii gajc bidxin tijb xin rëb loj reeman:

—Laa ree bën badxe'di ladxguiib yu' lën yadoo culüü reeman bejn ree.

<sup>26</sup> Dxel wej suldad rniabee guin con ree xsuldadix bica' reex apóstoles guin ree, per ad been-naat reex laa reeman guial rdxeb reex gucaaguiaj ree bejn laa reex. <sup>27</sup> Chi badxinnë reex laa reeman, bayü reex laa reeman loj guxtis. Dxel rëb bixhioz zobjloj guin loj reeman:

<sup>28</sup> —¿Nid ranan ya guial ad zajctri gulüüdi bejn ree xtiidx Jesús? Abi' yan graczi loj ree bën Jerusalén ma gutie'chidi xtiidxix, nëtëë yan rëndi gudxiibidi du guijcan guial dunujn bagüjt laax.

<sup>29</sup> Abi' badxi' Bëdan në gra ree apóstoles guin, rëb reeman:

—Rayal yazooban xtiidx Dios luar yazooban xtiidx ree bénguidxliuj. <sup>30</sup> XDios dux béngulal ree basban Jesús, bën bacaadi loj crüjz. <sup>31</sup> Abi' nüjn Dios laaman bën zobjloj, nabe'caman laaman xladbeeman, laaman naj bën rniabee rabëë tëëman bejn ree loj xtol reeman, abi' zian guxhalaman nejz par ree bën Israel din cwëëladx xtol reeman yadxi' tëë loj reeman loj Dios din güünman laa reeman perdon. <sup>32</sup> Dunujn në xSprijt Dios bën rudëëman

loj ree b́en ruzoob xtiidxaman, rayagbeen guial gra ree ni guin naj diidxli.

<sup>33</sup> Chi biguiejn ree guxtis guin ni ŕeb reeman, d́ad balen reeman abi' guýen reeman nugújt reeman laa reeman. <sup>34</sup> Per loj ree guxtis guin no'ch tijb b́enfarisew laman Gamaliel, najman mextr rulúu ley abi' graczi ree bejn rajp laaman respejt. Guzuliman abi' gunabeeman barii ree apóstoles guin xchu tibrajt. <sup>35</sup> Dxel ŕebaman loj ree guxtis guin:

—B́en Israel, gol been xgab xhienin güünnédi b́en guin ree. <sup>36</sup> Gol basaaladx, guyu tijb xin brii laj Teudas, ŕebix yu' chu najx abi' cost tajp gayuu ree bejn binal laax. Per chi bagújt ree bejn laax, bire'ch gra ree b́en binal laax, yagaj gulox gra ni beenx. <sup>37</sup> Abi' t́ee ĺen ree dxej gunabee gobiarn biab ree bejn, guyu tijb xin brii laj Judas, gojqnix xin Galilea, ziangajc d́ad zien ree bejn binal laax. Per chi bagújt ree bejn laax, gra ree b́en binal laax bire'ch. <sup>38</sup> Zeel rnin lojdi, ad bal chu'ridi con ree b́en guin, gol baslaa reeman. Din bal b́enguidxliuj rniabee ni rújn reeman, zadxin dxej loxan. <sup>39</sup> Per bal por Dios cayújn reeman ni guin ree, ad zajct gutéedi loj ni cayújn reeman. Gol gojp cudad ad niad chi gagbeedi contr Diosan za'di.

<sup>40</sup> Beencwent ree guxtis guin xtiidx Gamaliel, dxel gurejdx reeman apóstoles guin ree, gudijn reeman laa reeman abi' ŕeb reeman loj reeman ad guitie'chri reeman xtiidx Jesús, dxel baslaa reeman laa reeman zia reeman. <sup>41</sup> Per laa reeman d́ad nix yu' luxdoo reeman barii reeman lod za' ree guxtis guin guial baslaa Dios guzagdiaj reeman por Jesús. <sup>42</sup> Abi' ad rucwézt rulúu reeman

rníee tēē reeman xtiidx Jesús, gra dxejczy rulüü reeman lēn yadooro' Jerusalén nētēē lidx lidx ree bejn.

## 6

### *Bíbee gajdx ree bēn güün yudar*

<sup>1</sup> Lēn ree dxej zii chi canuu cayajcxhiey ree bēn rliladx Jesús, guzuloy cabe'c ree bēn rníee diidx grieg xgualquia ree bēn rníee diidx hebreo, rēb reeman guial gra dxejczy chi riē's ni raw ree bēngunaa bizējb, ta'ndoon rtia' ree bēn rníee diidx grieg guial loy ree bēn rníee diidx hebreo.

<sup>2</sup> Dxel guidxibtio'p ree apóstoles guin bato'p reeman graczi ree bēn rliladx Jesucrist, abi' rēb reeman:

—Ad zagdxet naj guial yacwēēz yalüün xtiidx Dios par yadi'san ni gaw ree bejn. <sup>3</sup> Zeel yanan lējt compniar raliduladx ree Jesucrist, gol gudiil entr lojdi gajdx ree bēn ragbeedi naban zi'c rayal, bēn yu' xSprijt Dios luxdoo, bēn yu' tēē ree xquiarguiejn, din yazuj reeman güün reeman dxiin guin. <sup>4</sup> Guiáad dunujn yasnuu yarejdx yanaaban Dios, yalüü tēēn xtiidxaman.

<sup>5</sup> Graczi reeman cwējb ni rēb reeman, abi' gulej reeman bēn la Esteban, laaman rliladx Jesucrist guidib luxdooman, rniabee tēē xSprijt Dios luxdooman guidiblagaa. Gulej tēē reeman Felip, Prócoro, Nicanor, Timón, Parmenas nē Nicolás bēn zēēd Antioquía, nēman bililadx ni rliladx ree bēn Israel chi gadaman chililadx Jesucrist. <sup>6</sup> Dxel binē reeman laa reeman loy ree apóstoles guin, persi gurejdx gunab reeman Dios por laa reeman badxiib tēē yaa reeman guijc reeman.

<sup>7</sup> Canuu care'ch xtiidx Dios, abi' Jerusalén caya-jcxhiey ree bèn rliadx Jesucrist, nè zien ree bixhioz Israel bililadx laaman.

### *Biniaaz Esteban*

<sup>8</sup> Dád gognè Dios Esteban badëë tëëman guialrniabee persi rüjnman zien loj milagr delant loj ree bejn. <sup>9</sup> Abi' bëlzi ree bèn yadoo ni la Libertados nè ree bèn Cirene con ree bèn Alejandría con ree bèn niz Cilicia nètëë ree bèn zëed niz Asia, guzuloj cadildiidxnë reeman Esteban, <sup>10</sup> per ad gojct nadxi' reeman xtiidxaman guial cayagnë xSprijt Dios laaman. <sup>11</sup> Dxel gudijx reeman bëlzi ree bejn din guiëb reeman, bacaagdiajg reeman rniee Esteban contr Dios nè contr Moisejs. <sup>12</sup> Zian been reeman persi bidxe'ch ree bèn luguiedx guin, nè ree bengol nè ree mextr rulüü ley. Dxel gunaaz reeman Esteban, binë reeman laaman loj guxtis. <sup>13</sup> Gudiil tëë reeman bèn basquiee ree persi rëb reeman loj ree guxtis guin:

—Ad rucwëëzt rnieeguijdx xin guie xley Moisejs nè xyadoo Dios. <sup>14</sup> Dunujn ma bacaagdiajg rëbix guial Jesús xin Nazaret guse'nx dux yadooro' ree, guchaa tëëx costumbr basa'n Moisejs du loj ree.

<sup>15</sup> Abi' guxtis guin ree nè gra ree bèn riga' yagaj, chi baguiaa reeman loj Esteban, baguiaa reeman najn zi'c tijb loj anjl.

## 7

### *Ni rëb Esteban loj ree guxtis*

<sup>1</sup> Dxel bixhioz mazri zojbloj rniabee graczi ree bixhioz, gunabdiidxaman loj Esteban, rëbaman:

—¿Walin ya rëbil zian?

<sup>2</sup> Badxi' Esteban laan, rëbaman:

—Dad guxtis, në lëjt compniar, gol bacaagdi-ajg ni ganin. Dios bën yu' xanyabaa balüüloj loj dux béngulal ree Abraham, chi gureman niz Mesopotamia chi gadaman chisob guiedx Harán.

<sup>3</sup> Abi' rëb Dios lojman: “Basa'n ladxil në gra ree lasa'l, wej loj yuj ni gulün lüj.” <sup>4</sup> Dxel brii Abraham ladx ree bën Caldea bisobaman Harán. Chi güt xDadaman, dxel bidnë Dios Abraham loj guidxliuj guie lod nadxu' ree yan. <sup>5</sup> Per chi bi't Abraham guie, achetczi guidxliuj badëed Dios lojman, ni'czi tibda'n nan ad badëetaman. Per beenman promejs loj Abraham guial gudëëman guidxliuj guie lojman, dxel chi guiëtaman tia' ree xdiaaman laan, majsi chi rëb Dios zian, ad wayut xi'n Abraham.

<sup>6</sup> Rëb tëë Dios lojman guial xdiaaman chisob zi'c ree benzit nacion ren, lod gugüjn da't reeman laa reeman dxiin gusagzi tëë reeman laa reeman loj tajp gayuu ijz. <sup>7</sup> Per rëb tëë Dios lojman: “Gudëdan gra ree bën gusagzi laa reeman casti, gac xchej yarii reeman yagaj abi' guie güün reeman sirv lon zi'c rayal.” <sup>8</sup> Chi guneenë Dios Abraham, baya'n reeman diidx guial rayal chu' gra ree xinguaaaw sen. Zeel chi gol Isaac xi'n Abraham, gojc xhujn dxej, dxel badxe'man laax sen. Ziangajc beennë Isaac xi'nman Jacob, ziangajc beennë Jacob guidx-iptio'p ree xi'nman, bën goc ree dux béngulal ree.

<sup>9</sup> Bën goc ree dux béngulal ree gudëdloj reeman Xiëb bën naj bijch reeman, abi' bato' reeman laaman loj ree bën zë Egipto, per ad guro'nladxt Dios laaman, <sup>10</sup> gognëman laaman loj ni guzag-diajman badëë tëëman xquiargueijnman, gognë tëëman laaman persi biajb rey guin laaman za-

gdxe, abi' beenman laaman gobernador Egipto, bazuj tēeman laaman din nabeeman gra ni rajp rey guin.

<sup>11</sup> 'Chi guyu gubijn guidibczi Egipto nē niz Canaán, dxel guzagdiaj da't ree dux bēngulal ree guial achet ni gaw reeman. <sup>12</sup> Per chi gogbee Jacob guial yu' trigo Egipto, guxhaal ree xi'nman bēn naj dux bēngulal ree, dxel wej reeman Egipto. <sup>13</sup> Chi barojp volt wej reeman, rēb Xiēb guial laaman naj bijch reeman, dxel gogbee rey Egipto xhie diaa zēēdaman. <sup>14</sup> Dxel rēb Xiēb loj ree bijchaman din chigxii reeman xDadaman nē gra ree lasa'man din chisob reeman Egipto. Gojc reeman gayo-jnchiin bejn. <sup>15</sup> Zianan zeel bisob Jacob Egipto, ni gūtaman ni gajc gūt ree xi'nman, dux bēngulal ree. <sup>16</sup> Gojc xchej dxel bignē reeman xdxijt ree dux bēngulal ree guiedx Siquem, persi biguie'ch reen lēn baa guzii Abraham loj ree xi'n Hamor.

<sup>17</sup> 'Chi ma zidyob tiamp gac ni rēb Dios loj Abraham, zien ree bēn Israel ma gojcxhiey Egipto. <sup>18</sup> Abi' guzuloj gunabee rey ren Egipto, bēn ad beenbeet Xiēb. <sup>19</sup> Rey zii basagzi bēn du ladx ree, gunabeeman chigsēēb reeman xindo nigu-iaaw golnejz ree din guiēt reex. <sup>20</sup> Abi' tiamp zii gojl Moisejs, tijb xindo bayuladx Dios. Gunaj ree xdadix laax choon bēēw. <sup>21</sup> Chi bidxin dxej bigsa'n reeman laax lod bigsēēb reeman laax, xi'n gajc rey guin baca' laax, persi baslaaman laax zi'c xi'nman. <sup>22</sup> Basiid Moisejs gra ni rajc ree bēn Egipto, abi' lasajc ni guneex ni been tēēx.

<sup>23</sup> 'Chi guyu Moisejs tiuu ijz, bidyajb guijca-man bignaj lasa' bēn Israelaman. <sup>24</sup> Abi' chi

baguiaaman caguin tijb b́en Egipto tijb b́en Israel, balajman laaman, bagüjtaman b́en Egipto guin. <sup>25</sup> Naladx Moisejs niagbee ree b́en Israel guial por laaman yabëe Dios laa reeman loj ree b́en Egipto, per ad gogbeet reeman. <sup>26</sup> Chi bareguiaal, bidxaagloj Moisejs tio'p ree b́en Israel caga'p reeman, abi' guyënman nabe'cdxeman laa reeman, rëbaman: “¿Chexc zeel rdilidi? Awa b́en Israel naj gropidi.” <sup>27</sup> Abi' b́en caguin b́en zatijb guin bacadxaaman Moisejs, rëbaman: “¿Chu bazuj lüj din nabeel dunujn, din na tëel ni rayal yaguieenan? <sup>28</sup> ¿Wen rënl ya gugüjtil naj zi'c bagüjtil b́en Egipto ni nieey?” <sup>29</sup> Chi biguiejn Moisejs ni rëb b́en guin, baxüünman wejman niz Madián. Ni gureman zi'c benzit, abi' cwa'man béngunaa, zianz guyu tio'p ree xi'ngaanman.

<sup>30</sup> 'Chi gudëd tiuu ijz, dxel balüüloj tijb xi anjl Dios loj Moisejs loj x bajl tijb yag ni cayzbajl lod naj yujbidx, gajxh guia' la Sinaí. <sup>31</sup> Dád badxa loj Moisejs guial baguiaaman bajl guin. Abi' chi bibigaman din guguiaaman laan mazri zagdxë, biguiejnman cha' Dios rëbaman lojman: <sup>32</sup> “Naj naj xDios xbéngulal reel, Abraham, Isaac në Jacob.” Dxel guzuloj canij Moisejs guial bidxëbaman, ad bayaxtaman nuguaaaman bajl guin. <sup>33</sup> Dxel rëb Dios lojman: “Gulëe xgurëchil, din nagle' lod za'l. <sup>34</sup> Naj cuguia xhienaag cazagdiaj ree da bejnan Egipto, riguiejnman roon reeman zeel biguia'tan din yabën laa reeman. Yan, guda din gaxhalan lüj Egipto.”

<sup>35</sup> 'Abi' majsi ad guyënt ree b́en Israel nuzoob reeman xtiidx Moisejs yaloj, rëb reeman lojman:

“¿Chu bazuj lüj din nabeel dunujn na tääel ni yaguieenan?” Per por anjl balüüloj loj bajl guin, badëed Dios guialrniabee lojman, abi' guxhaalaman laaman din güünman laa reeman yudar yarii reeman Egipto, zi'c rëb anjl balüüloj lojman loj yag caye'c. <sup>36</sup> Moisejs guin naj bën babëe dux béngulal ree Egipto, been tääeman milagr ree niz Egipto, në niz ro' nijsdoo ni la Nijs Xnia, në loj yujbidx lod guzu reeman tiuu ijz. <sup>37</sup> Laagajc tääeman rëb loj ree bën Israel: “Loj gajquidi cwe Dios tijb bën gudëed xtiidxaman loj ree bejn zi'c guleman naj. Gol bazoob xtiidxaman.” <sup>38</sup> Dxel chi guzunë Moisejs dux béngulal ree niz loj yujbidx, laaman naj bën guneenë xi anjl Dios ruguia' la Sinaí, persi badëeman xtiidx Dios loj reeman, abi' diidx guin ree naj ni basa'n reeman duloj ree yan.

<sup>39</sup> 'Per dux béngulal ree ad bazoobt reeman xtiidx Moisejs. Ad guyënt reeman niniabeeman laa reeman, tib guyuguijczy reeman nayejc reeman Egipto. <sup>40</sup> Dxel rëb reeman loj Aarón: “Been dios ree, din ned reeman du loj ree, din ad rayagbeet ree gonczy Moisejs bën babëe dunuj ree Egipto.” <sup>41</sup> Dxel been reeman tijb go'ndobëz din gaquib xdios reeman. Bagüjt reeman be ree persi badëed reeman laa reeb zi'c gon loj ni been reeman, been reeman lanij guial babaanë reeman ni been gajc reeman. <sup>42</sup> Dxel guro'nladx Dios laa reeman, baslaaman guyën reeman gubijdx con bëw con bajl yu' ree xanyabaa. Din zian ca loj xtiidx Dios ni bacaa ree bën badëed xtiidxaman loj ree bejn, lod rëb:

Bën Israel, loj tiuu ijz ni guzudi loj yujbidx,



¿wen bagüjtidi be ree ya din guneedi laa reeb lon  
zi'c gon?

<sup>43</sup> Per mazri guyëndi xdxandi Moloc biala tēēdi  
lidxan,  
nē xbajl dxan Refán, dxan been gajquidi din  
guzuxibidi loj reen.

Zeel gaxhalan lējt mazri zijt guial Babilonia.

<sup>44</sup> 'Abi' chi guzu ree dux bēngulal ree loj yu-  
jbidx, gojp reeman tijb yu been laa reeman sirv  
zi'c yadoo, lod guyuchaaw ree guiaj ni ca xley  
Dios. Been reeman yadoo guin zi'c gunabee Dios  
Moisejs, chi rēbaman lojman guial güünman laan  
zi'c ma baguiaaman. <sup>45</sup> Chi güt Moisejs, baya'nnē  
ree dux bēngulal ree yadoo guin. Chi baya'n Josué  
xluar Moisejs, dxel bidnē reeman yadoo guin chi  
gudil reeman guijc guidxliuj con ree bēn ren, abi'  
gognē Dios laa reeman persi been reeman gan  
baya'nnē reeman guidxliuj guin ree. Zian guzunē  
reeman yadoo guin xt bidxin dxej guzuloj gun-  
abee rey Davi. <sup>46</sup> Guyēn Dios rey Davi, abi' laaman  
guyēnman nūjnman tijb yadoo par Dios, bēn naj dux  
Dios ree nayajc ree bēn Israel. <sup>47</sup> Per rey Salomón  
naj bēn been laan, <sup>48</sup> majsi Dios bēn yu' xanyabaa  
ad rbejtaman lēn yadoo ni rüjn ree bejn, zi'c rēb  
bēn badēēd xtiidx Dios loj ree bejn diizd gocli, chi  
rēbaman:

<sup>49-50</sup> Xanyabaa naj lod zooban par ganabeen,  
guiáad loj guidxliuj naj lod ruzu guia'n.

¿Xhienaag gac yu güündi par naj?

¿O xhienaag naj lod yaziiladxan?

¿Id naj ben graczi ree ni guie ya?, rēb Dios.

<sup>51</sup> 'Per lējt —rēb Esteban —dád nadidi, ad rēntidi  
guzoobidi xtiidx Dios, ad rēn tēētidi chignia'di,

zianczi za'di contr xSprijt Dios, zi'cgajc been ree xbéngulalidi. <sup>52</sup> ¿Chu bén badëéd xtiidx Dios loj ree bejn ad beennaat ree xbéngulalidi? Xt bagüjt reeman bén badëéd ree xtiidx Dios bén rëb ree guial gui't tijb bén naya nali. Abi' yan ma bi'taman, bayüdi laaman loj ree bén rniabee, gunabee tëëdi güjtaman. <sup>53</sup> Majsí cwa'di xley Dios loj ree xi anjlan, per ad rüjntidi zi'c rëb loj ley guin.

### *Bagüjt reeman Esteban*

<sup>54</sup> Chi biguiejn reeman ni rëb Esteban, xt raw lay reeman tant balen reeman laaman. <sup>55</sup> Per guial yu' xSprijt Dios luxdoo Esteban, chi gules lojman xanyabaa, dxel baguiaaman xbiani Dios baguiaa tëëman Jesús za'man xladbee Dios. <sup>56</sup> Dxel rëb Esteban:

—¡Gol baguiaa! Ruguian naxal xanyabaa, ruguia tëën Bén guxhaal Dios za'man xladbee Dios.

<sup>57</sup> Per chi biguiejn reeman zian, bata'cw guidiaj reeman, dxel gurixdiaj reeman zignaaz reeman Esteban, <sup>58</sup> babëë reeman laaman loj ciuda guin, bicüjt reeman laaman con guiaj, guiáad xab reeman basa'nsii reeman loj xinguiag la Saulo persi canajxan. <sup>59</sup> La'tgaj cucaaguiaj reeman Esteban, rëbaman:

—Dad Jesús, baca' da sprijtan.

<sup>60</sup> Dxel bazuxibaman guridxa'man rejs, rëbaman:

—Dad Jesús, ad güüncwentil dol cayüjn ree bén guin yan.

Naabczi gulox rëbaman zian, laa güt gajcaman.

## 8

*Guzunal Saulo b́en ŕliladx ree Jesucrist*

<sup>1</sup> Baya'n Saulo conform guial bagüjt reeman Esteban. Abi' dxej zii gajc guzuloj rzunal reeman b́en Jerusalén ree b́en ŕliladx ree Jesucrist, dxel bire'ch reeman guidib niz Judea nē niz Samaria, b́en najzi ree apóstoles baya'n. <sup>2</sup> Guyu b́elzi ree xinza'c, laa reex biquie'ch Esteban, abi' dád biin reex guijcaman. <sup>3</sup> Guiáad Saulo rzunalaman b́en ŕliladx ree Jesucrist, ruman yu yu din cwëē naguiejnman laa reeman, zi'c xinguiiaw zi'c b́engunaa, persi rgu'man laa reeman ladxguib.

*Bacaagdiajg ree b́en Samaria xtiidx Dios*

<sup>4</sup> Per b́en b́rii ree Jerusalén, lod zétzi reeman rtie'ch reeman xtiidx Dios. <sup>5</sup> Zi'c been Felip, wejman guiedx Samaria, guzuloj caneeman xtiidx Jesucrist loj ree bejn. <sup>6</sup> Dád zien ree bejn rdo'p, graczi reeman rucaagdiajg chaaw ni rēb Felip, ruguiaa tēē reeman milagr ree ni rúnman. <sup>7</sup> Zien ree b́en nējt tib lajt xcuerp bayün Felip, nē ree b́en ad rzat zagdx, bayün tēēman b́en yu' ree xindxab luxdoo abi' rbixdiaj reex rarii reex. <sup>8</sup> Zianan zeel babaa da't ree b́en luguiedx zii.

<sup>9</sup> Per luguiedx zii guyu tijb b́en b́rii laj Simón, diizd gocli rúnman guialbidxaa persi rusquieeman b́en Samaria ree, rúnman b́en lasajc. <sup>10</sup> Graczi reeman rucaagdiajg chaaw ni rēbaman, diizd mazri ree xinguiag xt mazri ree bengol, abi' rēb reeman:

—Naroob naj xguialrniabee Dios ni rajp b́en guie.

<sup>11</sup> Bidxga' reeman laaman guial ma gojc xchej cusquieeman laa reeman con guialbidxaa ni

rüjnman. <sup>12</sup> Per chi bililadx reeman ni rëb Felip xcwent xguialrniabee Dios në xcwent Jesucrist, zi'c ree xinguaaaw zi'c ree béngunaa gurobnijs reeman. <sup>13</sup> Xt në Simón bililadx gurobnijs tēëman, abi' ad riro'nladxtaman Felip radxa tēë lojman graloj ree milagr ruguiaaman rüjn Felip.

<sup>14</sup> Chi gogbee ree apóstoles riga' Jerusalén guial ma bililadx ree bën Samaria xtiidx Dios, dxel guxhaal reeman Bëd con Waj ni. <sup>15</sup> Chi bidxin reeman, gurejdx gunab reeman Dios por ree bën Samaria bën ma rililadx ree xtiidx Dios din chu' xSprijt Dios luxdoo reeman, <sup>16</sup> din ni'qui tijb reeman ad wayut Sprijt guin luxdoo, gurobnijsi reeman por Dad Jesús. <sup>17</sup> Dxel guxhoob yaa ree Bëd con Waj guijc reeman, abi' guyu xSprijt Dios luxdoo reeman.

<sup>18</sup> Chi baguiaa Simón cayu xSprijt Dios luxdoo ree bën guin guial caxhoob yaa ree apóstoles guin guijc reeman, dxel guyënman nudëëman milia loj reeman, <sup>19</sup> rëbaman:

—Në lon gol banee guialrniabee guin din chi gaxhob yan chutëëz guijc bënan, në luxdooman chu' xSprijt Dios.

<sup>20</sup> Dxel badxi' Bëd xtiidxaman rëbaman:

—Nihil con guidib xmilial, din rüjnl xgab guial zajc siil guialrniabee razaladx Dios. <sup>21</sup> Ad rayalt ad zajc tēët güünl zi'c raguieenan, din ni'quid zinaltil xnejz Dios. <sup>22</sup> Bayüjn xgab por ni mal beenl, gurejdx gunab tēë Dios, rupent güünman lüj perdon por ree xixgabmalil, <sup>23</sup> din ragbeen ganax guialralen yu' luxdool, abi' dol guin naj ni rniabee lüj.

<sup>24</sup> Dxel badxi' Simón xtiidxaman, rëbaman:

—Gol gurejdx gunab Dios por naj, chitëë gaza'can ni'qui tijb ni ma nadi.

<sup>25</sup> Chi gulox gunee ree apóstoles guin xtiidx Dios loj ree b́en guin, dxel badxin reeman Jerusalén, abi' graczi ree guiedx riga' niz Samaria lod gudéd reeman gutie'ch reeman xtiidxza'c Jesucrist.

*Felip con b́en Etiopía*

<sup>26</sup> Chi ma gudéd gojc zian, gunee tijb xi anjl Dios Felip rēbaman:

—Wej niz sur nejb ni zē Jerusalén xt lod la Gaza, niz lod naj ganax yujbidx.

<sup>27</sup> Dxel brii Felip zēman. Runejb guin banaazaman tijb b́en Etiopía, najman b́en zojbloj guial laaman rgu'chaaw xmilia Candace, b́en naj reina Etiopía. Wejman Jerusalén bignajchi'man Dios, <sup>28</sup> abi' ma bayunejzaman zia ladxaman, zojb lēn xcarrejt zagdxeman, roolaman loj gui'ch ni bacaa Isaías, b́en badēéd xtiidx Dios loj ree bejn. <sup>29</sup> Dxel rēb xSprijt Dios loj Felip:

—Bibig gajxh cwē' carrejt guin.

<sup>30</sup> Chi bibigaman, biguiejnman cayool b́en guin loj gui'ch bacaa Isaías. Dxel gunabdiidxaman lojman rēbaman:

—Dad, ¿rignia'l ni cayoolil ya?

<sup>31</sup> Badxi' b́en guinan rēbaman:

—¿Xoza chignia'nan? Awa achut gusignia' naj.

Dxel rēbaman loj Felip din chē'paman loj carrejt guin, cweman cwē'man.

<sup>32</sup> Loj xtiidx Dios lod cayool b́en guin rēban:

Zi'c rinē reeman tijb xiil,

binē reeman laaman lod gugūjt reeman laaman.

Abi' achet rēbaman,

zi'c tijb xiil ma za' loj ree b́en gugaj guidxladib.

<sup>33</sup> Chi beennē reeman laaman zi'ctzi rēn reeman,

achut been guialguxtis por laaman.  
Yan achut guza't xdiaaman,  
din ma bisüd reeman laaman loj guidxliuj.

<sup>34</sup> Rëb bën guin loj Felip:

—Guna sii, ¿chu xcwent rníee bën bacaa diidx guie ree? ¿Xcwent gajcaman ya o xcwent ben renan?

<sup>35</sup> Dxel guzuloj Felip cusignia'man laaman xti-idx Dios ni cayoolaman, zian beman xtiidxza'c Jesucrist lojman. <sup>36</sup> Abi' chi gudëd reeman lod yu' nijs, dxel rëb bën guin loj Felip:

—Guie yu' nijs. ¿Nid zajc garobnijsan guie ya?

<sup>37</sup> Zeel rëb Felip lojman:

—Bal rliladxil guidib luxdool, zajcan.

Badxi' bën guinan rëbaman:

—Rliladxan guial Jesucrist naj Xi'n Dios.

<sup>38</sup> Dxel gunabeeman guzudxe xcarrejtaman. Abi' baguiajt grop reeman, dxel guyu reeman lojnijs guin persi baroobnijs Felip laaman. <sup>39</sup> Chi barii reeman lojnijs guin, loj hor zii gajc gunidloj Felip binë xSprijt Dios laaman, abi' ad baguiaatri bën guin laaman, per dád rabaaman zinal xnejzaman. <sup>40</sup> Chi gogbee Felip, ma za'man xt guiedx Azoto, dxel zëman guiedx guiedx zigtie'chaman xtiidxza'c Jesucrist xt bidxinman Cesarea.

## 9

### *Bililadx Saulo Dad Jesucrist*

*(Hch. 22:6-16; 26:12-18)*

<sup>1</sup> Guiáad Saulo ad rucwëëzt rdxe'chaman bën rliladx ree Jesucrist, rëbaman gugüjtaman laa reeman. Zeel wejman bigneenëman bixhioz mazri zojbloj rniabee graczi ree bixhioz, <sup>2</sup> din gac tijb

gui'ch din gac cheman lën ree yadoo Damasco chigdiilaman bën rliladx ree Jesucrist, zi'c ree xinguaaaw zi'c ree béngunaa, din chignëman laa reeman ladxguiib Jerusalén. <sup>3</sup> Per chi ma cadxinman gajxh guiedx Damasco, dxejlczi brii tijb guij xanyabaa balaan bacha' lod zëman. <sup>4</sup> Abi' bireeyujman, chi naga'man luyuj guin biguiejnman cha' bën rëb:

—Saulo, Saulo, ¿chexc zeel rzunalil naj?

<sup>5</sup> Abi' gunabdiidxaman rëbaman:

—¿Chu lüj, Dad?

Badxi'man laan rëbaman:

—Naj naj Jesús bën rzunalil. Per ganin lüj, lüj gajc rguuil xguialnaal zi'c rüjn tijb go'n rudxeguaia' loj yag ni rulaagnë reeman laab.

<sup>6</sup> Rnij Saulo guial tant bidxebaman, abi' rëbaman:

—Dad, ¿xhie rënl günan?

Dxel rëb Dad Jesucrist lojman:

—Bixche, wej guiedx Damasco, ni na reeman ni rayal güünl.

<sup>7</sup> Abi' ree bën në Saulo dád bidxeb reeman guial biguiejn reeman cha' bejn, per achutczi baguiaa reeman. <sup>8</sup> Chi bixcheman luyuj guin, baxhal lojman, ad rajctri ruguiaaman. Dxel gunaaaz reeman yaaman bignë reeman laaman Damasco. <sup>9</sup> Ni guzuman choon dxej, ad rajct ruguiaaman, achetczi rawaman ache tëëtczi rë'man.

<sup>10</sup> Damasco gure tijb bën rliladx Dad Jesucrist, brii lajman Ananías. Balüüloj Jesucrist lojman, rëbaman:

—¡Ananías!

Badxi'man laan rëbaman:

—Laa naj guie Dad.

11 Dxel rëb Jesucrist lojman:

—Bisu, wej call ni la nali. Chi guidxinl lidx Judas, gunabdiidx por tijb xin zëed Tarso, lax Saulo. Din laax cabejdx canab naj, <sup>12</sup>abi' zi'c rulüü cane'xhchaalix, baguiaax guyu tijb bën la Ananías guxhoob yaaman guijquix persi baguiaax stijb.

13 Chi biguien Ananías zian, dxel rëbaman:

—Dad, zien da't ree bejn ruza't xin zii, në ree ni mal rüjnnëx bën rliladx ree lüj Jerusalén. <sup>14</sup>Yan zëedix guie con xguialrniabee ree bixhioz rniabee ree bixhioz, din guiniaazix gra ree bën rliladx lüj.

15 Dxel rëb Jesucrist lojman:

—Wej, din naj gule laax din chiguiex da diidxan loj ree bën ad najt bën Israel, në loj ree rey, con nëgajc loj ree bën Israel. <sup>16</sup>Guiën lojx guial sagdiaj da'tix guial najx da bejnan.

17 Dxel zë Ananías lënü lod za' Saulo. Chi guyuman, guxhoob yaaman guijcaman, rëbaman:

—Bijch Saulo, Dad Jesús bën balüüloj lojl runejz lod zëedil, laaman guxhaal naj din yaguaaal, chu' tëë xSprijt Dios luxdool.

18 Loj hor gajc zi'c rulüü yu' xhie biquied guiaalojman abi' baguiaaman stijb. Dxel guzuliman gurobnij saman, <sup>19</sup>gudaw tëëman persi bayuman gojl. Dxel guzujman Damasco tio'p choon dxej con ree bën rliladx Jesucrist.

### *Gunee Saulo xtiidx Dios Damasco*

20 Dxel guzuloj gunee Saulo xtiidx Dios lën ree yadoo, rëbaman guial Jesucrist naj Xi'n Dios.

21 Graczi ree bën biguien ni rëbaman badxa loj reeman abi' rëb reeman:



—¿Nid b́en guien rzunal b́en rliadx ree Jesucrist Jerusalén ya? ¿Nid laagajcaman zéed guie ya, din guiniaazaman b́en rliadx ree Jesucrist chigné tēeman laa reeman loj ree bixhioz rniabee ree bixhioz?

<sup>22</sup> Per Saulo guixie guixie mazri cariiman guialrdxeb rnieeman xtiidx Dios, rulüüman guial Jesús naj Cristo, din yabēeman bejn ree loj dol. Xt ragdxa ree b́en Israel zojb ree Damasco chi rucaagdiajg reeman ni rēbaman.

### *Baxüün Saulo guiedx Damasco*

<sup>23</sup> Ad xchejt gojc, baya'n ree b́en Israel diidx din nugüjt reeman Saulo, <sup>24</sup> per laa gogbee gajcaman ni rēn reeman güün reeman. Dxej guiaal rbēz reeman laaman ro' ree port ni rarii ro' ciuda guin din nugüjt reeman laaman. <sup>25</sup> Per ree b́en rliadx Jesucrist, guxhin badxe' reeman laaman lēn dxüm narooob, abi' gulet reeman laaman niz xijch ze' nusiaaw ciuda guin, zian baxüünman Damasco.

### *Badxin Saulo Jerusalén*

<sup>26</sup> Chi badxin Saulo Jerusalén, guyēnman nuchajgaman b́en rliadx ree Jesucrist, per graczi reeman bidxeb laaman guial ad rliadxt reeman nēman ma rliadx Jesucrist. <sup>27</sup> Dxel binē Bernabé laaman loj ree apóstoles guin, bagojnman guial baguiaa Saulo dux Dad ree Jesucrist, guneenē tēeman laaman chi zēman Damasco, bagojn tēeman guial Damasco gunee Saulo xtiidx Jesucrist sin guialrdxeb. <sup>28</sup> Zian baya'n Saulo Jerusalén abi' nayuman laa reeman. <sup>29</sup> Ad rdxebtaman ruza'taman Dad Jesús, abi' xt gudijldiidxnēman b́en Israel rniee ree diidx grieg, per guyēn reeman

nugüjt reeman laaman. <sup>30</sup> Chi gogbee ree b́en rliiladx Jesucrist zian, biné reeman laaman guiedx Cesarea. Yagaj baxhaal reeman laaman guiedx Tarso.

<sup>31</sup> Dxel babedxe luxdoo ree b́en rliiladx Jesucrist, b́en zojb ree niz Judea nē niz Galilea nētēē niz Samaria, chigagaj beenbee reeman mazri xhien-aag naj xnejz Dios, bazoob tēē reeman xtiidxaman, abi' cayagnē xSprijt Dios cayajcxhie j reeman.

### *Bayajc Eneas*

<sup>32</sup> Chi biza Béd bitixlojman b́en rliiladx ree Jesucrist, dxel wej gajcaman bitixlojman b́en rliiladx ree Jesucrist guiedx Lida. <sup>33</sup> Ni bidxaaglojman tijb xinguaaw la Eneas. Ma gojc xhujn ijz naga'x, ragxuux, ad rajct rzax. <sup>34</sup> Abi' rēb Béd lojx:

—Eneas, ma bayüjn Jesucrist lüj. Bixche, bales ni go'til loj.

Loj hor zii gajc bixchex. <sup>35</sup> Chi baguiaa gra ree b́en zojb guiedx Lida nē ree b́en zojb niz Sarón guial ma bayajc Eneas, dxel nē reeman bililadx Jesucrist.

### *Baban Dorcas*

<sup>36</sup> Loj tiamp zii guyu tijb béngunaa rliiladx Jesucrist luguiedx Jope, laman Tabita, diidx grieg laman Dorcas. Laaman been ni za'c ree, been tēēman yudar b́enprob ree. <sup>37</sup> Lēn ree dxej zii gogxuu Dorcas abi' güjtaman. Chi gulox bagajz reeman laaman, dxel bitixh reeman laaman lēnü ladya. <sup>38</sup> Abi' gajxh guiedx Jope raya'n guiedx Lida lod za' Béd. Chi gogbee ree b́en rliiladx Jesucrist guial za'man ni, guxhaal reeman tio'p ree xinguaaw bisajc reex Béd liaadx, rēb reex:

—Been wen yo' ree Jope yan gajczi.

<sup>39</sup> Laa zinë gajcaman laa reex. Chi bidxinman, binë reeman laaman lëñü lod naga' xcuerp Dorcas. Ni riga' zien ree béngunaa bizëjb roon reeman, abi' bibig reeman loj Bëd culüü reeman gra lajd ni been Dorcas chi sta nabanman. <sup>40</sup> Dxel gunabee Bëd barii gra reeman, abi' bazuxibaman gurejdx gunabaman Dios. Dxel baguiaaman bengüt guin, rëbaman:

—¡Tabita, bixche!

Laa guxhal gajc lojman. Chi baguiaaman Bëd, gureliman, <sup>41</sup> dxel gunaaz Bëd yaaman persi guzuliman. Abi' gurejdxaman bën rliladx ree Jesucrist con ree bën bizëjb guin, persi baguiaa reeman guial ma baban Dorcas. <sup>42</sup> Guidibczi guiedx Jope gogbee reeman ni goc, abi' zien da't reeman bililadx Jesucrist por zian. <sup>43</sup> Guiáad Bëd baya'nman mazri dxej luguiedx guin, lidx Simón bën rüjnchaaw guid.

## 10

### *Wej Bëd lidx Cornel*

<sup>1</sup> Luguiedx Cesarea gurej tijb bën brii laj Cornel. Laaman goc suldad gunabee tibcwaa ree suldad brii laj Italiano. <sup>2</sup> Gojcaman benza'c, laaman në gra ree bën zojb lidxaman guyën reeman Dios, abi' dád beenman yudar bën Israel ree, bën naj ree bënprob, në zianczi rbejdx rniabaman Dios. <sup>3</sup> Tijb dxej cost raca choon wadxe, guzajcaman zi'c rulüü cane'xhchaalaman. Zagdxeczi baguiaaman guyu tijb xi anjl Dios lëñü lod za'man, abi' rëb anjl guin lojman:

—¡Cornel!

<sup>4</sup> Baguiaaman loj anjl guin, abi' dád bidxebaman, rëbaman:

—¿Xhienin, Dad?

Abi' rëb anjl guin:

—Ma biguiejn Dios xtiidxil ma baguiaa tëëman xhienaag rüjnl yudar bënprob ree. <sup>5</sup> Guxhaal ree bën che luguiedx Jope din chica' reeman Simón, bën la gajc Bëd. <sup>6</sup> Zojbaman lidx tijb bën la gajc Simón, bën rüjnchaaw guid, bën zojb gajxh ro' nijsdoo. Bëd guin na ni rayal güünl.

<sup>7</sup> Chi zia anjl gunee Cornel, gurejdxaman tio'p ree xmojsaman, zatijb suldad rajpaman confians rililadx tëëman Dios. <sup>8</sup> Gulox beman diidx loj reeman ni guzacaman, dxel guxhaalaman laa reeman Jope.

<sup>9</sup> Chi bareguiaal, la'tgaj cadxin reeman gajxh Jope, cost garol dxej wë'p Bëd guiyc yu lod zojbaman din cwedx guiniabaman Dios. <sup>10</sup> Dád gulaanman, guyënman niajwaman, per la'tgaj cayüjn reeman ni gawaman guzajcaman zi'c rulüü cane'xhchaalaman. <sup>11</sup> Baguiaaman bixal xanyabaa abi' caguiajt zi'c tijb lajd narooob xt lod za'man, naxii guidap xquinan. <sup>12</sup> Loj lajd guin yu' gra loj ree be yu' tajp guia', në ree bëël, nëtëë ree be rzuj. <sup>13</sup> Dxel biguiejnman cha' bën rëb:

—Bëd, bisu, bagüjt be gawil.

<sup>14</sup> Per badxi' Bëd laan rëbaman:

—Yajqui, Dad. Ad wayawtczan nidxuudx ni ad rayalt gaw bejn.

<sup>15</sup> Abi' rëb cha' bën guin zatijb:

—Ni ma basia Dios ad rnieelan nidxuudx.

16 Choon volt gojc zian, dxel bayë'p lajd guin xanyabaa stijb. 17 La'tgaj cayüjn Béd xgab xhie rën guiëb ni baguiaaman, loj hor zii gajc bidxin ree bën guxhaal Cornel rulidx Simón, guial ma gunabdiidx reeman banguin naj lidxaman. 18 Chi bidxin reeman, gunabdiidx reeman bal ni zojb Simón bën la gajc Béd.

19 Guiáad Béd sta cayüjnman xgab ni baguiaaman, chi rëb xSprijt Dios lojman:

—Laa choon ree xinguaaw raguuil lüj. 20 Bisu, biguiajt binë reex, ad chu' luxdool tio'p, din naj guxhal laa reex.

21 Dxel baguiajt Béd lod za' ree bën guxhaal Cornel, abi' rëbaman loj reeman:

—Naj naj bën raguuilidi, ¿chexquiza zeel raguuilidi naj?

22 Dxel badxi' reeman laan rëb reeman:

—Guxhaal bën la Cornel dunujn, bën rniabee tibcwaa ree suldad, najman benza'c, rdxebaman Dios, abi' graczi ree bën Israel rën laaman. Tijb xi anjl Dios rëb lojman, guial rayal guixhiaalaman dunujn yudca'n lüj din yo' ree lidxaman, din gucaagdiajgaman ni rayal guiëbil.

23 Dxel badxe' Béd laa reeman lënü, ni gudëd reeman guiaal. Chi bareguiaal, binëman laa reeman. Në bëlzi ree bën zojb Jope bën rililadx ree Jesucrist binë laaman.

24 Chi bareguiaal bidxin reeman Cesarea lod zojb Cornel. Abi' bato'p Cornel gra ree lasa'man në ree xmiwaman, din cwëz reeman guidxin reeman. 25 Chi bidxin Béd lidx Cornel, laa brii gajc

Cornel bigchaaglojman laaman, dxel bazuxibaman loj Béd persi gojpaman laaman respejt. <sup>26</sup> Per bazuli Béd laaman, rëbaman:

—Guzuli, din lasa' bejn gajcan lüj.

<sup>27</sup> La'tgaj cadxin reeman ruyu guin cayü reeman diidx. Abi' chi guyu reeman, baguiaa Béd zien da't ree bejn riga' ni. <sup>28</sup> Dxel rëb Béd loj reeman:

—Ma qui ragbeedi xhienaag naj xley ree bén Israel, guial ad zajct go'ch reeman loj ree bén ad najt bén Israel o chu' reeman lidx reeman. Per ma balüü Dios naj guial achutczí rayal ganen bendxuudx, bén nabixhladx. <sup>29</sup> Zeel chi bidca' reeman naj, laa bial gajcan achet guijc badxiban. Yan rënan gagbeen, ¿chexquiza zeel gurejdxidi naj?

<sup>30</sup> Badxi' Cornelan rëbaman:

—Ma gojc tajp dxej cost hor guie gajc, chi zoob lidxan, raca choon wadxé, cabedx canaaban Dios, loj hor zii balüüloj tijb bejn lon najcwaman lajd nayni. <sup>31</sup> Abi' naman lon: “Cornel, ma bigueijn Dios xtiidxil, yu'guijc tēēman xhienaag rüjn! yudar bénprob ree. <sup>32</sup> Zeel guxhaal ree xin che luguiedx la Jope din chica' reex Simón, bén la gajc Béd. Zojbaman lidx tijb bén la gajc Simón, bén rüjnchaaw guid, bén zojb gajxh ro'nijsdoo. Béd guin na ni rayal güün!” <sup>33</sup> Zianan zeel laa guxhal gajcan xin bidgadiil ree lüj. Zagdxé beenl bi'til. Abi' yan dugraczan nadxu' delant loj Dios yu' xanyabaa, din yacaagdiajgan gra ni gunabee Dios lüj nal du lojn.

### *Ni gunee Béd lidx Cornel*

<sup>34</sup> Dxel guzuloj canee Béd, rëbaman:

—Ma ragbeen yan guial tiblojzi ruguiaa Dios bejn. <sup>35</sup> Din Dios, chutëez bénguidxliuj ridxga' laaman rüjn tëëman zi'c rayal, nëgajc Dios ridxga' laaman. <sup>36</sup> Dios ma gunee bën Israel ree, ma bagojnman guial por Jesucrist rabeledxe luxdoo bejn, bën naj Dad par gra ree bénguidxliuj. <sup>37</sup> Lëjt ragbee xhienaag baza't reeman Jesús diizd niz Galilea xt guidib niz Judea, chi gulox bagojn Waj bejn ree xcwent guialrirobnijs. <sup>38</sup> Ragbee tëëdi guial ma badëë Dios xSprijtaman con xguialrniabeeman loj Jesús bën Nazaret, abi' bizaman biguieenman ni zagdxë, bayünman gra ree bën cazagdiaj por xindxab. Gojc beenman zian guial za'në Dios laaman. <sup>39</sup> Abi' dunujn baguiaa gra ni been Jesús guidib niz Judea, në niz Jerusalén. Dxelri bagüjt reeman laaman, bacaa reeman laaman loj crüjz. <sup>40</sup> Per Dios basban laaman ni bayon dxëj, abi' cwëjb Dios bidgalüülojman du lojn. <sup>41</sup> Ad balüülojtaman loj gra ree bejn, tijbzi du lojn nayajcan bën gule Dios diizd yaløj din yaguaian graczi ni beenman. Abi' dunujn badaawnë' laaman badü'në' tëën laaman chi babanman stijb. <sup>42</sup> Dxelri guxhaal Jesús dunujn din yatie'chan xtiidxaman loj ree bejn, guial Dios ma gulej laaman din güünman guialguxtis chi guidxin dxëj yadëëd gra ree bejn cwent loj Dios, zi'c ree bën naban zi'c ree bën ma güjt. <sup>43</sup> Nëtëë diizd gocli graczi ree bën badëëd xtiidx Dios loj ree bejn, gunee reeman xcwent Jesús, rëb reeman guial graczi ree bën chililadx laaman, gac xtol reeman perdon.

*Guyu xSprijt Dios luxdoo ree bën ad najt bën Israel*

<sup>44</sup> Sta canee Béd, chi guyu xSprijt Dios luxdoo gra ree bén cucaagdiajg ni cayëbaman. <sup>45</sup> Dxel bén Israel rliladx ree Jesucrist, bén binë ree Béd, dád badxa loj reeman guial në ree bén ad najt ree bén Israel guyu xSprijt Dios luxdoo, <sup>46</sup> guial rigüiejn reeman ma rníee ree bén guin graloj ree diidx, abi' ruza't reeman Dios zagdx. <sup>47</sup> Dxel rëb Béd loj reeman:

—¿Chu zajc gudxoon tiobnijs ree bén guie, bal ma yu' xSprijt Dios luxdoo reeman zi'cgajc dunuj ree?

<sup>48</sup> Abi' gunabeeman tiobnijs reeman por Jesucrist. Dxelri guzajc reeman liaadx loj Béd din sunëman laa reeman za tio'p choon dxej mazri.

## 11

*Guyu xSprijt Dios luxdoo ree bén ad najt bén Israel*

<sup>1</sup> Bén naj ree xi apóstoles Jesús con ree bén Judea, bén rliladx ree laaman, gogbee reeman guial në ree bén ad najt bén Israel bililadx xtiidx Dios. <sup>2</sup> Abi' chi badxin Béd Jerusalén, bén Israel ma rliladx ree Jesucrist, bén sta zinal ree ley, gudilë reeman Béd.

<sup>3</sup> Rëb reeman lojman:

—¿Chexc zeel bichu'l lidx ree bén ad najt bén Israel abi' gudawnël laa reeman?

<sup>4</sup> Dxel guzuloj cayü Béd diidx diizd guia'xchej xhienaag gojc zeel wejman lidx ree bén guin abi' rëbaman loj reeman:

<sup>5</sup> —Chi za'n luguiedx Jope, la'tgaj cabedx canaan Dios, guza'can zi'c rulüü cane'xhchalan. Bagüan zi'c tijb lajd narooob naxii guidap xquinan caguiajtan diizd xanyabaa xt lod za'n. <sup>6</sup> Chi



baguian zagdxé xhie yu' loj lajd guin, baguian bedoxh ree në ree be yu' tajp guía' në ree bëel con ree be rzuj. <sup>7</sup> Dxel biguiejnan cha' bejn, naman: “Bëd, guzuli, bagüjt be gawil.” <sup>8</sup> Per badxi'nan rën: “Yajqui, Dad, din ad goctczi wayawan nidxuudx, ni ad rayalt gaw bejn.” <sup>9</sup> Abi' guneeman diizd xanyabaa stijb, naman: “Ni ma basia Dios, ad rnieelan nidxuudx.” <sup>10</sup> Choon volt gojc zian, dxel bayë'p gra ni guin xanyabaa. <sup>11</sup> Loj hor zii gajc bi't choon ree xinguaaaw lod guren, zëed reex diizd Cesarea, cayguiil reex naj. <sup>12</sup> Abi' na xSprijt Dios lon guial chinë'n laa reex, ad chu' luxdon tio'p. Në guixo'p ree bën guie bën naj dux compniar ree binë'n. Abi' dugraczan badxu' lidx bën guin. <sup>13</sup> Dxel beman diidx du lojn xhienaag balüüloj tijb xi anjl Dios lojman lidxaman, rëb anjl guin lojman: “Guxhaal ree bën che luguiedx Jope din chica' reeman Simón, bën la gajc Bëd, <sup>14</sup> laaman na xhienaag gac ree xtolil perdon, con gra ree bën zojb lidxil.” <sup>15</sup> Chi guzuloj canenë'n laa reeman, guyu xSprijt Dios luxdoo reeman zi'cgajc guyuman du luxdoo ree yaloj. <sup>16</sup> Dxel basaaladxan xtiidx Dad Jesucrist chi naman: “Walican baroobnijs Waj con nijs, per lëjt chu' xSprijt Dios luxdoodi.” <sup>17</sup> Abi' yan bal ma guxhaal Dios xSprijtaman par laa reeman zi'cgajc guxhaalaman laaman du loj ree chi baliladx ree Dad Jesucrist, ¿chu najn din gudxonan ni rüjn Dios?

<sup>18</sup> Chi biguiejn ree bën guin ni rëb Bëd, dxel achetri rëb reeman lojman abi' baza't reeman Dios zagdxé, rëb reeman:

—¡Ma rayagbee ree yan guial në ree bën ad najt bën Israel ma balüü Dios guial rayal yayüjn xgab

por xtol reeman yadxi' tée loj reeman lojman din gap reeman guialnaban tiblayaa delant lojman!

*Bililadx ree bén Antioquía Jesucrist*

<sup>19</sup> Chi mal bagüjt ree bejn Esteban, dxel guzuloj rzunal reeman bén rliladx ree Jesucrist persi bire'ch gra ree bén rliladx guin niz Fenicia, niz Chipre në Antioquía. Abi' gutie'ch reeman xtiidxa'c Jesucrist, per ganaxzi loj ree bén Israel. <sup>20</sup> Per loj reeman no'ch bëlzi ree bén Chipre në ree bén Cirene. Laa reeman we luguiedx Antioquía abi' gutie'ch reeman xtiidx Dad Jesucrist loj ree bén ad najt bén Israel. <sup>21</sup> Gognë Dios laa reeman, dád zien ree bejn bililadx ni rëb reeman abi' bililadx reeman Jesucrist.

<sup>22</sup> Chi gogbee ree bén Jerusalén rliladx Jesucrist ni goc, guxhaal reeman Bernabé xt guiedx Antioquía. <sup>23</sup> Chi bidxinman ni, dád babaaman chi baguiaaman xhienaag cayagnë Dios bén guin ree. Dxel guneenëman gra reeman din con guidib luxdoo reeman gusnuu chinal reeman xtiidx Jesucrist. <sup>24</sup> Benza'c gojc Bernabé, dád gognë xSprijt Dios laaman abi' bililadxaman Jesucrist con guidib luxdooman. Zeel dád zien ree bejn bililadx Jesucrist.

<sup>25</sup> Dxelri wej Bernabé guiedx Tarso bigdiilaman Saulo. <sup>26</sup> Chi badxejlaman laaman, dxel binëman laaman xt Antioquía. Ni guzunë reeman bén rliladx ree Jesucrist tibijz, dád zien ree bejn balüü reeman. Abi' luguiedx Antioquía naj lod gulëëlay reeman bén rliladx ree Jesucrist, cristian.

<sup>27</sup> Lën ree dxej zii bëlzi ree bén badëë xtiidx Dios loj ree bejn, guza Jerusalén wej reeman Antioquía.

28 Tijb reeman la Agabo, laaman guzuli loj ree bejn abi' por xSprijt Dios bagojnman guial chu' gubijn guidibczi guidxliuj. Laan gojc loj tiamp gunabee rey Claudio. 29 Abi' ree bén rliadx Jesucrist luguiedx Antioquía, baya'n reeman diidx din guido'p reeman zi'ctzi ni galguzuj gudëed tijb gaj reeman, din gagnë lasa' reeman, bén rliadx ree Jesucrist, bén zojb ree niz Judea. 30 Abi' zian been reeman. Dxel guxhaalnë reeman laan Saulo con Bernabé din gudëed reeman laan loj ree bén rniabee ree bén rliadx Jesucrist niz Judea.

## 12

### *Guyu Bëd ladxguiib*

1 Lën ree dxej zii guzuloj rey Herodes cusagziman bëlzi ree bén rliadx Jesucrist. 2 Abi' gunabee-man bagüjt reeman Jacob bijch Waj, con espad. 3 Chi baguiaaman bayuladx ree bén Israel ni beenman, dxel gunabeeman gunaaz reeman Bëd. Ni ne goc lën ree dxej lanij pascw chi raw reeman guiadxtil ad yu't levadur. 4 Chi gunaaz reeman Bëd, badxe' reeman laaman ladxguiib abi' gunabee rey Herodes tajp cwaa ree suldad din guinia reeman ro' ladxguiib guin, tib cwaa gaj reeman naj tajp suldad. Din beenman xgab nuzujman Bëd loj ree bén guiedx guin chi nidëd pascw. 5 Zian guyu Bëd ladxguiib, gojp da't reeman laaman. Per gra ree bén rliadx Jesucrist ad rucwëëzt rbejdx rniab reeman Dios por laaman.

### *Babëë Dios Bëd ladxguiib*

6 Guxhin zii gajc chi yareguiaal cwëë Herodes Bëd loj ree bén guiedx guin, naga'yëjs Bëd galay

tio'p ree suldad, naxiiman con tio'p ree caden, guiáad los demazri ree suldad guin cayajp ro' ladxguiib guin. <sup>7</sup> Dxejczy bidxin tijb xi anjl Dios abi' basni tijb gui j lēn ladxguiib guin, dxel baqui' anjl guin cwē'lēn Bēd persi bacwēēnman laaman, rēbaman lojman:

—¡Cari bixche!

Loj hor zii gajc biajb ree caden naxii yaa Bēd, <sup>8</sup> abi' rēb anjl guin lojman:

—Guxhiidxi'ch lēnl balēē tēē xgurēchil.

Chi ma been Bēd zian dxel rēb anjl guin:

—¡Gojt xcajpil, tanal naj!

<sup>9</sup> Laa barii gajc Bēd nalaman anjl guin, per ad ragbeetaman bal diidxli naj ni cayūjn anjl guin, gunaladxaman cane'xhchaalzaman. <sup>10</sup> Abi' gudēd reeman loj tibcwaa ree suldad guin, dxel gudēd reeman loj stibcwaa reeman. Chi bidxin reeman ro' portguiib ni rarii runejz guin, dxel xtijbzan bixal abi' barii reeman. Abi' chi bidxin reeman tijb xquin, yagaj basa'n anjl guin Bēd. <sup>11</sup> Dxel gogbee Bēd guial ni diidxliqui naj ni cazajcaman, abi' rēbaman:

—Yanri ma ragbeen guial guxhaal xi anjl Dios persi babēēman naj loj Herodes, con loj gra ni nūjnnē ree bēn Israel naj.

<sup>12</sup> Chi bayagbee Bēd ni guzacaman, dxel baguiajman lidx Li, xniaa Waj, bēn la gajc Marcw, lod riga' zien ree bejn cabejdx canab reeman Dios.

<sup>13</sup> Chi gulajw Bēd ro' port, dxel brii tijb biin la Rode ziquiaam chunin. <sup>14</sup> Per chi bayūnbeem cha' Bēd, dād babaam, dxel luar nixhialim ro' port guin, baxūūnm bicojnm guial za' Bēd ro' port guin.

<sup>15</sup> Abi' rēb reeman lojman:

—¡Rajc guijquil!

Per za'dxi'chczim guial waliqui ni rëbim. Dxel rëb reeman lojm:

—Ad laataman, wed xi anjlaman.

<sup>16</sup> Per Bëd cabajwzi cabajwaman ro' port guin. Dxel chi guxhal reeman dád bidxeb reeman baguiaa reeman laaman. <sup>17</sup> Abi' been Bëd sen loj reeman din yacwëëz ro' reeman, dxel beman diidx xhienaag babëë Dios laaman ladxguiib. Abi' rëbaman loj reeman:

—Gol be ni guie loj Jacob në loj gra ree bën rliidx Jesucrist.

Dxelri briiman yagaj zëman lood ren.

<sup>18</sup> Chi bareguiaal, ad radxejlt xhie güün ree suldad guin guial ad ragbeet reeman xhienaag barii Bëd ladxguiib guin. <sup>19</sup> Dxel gunabee Herodes chigdiil reeman Bëd, per ad badxejlt reeman laaman. Abi' chi gulox gunabdiidx Herodes loj ree suldad guin xhienaag gojc, gunabeeman gugüjt reeman laa reeman. Dxel bii Herodes Judea abi' bisobaman luguiedx Cesarea.

### *Güjt rey Herodes*

<sup>20</sup> Balen Herodes bën Tiro në ree bën Sidón, per baya'n ree bën guin diidx din chigdeenë reeman laaman. Chi been reeman gan guneenë reeman bën bii laj Blasto zagdxe, tijb bën naj xbejn rey Herodes, dxel gunee Blasto por laa reeman loj rey guin din lox til reeman, din guidibczi lod rniabee rey guin zëed ni raw reeman. <sup>21</sup> Bazuj Herodes xhie dxej guinieenëman laa reeman abi' dxej zii gojt xab zagdxieman, gurej loj xyagxhilaman lod

rniabeeman, zianz guzuloj guneenëman laa reeman. <sup>22</sup> Dxel guzuloj gurixdiaj ree bén guin, rëb reeman:

—¡Ad bejntan canee, tijb diosan!

<sup>23</sup> Loj hor zii gajc badëë tijb xi anjl Dios tijb guialguijdx loj Herodes. Gudaw bizog laaman abi' güjtaman guial bayuladxaman baza't ree bejn laaman zagdxë luar nuza't reeman Dios zagdxë.

<sup>24</sup> Per xtiidx Dios care'chzi care'chan gra ladzci abi' gra ladzci cayajcxhiey ree bén rliladx laaman.

<sup>25</sup> Chi ma badëëd ree Bernabé con Saulo ni guxhaal ree bén Antioquía, dxel baza reeman Jerusalén, binë reeman Waj, bén la gajc Marcw.

## 13

### *Guzuloj Bernabé con Saulo bigtie'ch reeman xtiidx Dios*

<sup>1</sup> Loj ree bén rliladx Jesucrist, bén zojb ree Antioquía, no'ch ree bén rudëëd xtiidx Dios loj ree bejn në ree bén rulüü xtiidxaman. La reeman Bernabé, Simón bén rniee reeman Benya's, Lucio bén Cirene, Saulo con Manaén bén guni'snë Herodes tijbzi, bén gunabee Galilea. <sup>2</sup> Tijb dxej chi naba'n reeman, la'tgaj cabejdx canab reeman cuza't tëë reeman Dios zagdxë, rëb xSprijt Dios loj reeman:

—Gol bacaabee Bernabé në Saulo din güün reeman dxiin rënan güün reeman.

<sup>3</sup> Chi gulox guba'n reeman gurejdx tëë reeman Dios, dxel guxhoob yaa reeman guiyc Bernabé con Saulo din gagnë Dios laa reeman abi' bazaadi-dxnë reeman laa reeman.

### *Bernabé con Saulo wej reeman Chipre*

<sup>4</sup> XSprijt Dios naj bén guxhaal Bernabé con Saulo, zé reeman Seleucia, ni guyu reeman loj barcw, zé reeman yuj la Chipre, ni riga' loj nijsdoo. <sup>5</sup> Chi bidxin reeman niz Chipre, dxel luguedx Salamina guzuloj gutie'ch reeman xtiidx Dios lén ree xyadoo ree bén Israel. Nē Waj binē reeman din güünman laa reeman yudar. <sup>6</sup> Chi biza reeman guidib niz Chipre, dxel bidxin reeman Pafos. Ni bidxaagloj reeman tijb bén Israel laman Barjesús, rajcaman guialbidxaa, rusquieeman bejn ree, rēbaman guial laaman naj bén rudëed xtiidx Dios loj ree bejn. <sup>7</sup> Barjesús guin rnieenēman Sergio Paulo zagdxe, bén naj gobernador Chipre, rignia' da'taman. Gurejdx gobernador guin Bernabé con Saulo guial rēnman gucaagdiajgaman xtiidx Dios. <sup>8</sup> Per bēnbidxaa guin (con diidx grieg laman Elimas) guyēnman nudxoonman guial nililadx Sergio Paulo xtiidx Dios. <sup>9</sup> Abi' Saulo, bén la gajc Pab, rniabee xSprijt Dios luxdooman guidiblagaa, baguiaadxijchaman loj bēnbidxaa guin, <sup>10</sup> rēbaman:

—¡Xi'n xindxab lüj, ganax rusquieel, ganax niguijdx rüjnl, ad rēntczil ni zagdxe! ¿Xt goc gudëel mod chinal ree bejn xnejz nali Dios? <sup>11</sup> Yan gudëed Dios lüj casti: ad zanit lojl abi' xchej ad zuguaatil xbacha' gubijdx.

Loj hor zii gajc gurexcajy Elimas abi' ad gojctri nuguaaman, dxel raguiilaman chu guiniaaz yaaman guial ad rajctri ruguaaman. <sup>12</sup> Chi baguiaa gobernador guin zian, dxel bililadxaman abi' dád badxa lojman ni balüü reeman xcwent Dad Jesús.

*Bidxin Pab con Bernabé niz Pisidia*

<sup>13</sup> Chi ma gudëd gojc zian, guyu Pab con ree xcompniaraman loj barcw luguiedx Pafos abi' zë reeman luguiedx Perge ni riga' niz Panflia. Ni basa'n Waj laa reeman bayejcaman Jerusalén.

<sup>14</sup> Dxel barii reeman guiedx Perge, zë reeman luguiedx Antioquía ni riga' niz Pisidia. Abi' dxej raziiladx ree bën Israel, guyu reeman lën xyadoo ree bën Israel zianz gurej reeman. <sup>15</sup> Dxel chi gulox biil bën biil tib lajt loj libr bacaa Moisejs në loj libr bacaa ree bën badëë xtiidx Dios loj ree bejn, gunee ree bën rniabee lën yadoo guin, rëb reeman loj Pab con Bernabé:

—Bal xhie guiëbidi loj ree bën riga' guie din gudëëdi consejw loj reeman, zajc guiëbidan yan.

<sup>16</sup> Dxel guzuli Pab, beenman sen loj reeman din yacwëöz ro' reeman, dxel rëbaman:

—Bën Israel, në gra ree bën rdxeb Dios, gol bacaagdiajg: <sup>17</sup> Dux Dios ree, nayajc ree bën Israel, gulejman dux bëngulal ree abi' laaman been persi gojcxhiey reeman, chi sta zobj reeman zi'c benzit niz Egipto. Dxel con xguialrniabeeman babëëman laa reeman Egipto. <sup>18</sup> Abi' baslejnguijcaman laa reeman loj tiuu ijz ni guzu reeman niz lod naj ganax yujbidx, <sup>19</sup> baniyt tëëman gajdx ree nacion ni gure Canaán persi badëëman guidxliuj guin ree loj dux bëngulal ree. <sup>20</sup> Zian gojc loj tajp gayuu garol ijz, dxelri bacaabee Dios juejs ree persi gunabee reeman laa reeman. Abi' Samuel bën badëëd xtiidx Dios loj ree bejn gojc xjuejs bigra reeman. <sup>21</sup> Dxel gunab reeman din chu' tijb rey nabee laa reeman, abi' bazuj Dios rey Saúl xi'n Cis, bën zëed loj xdiaa Benjamín persi gunabeeman laa reeman tiuu ijz. <sup>22</sup> Chi bisüd Dios rey Saúl, dxel bazujman



rey Davi. Abi' rëbaman: “Ma baguian guial Davi xi'n Isai, nabanx zi'c rënan, güün tëex cumplid da diidxan guial güünx gra zi'c rënan.” <sup>23</sup> Abi' yan zi'c gajczi rëb Dios, loj gajc xdiaa rey Davi, brii Jesús bën guxhaalaman dïn yabëëman bën Israel ree loj dol. <sup>24</sup> Chi gad Jesús gui't, Waj bën baroobnijs bejn ree, bagojnman gra ree bën Israel guial rayal yayüjn reeman xgab por xtol reeman tiobnijs tëe reeman. <sup>25</sup> Chi ma zidyob yadiblagaa xguialnaban Waj, dxel rëbaman: “Ad najtan bën naladxidi, qui gui'traman, laaman mazri lasajc guial lon, ni'quid rayalt gaxhiecan xgurëchaman.”

<sup>26</sup> Yan, dugra ree nayajc ree xdiaa Abraham në gra los demazri ree bën rdxeb Dios, par dunuj ree naj xtiidxaman ni rugojn reeman dunuj ree, xhienaag rabëë Jesucrist dunuj ree loj dol. <sup>27</sup> Per ree bën Jerusalén con ree xguxtis reeman ad bayagbeet reeman Jesús. Ad gogbee tëët reeman xhie rën guiëb xtiidx Dios ni bacaa ree bën badëed ree xtiidxaman loj ree bejn, ni rool reeman lën yadoo dxej raziiladx ree bejn, dxel laagajc reeman bagüjt Jesús, zian gojc cumplid ni ca loj xtiidx Dios. <sup>28</sup> Abi' majsi achetczi xtol Jesús guyu, per ni'czi zian rëb gajc reeman loj Pilato guial nabeeman guiëtaman. <sup>29</sup> Chi gulox been reeman gra zi'c ca loj xtiidx Dios xcwent Jesús, balet reeman laaman loj crüjz abi' baquie'ch reeman laaman. <sup>30</sup> Per Dios basban laaman, <sup>31</sup> dxel loj zien dxej balüülojman loj ree bën binë laaman chi briiman niz Galilea zëman Jerusalén, abi' yan laa reeman naj bën rníee por laaman loj ree bejn.

<sup>32</sup> Zeel caygojnman lëjt diidxza'c guin ree, guial

promejs been Dios loj ree dux béngulal ree, <sup>33</sup> ma beenman laan cumplid con dunuj ree guial zio'p ree loj xdiaa reeman. Beenman cumplid xtiidxaman chi basbanman Jesús zi'c ca loj Salmo barojp, lod rëb: “Lüj naj da xi'nan abi' diizd yan ma rajpil guialrniabee zi'cgajc naj.” <sup>34</sup> Dios rëb guial yasbanman Jesús abi' ad zaxint xcuerpaman zi'c gajczi ca loj xtiidx Dios lod rëb: “Naj gënle' lëjt zi'c benan promejs loj Davi.” <sup>35</sup> Abi' rëb tää stib lajt loj xtiidxaman: “Ad zatiëjbtıl xhin xcuerp xi'nl, bën naya nali.” <sup>36</sup> Yan diidxliczi diidx guin ree ad rnieet reen xcwent Davi, din chi gulox gunabeeman bejn ree xtiampaman zi'c rëb Dios nabeeman, dxel güjtaman, biguie'chaman abi' guxin xcuerpaman. <sup>37</sup> Per xcuerp Jesús bën basban Dios, ad guxintan. <sup>38</sup> Zeel caygojnan lëjt compniar din gagbeedi guial por laaman ma yu' perdon par dux tol ree. <sup>39</sup> Graczi bën rililadx Jesucrist ma gojc perdon gra xtol reeman ni ad gojct niajc perdon por ley badëë Dios loj Moisejs. <sup>40</sup> Zeel gol gojp cudad chitëë saquidi zi'c bacaa ree bën badëë xtiidx Dios loj ree bejn, lod rëb:

<sup>41</sup> Gol bacaagdiajg, lëjt bën ruze' ree da diidxan, gol badxalojdi gol gunidloj tää.

Din loj ree dxej nabandi gën reen ni xt ni'quid zaliladxtidi,

majsi chu na laa reen lojdi.

<sup>42</sup> Chi barii Pab con Bernabé lën xyadoo ree bën Israel guin, gunab reeman favor loj Pab, din chi guidxin stijb dxej raziiladx ree bejn chiguieman mazri diidx loj reeman xcwent ni beman dxej zii.

<sup>43</sup> Chi barii ree bën guin lën yado guin, zien da't

reeman binal Pab con Bernabé, zi'c ree bén Israel zi'c ree bén ad najt bén Israel, bén rën ree Dios zi'cgajc ree bén Israel. Abi' rëb Pab con Bernabé loj reeman din sudxi'ch reeman loj nejz zagdxe guredx Dios laa reeman guial rënman laa reeman.

<sup>44</sup> Chi bidxin dxej ni raziiladx ree bejn, gra bén luguiedx guin bado'p din gucaagdiajg reeman xtiidx Dios. <sup>45</sup> Per chi baguiaa ree bén Israel zien da't ree bejn riga' yagaj, dxel guyu guialnadëdloj luxdoo reeman abi' guzuloj caneeguijdx reeman canee tëë reeman diidxguijdx loj Pab. <sup>46</sup> Dxel sin guialrdxeb badxi' Paban con Bernabé loj reeman, rëb reeman:

—Yaloj lëjt rayal yagojnan xtiidxza'c Dios, lëjt najdi bén Israel, per yan ad rëntidi gucaagdiajguidi laan, dxel lëjt gajc culüü guial ad zajct yayalidi guialnaban tiblayaa con Dios. Yan ma yugtie'chan diidxza'c guin ree loj ree bén ad najt bén Israel.

<sup>47</sup> Din zian gunabee dux Dad ree Dios dunujn, chi rëbaman tib lajt loj xtiidxaman:

Nuzun lüj zi'c guij par gra ree nacion,  
din chel guidibchicniaa loj guidxliuj chicojnl  
xhienaag gac ree bejn perdon.

<sup>48</sup> Chi biguiejn ree bén ad najt bén Israel zian, dxel babaa reeman, guzuloj rëb reeman guial zagdxe naj xtiidx Dios, abi' graczi bén ma naj yayal guialnaban tiblayaa con Dios, bililadx reeman xtiidxaman. <sup>49</sup> Zianan zeel bire'ch xtiidxza'c Dios guidib niz ni. <sup>50</sup> Per ree bén Israel batiaalguiiw reeman béngunaa rej ree laydoo zianczi naj tëë reeman bén zobjloj luguiedx zii, në ree xinguaaaw naj gajc xin zobjloj, din sunal reeman Pab con Bernabé xt yabëë reeman laa reeman ni. <sup>51</sup> Dxel

Pab con Bernabé gudxijp guxyuj guia' reeman zi'c tijb sen guial ad bazoobt ree bèn guin diidx, dxel zè reeman Iconio. <sup>52</sup> Per ree bèn bililadx Jesús niz ni, ma rniabee xSprijt Dios luxdoo reeman guidiblagaa abi' dád rabaa reeman.

## 14

### *Bidxin Pab con Bernabé Iconio*

<sup>1</sup> Luguiedx Iconio, Pab con Bernabé guyu reeman lèn xyadoo ree bèn Israel. Abi' zi'c balüü reeman xtiidxza'c Jesucrist, zien da't reeman bililadx, zi'c ree bèn Israel zi'c ree bèn ad najt bèn Israel. <sup>2</sup> Per ree bèn Israel ad bililadxt bati-aalguiiw reeman bèn ad najt ree bèn Israel persi guzuloj been reeman xgab mal por ree bèn rliladx Jesucrist. <sup>3</sup> Per ni'czi zian, xchej da't guzuj ree apóstoles guin ni, abi' sin guialrdxeb gunee reeman xtiidx Dios guial rliladx reeman Jesucrist, laaman badëéd guialrniabee loj reeman persi been reeman zien da't ree milagr nē mazri ree ni ren, persi balüü Jesucrist guial diidxli naj ni rēb reeman xcwent Dios. <sup>4</sup> Per ree bèn luguiedx zii gojc reeman tio'p lala', garol reeman guzunē ree bèn Israel zagarol reeman guzunē apóstoles guin ree. <sup>5</sup> Dxel zi'c ree bèn Israel zi'c ree bèn ad najt bèn Israel, baya'n reeman diidx con ree guxtis din tilē reeman Pab con Bernabé gucaaguiaj tēē reeman laa reeman. <sup>6</sup> Abi' chi gogbee Pab con Bernabé zian, laa zia gajc reeman Listra con Derbe, guiedx riga' ree niz Licaonia, nē gra ree guiedx riga' niz ni, <sup>7</sup> gunee reeman xtiidxza'c Jesucrist.

### *Bacaaguiaj reeman Pab Listra*

<sup>8</sup> Luguiedx Listra guyu tijb xinguaaaw ad rajct rza, ad guzatzcizx guial naxin guia'x diizd chi golix abi' zobjix <sup>9</sup> cucaagdiajguix ni rëb Pab. Chi baguiaa Pab laax, gogbeeman guial rliladxix par yayajquix. <sup>10</sup> Abi' guneeman rejs, rëbaman:

—¡Bisu, guzuli zagdxe!

Loj hor zii gajc gutiajs xin guin, guzulix abi' guzuloj cazax. <sup>11</sup> Chi baguiaa ree bejn ni been Pab, guzuloj canee reeman rejs diidx Licaonia, rëb reeman:

—Dios naj ree zi'c bejn ma biguiajt lod nadxu' ree.

<sup>12</sup> Abi' rëb reeman guial Bernabé naj dios Júpiter, guiáad Pab naj dios Mercurio guial laaman naj bën rniee loj reeman. <sup>13</sup> Abi' ro' guiedx guin niz lod ru bejn naj xyadoo Júpiter, dxel bixhioz yu' lën yadoo guin binëman go'n ree con ree guiaa, abi' laaman con ree bën guin guyën reeman nugüjt reeman go'n guin ree din niën reeman apóstoles guin ree zi'c xdios reeman. <sup>14</sup> Per chi gogbee Pab con Bernabé zian, gudixya' xab reeman, guzëëb reeman lad ree bën guin, rbixdiaj reeman rëb reeman:

<sup>15</sup> —Gol bacaagdiajg, ¿chexquiza zeel rüjndi zian, awa bejn gajc dunujn zi'cgajc lëjt? Awa par zian-clan zio'pan din yanan lojdi din yasa'ndi ni rüjndi, din achetczi lasajc reen. Mejrli gol binal xnejz Dios naban, bën been xanyabaa në guidxliuj nëtëë nijsdoo con gra ni yu' loj reen. <sup>16</sup> Tiamp gulal Dios baslaa been ree bejn ni guyëntzi reeman. <sup>17</sup> Per ni'czi zian, zianczi balüüman chu najman por ree ni zagdxe ni rüjnman. Din laaman naj bën razaladx guia con guialnaza'c abi' razaladxaman ni radaaw

ree din chu' du luxdoo ree zagdx. <sup>18</sup> Chi rëb Pab con Bernabé zian, con ree diidx guin penz been reeman gan badxoon reeman guial nugüjt ree bën guin go'n guin ree din niën reeman laa reeman zi'c xdios reeman.

<sup>19</sup> Per bëlzi ree bën Israel zojb Antioquía në Iconio, chi bidxin reeman luguiedx Listra been reeman gan batiaalguiiw reeman bën luguiedx guin ree. Dxel bacaaguaiaj reeman Pab abi' gunaladx reeman ma güjtaman abi' guxoobyuj reeman laaman, babëë reeman laaman luguiedx guin. <sup>20</sup> Per chi bido'p ree bën rliladx Jesucrist gadëd lod naga'man, dxel bixchewan, bayuman luguiedx guin stijb. Chi bareguiaal briinëman Bernabé zë reeman luguiedx Derbe.

<sup>21</sup> Chi gulox gutie'ch reeman xtiidxza'c Jesucrist luguiedx Derbe lod been reeman gan bililadx zien ree bejn laan, dxel bayejc reeman luguiedx Listra në Iconio nëtëë Antioquía. <sup>22</sup> Luguiedx zii ree badxe' reeman luxdoo ree bën rliladx Jesucrist. Rëb reeman loj reeman din sudxi'ch reeman loj ni rliladx reeman laaman, din dád sagdiaj reeman din yayu reeman lod rniabee Dios. <sup>23</sup> Abi' tëë loj tijb gaj ree guiedx guin bacaabee reeman bengol nabee ree loj ree bën rliladx Jesucrist. Zianz chi gulox guba'n reeman gurejdx tëë reeman Dios, dxel basa'n reeman laa reeman con Dad Jesús bën ma bililadx reeman.

*Badxin ree Pab con Bernabé Antioquía ni riga' niz Siria*

<sup>24</sup> Chi baza ree Pab con Bernabé niz Pisidia, bidxin reeman niz Panfilia. <sup>25</sup> Abi' gunee reeman xtiidx Dios luguiedx Perge, dxel zë reeman guiedx

Atalia. <sup>26</sup> Ni guyu reeman loj barcw zë reeman Antioquía, luguiedx lod basa'n ree los demazri ree bën rliladx Jesucrist laa reeman con Dios din gagnëman Pab con Bernabé din guitie'ch reeman xtiidxaman. Abi' dxiin guin naj ni ma baloox reeman. <sup>27</sup> Dxel chi bidxin reeman Antioquía, bato'p reeman bën rliladx ree Jesucrist, persi be reeman diidx loj reeman gra ni been Dios con laa reeman, xhie tëë naag guxhalaman nejj din chililadx ree bën ad najt bën Israel Jesucrist. <sup>28</sup> Ni guzu Pab con Bernabé xchej, guzunë reeman bën Antioquía rliladx ree Jesucrist.

## 15

### *Guyu gabilt Jerusalén*

<sup>1</sup> Lën ree dxej zii bidxin bëlzi ree bën Judea luguiedx Antioquía. Abi' guzuloj rëb reeman loj ree bën rliladx Jesucrist, guial bal id zu reeman sen zi'c gunabee Moisejs, ad zajct güün Dios xtol reeman perdon. <sup>2</sup> Dxel Pab con Bernabé dád zro' gudijldiidx reeman con ree bën guin. Dxel bacaabee ree bën rliladx Jesús Pab në Bernabé, në ree ben ren din che reeman Jerusalén chigneenë reeman apóstoles guin ree, con ree bengol rniabee loj ree bën rliladx Jesucrist din guguaa reeman xhienaag güün reeman xcwent sen guin.

<sup>3</sup> Abi' badxe'nejz ree bën Antioquía rliladx ree Jesucrist laa reeman persi zë reeman. Chi zë reeman gudëd reeman niz Fenicia në niz Samaria abi' bagojn reeman bën rliladx ree Jesucrist, bën zobj ree niz ni guial ma rliladx ree bën ad najt ree bën Israel xtiidx Dios. Abi' graczi bën ma rliladx

Jesucrist niz ni, dád babaa reeman chi biguiejn reeman zian.

<sup>4</sup> Chi bidxin Pab con Bernabé Jerusalén, dxel baca' ree b́en rliadx Jesucrist laa reeman, con ree apóstoles, con ree bengol rniabee loj ree b́en rliadx Jesucrist. Abi' be ree Pab diidx con Bernabé gra ni been Dios con laa reeman. <sup>5</sup> Per yu' ree b́enfarisew ma rliadx Jesucrist, guzuli reeman abi' rēb reeman:

—B́en ad najt ree b́en Israel abi' ma rliadx reeman Jesucrist, rüjn naguiejn chu' reeman sen ru ree b́en Israel, gagbee tēē reeman guial rayal chinal reeman xley Moisejs.

<sup>6</sup> Dxel bado'p ree xi apóstoles Jesús con ree bengol rniabee loj ree b́en rliadx Jesucrist din guidoon xhienaag güün reeman. <sup>7</sup> Guial tant canee reeman por zian, dxel guzuli Béd, rēbaman loj reeman:

—Gradi compniar raliduladx ree Jesucrist, lējt ragbee guial diizd gocli gulej Dios naj lojdi din chignen xtiidxza'c Jesucrist loj ree b́en ad najt b́en Israel din chililadx reeman laaman. <sup>8</sup> Abi' Dios b́en nünbee luxdoo graczi ree bejn, balüüman guial naj reeman xbejnman guial ma badēēd xSprij-taman loj reeman zi'cgajc baneeman du loj ree. <sup>9</sup> Zi'c ruguiaa Dios dunuj ree ziangajc ruguiaaman laa reeman, din zi'c basiaman du luxdoo ree ziangajc basiaman luxdoo reeman guial ma rliadx reeman Jesucrist. <sup>10</sup> Yan, ¿chexc zeel ad ridxga'tidi ni ma been Dios abi'za rniabeedi chinal ree b́en rliadx Jesucrist ley ni ni'qui dunuj ree ni'qui dux b́engulal ree ad gojct naguieen ree zi'c rniabee ley guin? <sup>11</sup> Dunuj ree rayagbee guial por ni zagdxe ni



been Dad Jesucrist, been Dios dux tol ree perdon zi'cgajc laa reeman.

<sup>12</sup> Dxel bacwëez ro' gra reeman abi' bacaagdiajg reeman ni cayü ree Bernabé con Pab, xcwent gra ree xmilagr Dios ni been reeman loj ree bén ad najt bén Israel. <sup>13</sup> Chi gulox gunee reeman, dxel nëgajc Jacob rëb:

—Gradi compniar raliduladx ree Jesucrist, gol bacaagdiajg: <sup>14</sup> Simón Bëd be diidx duloj ree xhienaag guzuloj gulej Dios bén ad najt ree bén Israel din gac reeman xbejnman. <sup>15</sup> Gra ni ma gojc naj zi'c ni bacaa ree bén badëe xtiidx Dios loj ree bejn loj xtiidxaman lod rëb:

<sup>16</sup> Chi ma gojc zian,  
yayünxhiey ree da bejnman mazri zi'c goc chi naban Davi,  
gacxhiey reeman por ree bén sta naban,  
zi'c guban ree bejn xtiamp Davi  
abi' por laa reeman yayajcxhiey ree da bejnman.

<sup>17</sup> Din yaguiil ree los demazri ree bejn guial guiën reeman naj,  
gra ree bén nacion ren, yaguiil guial guiën reeman naj,  
bén ma gule reen din gac reeman da bejnman,  
bén guiguiejn ree guza't ree bejn naj.

<sup>18</sup> Zian na Dios, bén cugojn bejn ree gra ree nine diizd tiamp gulal.

<sup>19</sup> 'Zeel naladxan ad rayalt chu güün naguiejn bén ad najt ree bén Israel par chinal reeman ley, laa reeman guial ma basa'n xcostumbr reeman par chinal reeman xnejz Dios. <sup>20</sup> Yan con yaxhaal ree tijb gui'ch loj reeman guial ad rayalt gaw reeman ni ragle' loj ni naj xdios reeman, ad rayal tëët

sunë reeman ben ren bën ad najt lacheel reeman, ad rayalt gaw reeman bëel rberejn ni'qui rejn. <sup>21</sup> Zian yaguie'ch ree loj reeman, din diizd tiamp gulal tijb gaj guiedx yu' bën rulüü laa reeman xhie rën guiëb xley Moisejs ni rool reeman lën ree yadoo dxej raziiladx ree bejn.

<sup>22</sup> Dxel apóstoles guin ree con ree bengol rniabee loj ree bën rliladx Jesucrist, con los demazri ree bën rliladx Jesucrist, rëb reeman gucaabee reeman bën guixhiaalnë reeman Pab con Bernabé din che reeman Antioquía. Abi' bacaabee reeman Judas, bën la gajc Barsabás, në Silas, laa reeman rajp guialrniabee loj ree bën rliladx Jesucrist.

<sup>23</sup> Abi' guxhaalnë reeman laa reeman tijb gui'ch ni rëb:

“Dunujn nayajcan xi apóstoles Jesús, con ree bengol rniabee loj ree bën rliladx laaman, në los demazri ree bën rliladx laaman. Ragajpdiozan lëjt bën ad najt ree bën Israel, per nayajc ree compniar raliduladx ree Jesucrist, lëjt zojbidi Antioquía, në los demazri ree bën zojb ree niz Siria nëtëë niz Cilicia. <sup>24</sup> Ma bayagbeen guial yu' ree bën duladxan brii sin dux tiidxbeen, abi' cagu'nawëëg reeman lëjt con xtiidx reeman persi ad radxejlt xhie güüнди guial na reeman lojdi rayal chu'di sen ni ru ree bën Israel güün tēëdi zi'c rniabee xley Moisejs, per ad dunujtan baxhaal laa reeman.

<sup>25</sup> Zeel bado'pan abi' raguie'chan guial zagdxe naj yacaabee bëlzi dux compniaran din guidganaj reeman lëjt, guidnë tēë reeman tio'p dux compniaran, Bernabé con Pab, bën rayën da'tan. <sup>26</sup> Zien ree ni guiidx cuhaagloj reeman guial cayüjn reeman sirv loj Dad Jesucrist. <sup>27</sup> Dxel cayxhaalnë'n

laa reeman Judas con Silas, laa reeman na lojdi gra con quijb xtiidx reeman. <sup>28</sup> Abi' zi'c naj xgab bazaladx xSprijt Dios du lojn, dxel achetri naguiejn rüjn yanabeen lëjt ni güüнди, ni rayalzi cu'guijquidi naj guial, <sup>29</sup> ad gawidi xbëel ree be ni rbe'c ree bejn loj ni naj xdios reeman, ad gaw tëedi bëel rberejn, ni'qui rejn, ad sunëdi ben ren bën ad najt lacheelidi. Bal gapidi cudad ad züjntidi gra ree nine, zagdxequi güüнди. Gagnë Dios lëjt.”

<sup>30</sup> Zian gojcan, gui'ch guin naj ni guxhaalnë reeman guidap ree bën guin par luguiedx Antioquía. Ni bato'p reeman bën rliladx ree Jesucrist abi' bayü reeman gui'ch guin loj reeman. <sup>31</sup> Chi biil reeman laan, dád nix guyu luxdoo reeman por ree diidx zagdx ni zëed lojn. <sup>32</sup> Abi' Judas con Silas guial nëgajc reeman rajp quiarguiejn par gudëed reeman xtiidx Dios, dxel zien naj ni guneenë reeman bën rliladx ree Jesucrist, bagu' reeman luxdoo reeman con xtiidx reeman. <sup>33</sup> Chi ma gudëd zien dxej za' ree Judas con Silas ni, bazaadiidxnë ree bën rliladx Jesucrist laa reeman din yaguiaj reeman lod za' ree bën guxhaal laa reeman, rëb reeman loj reeman: “Chignë Dios lëjt zagdx.” <sup>34</sup> Per Silas beenman xgab baya'nman ni mazri. <sup>35</sup> Abi' Pab con Bernabé baya'n reeman Antioquía mazri, laa reeman con ree ben ren basnuu balüü reeman gutie'ch tëe reeman xtiidxza'c Jesucrist loj ree bejn ni.

*Ni barojp volt brii Pab biglüüman xtiidx Dios guiedx ren ree*

<sup>36</sup> Chi gudëd tio'p choon dxej, dxel rëb Pab loj Bernabé:

—Yo' stijb yugnaj dux compniar ree b́en rliładx ree Jesucrist, graczi ree luguiedx lod ma bugtie'ch xtiidx Dios, din yuquiaa xhienaag za' reeman.

<sup>37</sup> Bernabé guyèn ninè reeman Waj, b́en la gajc Marcw. <sup>38</sup> Per Pab ad cwějbt ninè reeman laaman, din chi we reeman niz Panfilia guro'nładxaman laa reeman, ad binëtraman laa reeman. <sup>39</sup> Abi' ni'qui tijbaman ni'qui zatijbaman ad baya'nt conform, zianz gula' lasa' reeman. Dxel binè Bernabé Marcw, guyu reeman loj barcw zè reeman yuj la Chipre ni riga' loj nijsdoo, <sup>40</sup> dxel gulej Pab Silas din chinëman laaman abi' rëb los demazri ree b́en rliładx Jesucrist loj reeman guial chinè Dios laa reeman zagdx. <sup>41</sup> Zianz gudëd reeman niz Siria nē niz Cilicia, ragu' reeman luxdoo ree b́en rliładx Jesucrist niz ni.

## 16

### *Bine ree Pab con Silas Timoteo*

<sup>1</sup> Chi bidxin Pab con Silas guiedx Derbe nē guiedx Listra abi' Listra bidxaagloj reeman tijb b́en rliładx Jesucrist, laman Timoteo, xniaaman naj b́en Israel, nëman rliładx Jesucrist guiáad xdadaman naj b́en grieg. <sup>2</sup> Graczi ree b́en rliładx Jesucrist, b́en zojb ree guiedx Listra nē Iconio ruza't laaman zagdx. <sup>3</sup> Dxel rëb Pab chinëman Timoteo, per yaloj badxe'man laaman sen ni ru ree b́en Israel, chitëë xhie guiëb ree b́en Israel riga' niz ni, din gra reeman ragbee guial naj xDadaman b́en grieg. <sup>4</sup> Graczi ree guiedx ni gudëd reeman bagojn reeman b́en rliładx ree Jesucrist ni rayal güün reeman zi'c ma rëb ree apóstoles, con ree bengol rniabee loj ree b́en rliładx laaman

Jerusalén. <sup>5</sup> Zianan zeel guzudxi'ch ree bén niz ni loj guialrliladx reeman Jesucrist, abi' guixie guixie gojcxhiey mazri ree bén rliladx laaman.

*Balüüloj tijb bén Macedonia loj Pab*

<sup>6</sup> Chi ma gojc zian ad baslaat xSprijt Jesús nignee reeman xtiidx Dios niz Asia. Dxel gudëdzinejz reeman niz Frigia në niz Galacia <sup>7</sup> abi' bidxin reeman niz Misia. Ni been reeman xgab nej reeman niz Bitinia, per ad cwëjb gajct xSprijt Dios nej reeman niz ni. <sup>8</sup> Dxelri gudëdzinejz reeman niz Misia, bidxin reeman guiedx Troas. <sup>9</sup> Yagaj, gux-hinzii guzajc Pab zi'c rulüü cane'xhchaalaman. Baguiaaman tijb xinguaaaw zëed niz Macedonia, za'lix rzajquix liaadx loj Pab, rëbix:

—Guda niz Macedonia, taguieen dunujn yudar.

<sup>10</sup> Guloxzi baguiaa Pab zian, laa baguieen gajcan porvinid din yo'n niz Macedonia guial bayagbeen Diosan naj bén cabejdx dunujn niz ni par yatie'chan xtiidxza'c Jesucrist.

*Bidxin ree Pab con Silas Filipos*

<sup>11</sup> Badxu'n loj barcw luguiedx Troas abi' bio'n naliduu Samotracia. Chi bareguiaal badxinan guiedx Neápolis. <sup>12</sup> Yagaj badxoon bio'n Filipos, guiedx mazri zobjloj niz Macedonia, per Rom rniabee guiedx zii, ni badxu'n bëlzi ree dxej. <sup>13</sup> Abi' tijb dxej raziiladx ree bejn, bariin luguiedx guin bio'n tijb ruguiiwro', lod rayagbeen rado'p ree bén Israel par cwedx reeman Dios. Abi' badxu'n baneen xtiidxza'c Jesucrist loj ree béngunaa bado'p yagaj. <sup>14</sup> Tijb ree béngunaa guin la Lidia, najman bén Tiatira, ruto'man lajd zagdxe ni culor murad. Diidxli rdxebaman Dios abi' cucaagdiajgaman.

Dios guxhal xquiarguejnman din gucaagdiajgaman zagdxre gra ni rëb Pab. <sup>15</sup> Abi' gurobnijsaman con gra xfamilaman. Dxel gunabaman favor du lojn, naman:

—Bal walidi rliladxidi guial ma rliladxan Jesucrist, gol baya'n lidxan.

Dxel beenman naguiejn baya'n nan lidxaman.

<sup>16</sup> Dxel tib volt, chi zio'n lod rej ree bejn par cwedx guiniab reeman Dios, badxaaglojn tijb biingunaa, yu' xindxab luxdoom, abi' por xguialrniabee xindxab guin rnieeya'm guiáad ree bën guzii laam dád zro' milia rüjn reeman gan por dxiin guin. <sup>17</sup> Dxel bidnalim Pab con dunujn, rbidxa'm rëbim:

—Bën guie ree rüjn xchiin Dios yu' xanyabaa, laa reeman gugojn lëjt xhienaag gaquidi perdon.

<sup>18</sup> Zien dxej da't beenm zian, xt chi balenya' Pab, dxel bayejcaman rëbaman loj xindxab yu' luxdoom:

—Por xguialrniabee Jesucrist, rniabeen lüj din yariil luxdoo biin guie.

Loj hor zii gajc barii xindxab guin luxdoom.

<sup>19</sup> Per chi gogbee ree bën guzii laam guial ad zjectri güünm gan milia par laa reeman, dxel gunaaz reeman Pab con Silas, binë reeman laa reeman roylay loj guxtis. <sup>20</sup> Chi bayü reeman laa reeman loj ree guxtis guin, rëb reeman:

—Xin Israel guie ree rbëë reex wadijl du ladx ree, <sup>21</sup> abi' rulüü reex costumbr ree ni ad zatiëëbt ree yaguieen ree ad zajc tëët yaguieen ree, din ben Rom dunuj ree.

<sup>22</sup> Dxel wajs gra ree bën guin contr laa reeman, abi' gunabee ree guxtis guin gulëë xab

Pab con Silas din quin reeman laa reeman con var. <sup>23</sup> Chi gulox gudijn da't reeman laa reeman, dxel bilu' reeman laa reeman ladxguiib abi' gunabee reeman bén rajp ro' ladxguiib guin din gapdxi'chaman laa reeman. <sup>24</sup> Chi biguiejn bén rajp ro' ladxguiib guin zian, dxel bilu'man laa reeman xt lén cuart bigra yu' lén ladxguiib guin, guxhiiman guia' reeman loj tabl naal con caden.

<sup>25</sup> Per garol guiaal, la'tgaj cabejdx canab Pab con Silas Dios, cayool tée reeman cant par laaman, dxel cucaagdiajg los demazri ree bén yu' ladxguiib guin. <sup>26</sup> Dxel tijbzi golp guzuloj xudoxh, niz ni niz guie rurliá xcimiant ladxguiib guin. Loj hor zii gajc bixal gra ree xportan abi' baxiec ree caden naxii gra ree bén yu' lénan. <sup>27</sup> Chi baban bén rajp ro' ladxguiib guin abi' baguiaaman zojbyal gra ree xportan, gulée xi espadaman din nugýt laagajcaman guial gunaladxaman gra ree bén yu' ladxguiib guin ma baxüün. <sup>28</sup> Dxel gurixdiaj Pab, rëbaman lojman:

—Ad güünnaa lüj gajc, laa dugran nadxu' guie.

<sup>29</sup> Laa gunab gajc bén guin tijb guij, dxel ruxüünman guyuman, rnijman guial rdxebaman, bigzuxibaman loj Pab në loj Silas. <sup>30</sup> Dxel babëëman laa reeman, gunabdiidxaman loj reeman, rëbaman:

—Dad, gol guna, ¿xhie rayal günan din güün Dios naj perdon?

<sup>31</sup> Badxi' reeman laan, rëb reeman:

—Bililadx Dad Jesucrist, zian gaquil perdon con xfamilil.

<sup>32</sup> Abi' be reeman xtiidx Dios lojman con loj gra ree bén zojb lidxaman. <sup>33</sup> Zianz guxhin

zii gajc gudiibaman lod nadxeelguijdx reeman, dxel gurobnijsaman con gra xfamilaman. <sup>34</sup> Abi' bignëman laa reeman lidxaman, dxel badëëman ni gudaw reeman. Guiáad laaman dád nix yu' luxdooan con gra xfamilaman Guial ma rliladx reeman Dios.

<sup>35</sup> Chi bareguiaal, guxhaal ree guxtis guin suldad ree persi biguiedx reeman loj bën rajp ro' ladxguiib guin guial guslaaman Pab con Silas.

<sup>36</sup> Abi' rëb bën rajp ro' ladxguiib guin loj Pab:

—Ma na ree guxtis guial guslaan lëjt. Yan ma zajc yaguiajdi ad chu'di xgab.

<sup>37</sup> Per rëb Pab loj ree suldad guin:

—Nayajcan quijb ben Rom abi' gudijn reeman dunujn delant loj ree bën guiedx, ni'quid ba-neet reeman mod nadëëdan cwent loj reeman con badxe' reeman dunujn ladxguiib. Abi' yan, ¿guslaa reeman dunujn ralan ya? ¡Ad zajctan zian! Gui't quijb laa reeman guidgalëë reeman dunujn.

<sup>38</sup> Abi' bicojn ree suldad guin guxtis guin ree zian, dxel dád bidxeb reeman chi biguiejn reeman guial ben Rom naj Pab con Silas. <sup>39</sup> Dxel wej reeman bignab reeman perdon loj Pab con Silas babëë tëë reeman laa reeman, rëb reeman loj reeman din yaza reeman luguiedx guin. <sup>40</sup> Chi barii reeman ladxguiib, wej reeman lidx Lidia. Zianz chi gulox guneenë reeman los demazri ree bën rliladx ree Jesucrist din chu' luxdoo reeman sudxi'ch reeman loj ni rliladx reeman, dxel baza reeman.

## 17

*Bidxin ree Pab con Silas Tesalónica*



<sup>1</sup> Chi zë Pab con Silas, gudëd reeman niz Anfípolis në niz Apolonia zianz bidxin reeman luguiedx Tesalónica lod yu' tijb xyadoo ree bén Israel. <sup>2</sup> Abi' zi'c goc xcostumbr Pab, wejman lën yadoo guin, choon dxej raziiladx ree bejn. Wejman bigneenëman laa reeman xtiidx Dios. <sup>3</sup> Bagojnman balüü tēëman laa reeman loj xtiidx Dios lod rëb guial naj sagdiaj Cristo, abi' chi ma güjtaman yabanman stijb. Rëbaman loj reeman:

—Jesús ruzat gajcan lojdi, laagajcaman naj Cristo din yabëëman dunuj ree loj dol.

<sup>4</sup> Yu' ree bén Israel guin bililadx abi' bachajg reeman Pab con Silas. Në zien ree bén grieg rën Dios bililadx, nētēë zien ree béngunaa zojbloj bililadx Jesús. <sup>5</sup> Per ree bén Israel ad bililadxt Jesucrist, gudëdloj reeman abi' bato'p reeman benmal ziza ree lunejz persi gulëë reeman wadijl luguiedx guin, abi' guyu reeman lidx Jasón, raguiil reeman Pab con Silas din cwëë reeman laa reeman guzuj reeman laa reeman loj ree bén guiedx guin. <sup>6</sup> Per guial ad badxejlt reeman laa reeman yagaj, dxel guxoobyuj reeman Jasón në ree ben ren bén rililadx Jesucrist, binë reeman laa reeman loj guxtis, rbixdiaj reeman, rëb reeman:

—Tio'p ree xin cabëë wadijl guidib guidxliuj, ma bi't reex guie, <sup>7</sup> abi' lidx Jasón zojbe reex. Laa reex con gra ree bén nuchajg laa reex, ad cayüjnt reex zi'c rniabee xley rey César, din rëb reex guial yu' zatijb rey la Jesús.

<sup>8</sup> Chi biguiejn ree guxtis guin zian con ree bejn, gra loj xgab been reeman. <sup>9</sup> Per Jasón con los demazri ree bén guyu ladxguiib guin gudijx ree-

man loj ree guxtis guin, dxel baslaa reeman laa reeman.

### *Bidxin Pab con Silas Berea*

<sup>10</sup> Guxhinzii gajc, guxhaal ree b́en rlliladx Jesucrist Pab con Silas luguiedx Berea. Chi bidxin reeman ni, wej reeman ĺen xyadoo ree b́en Israel. <sup>11</sup> Mazri benza'c naj ree b́en Israel guin guial loj ree b́en Israel zobj Tesalónica. Con gan bacaagdi-ajg reeman ni ŕeb Pab. Abi' guixie guixie rusiid reeman xtiidx Dios, din gagbee reeman waliqui ni ŕeb Pab ya. <sup>12</sup> Zeel dád zien reeman bililadx Jesucrist, ńet́ée zien b́en grieg bililadx laaman zi'c ree xinguaaw zi'c ree b́engunaa zobjloj niz ni. <sup>13</sup> Chi gogbee ree b́en Israel zobj Tesalónica guial catie'ch Pab xtiidx Dios luguiedx Berea, dxel wej reeman ni bigtiaalguiiw reeman bejn ree din guidxe'ch reeman Pab. <sup>14</sup> Per ree b́en rlliladx Jesucrist ad goglaat reeman, laa guxhaal gajc reeman Pab niz ro' nijsdoo. Guíaad Silas con Timoteo baya'n reeman mazri Berea. <sup>15</sup> Abi' ree b́en biglu'nejz Pab, xt Atenas biné reeman laaman. Chi baza reeman ni, bigné reeman xruson Pab din diob che Silas con Timoteo chinal reeman laaman.

### *Bidxin Pab Atenas*

<sup>16</sup> La'tgaj cabéz Pab guidxin Silas con Timoteo luguiedx Atenas, guyunayaman guial baguaaaman zien da't ni rajp ree bejn niz ni zi'c dios. <sup>17</sup> Zeel wejman ĺen xyadoo ree b́en Israel bigneenéman laa reeman ńe los demazri ree b́en ŕen Dios zi'c ree b́en Israel, guixie guixie rnieenéman chut́éez b́en rdxaglojman niz galay guiedx guin. <sup>18</sup> Guneené t́éeman garol ree b́en

zinal ni balüü bën brii laj epicureo, nē za garol ree bën estoicos. Abi' yu' reeman rēb:

—¿Xhienin rníee xin guin zeel rníee da'tix?

Yu' tēē reeman rēb:

—Rulüü xtiidx dios ren ree bën ad naguieenbeet ree catie'chix.

Rēb reeman zian guial caneenē Pab laa reeman xtiidxza'c Jesucrist nē xcwent guial babanman stijb. <sup>19</sup> Dxel binē reeman Pab tijb luar la Areópago, lod rado'p reeman. Abi' gunabdiidx reeman lojman, rēb reeman:

—¿Zajc nal ya xhie ree nicüb guin zidgalüül niz guie? <sup>20</sup> Din rül diidx du lojn ni ad rayagbeetan, zeel rayēnan yayagbeen xhie rēn guiēban.

<sup>21</sup> Graczi ree bën Atenas, con los demazri ree benzit zojb ni, zianczi za' reeman zian. Ruladx reeman tēd reeman dxej, gucaagdiajg reeman o gü reeman ni naj ree nicüb.

<sup>22</sup> Dxel guzuli Pab galay reeman lod la Areópago, rēbaman:

—Bën Atenas, por graczi ni ma baguian, ma gogbeen guial dád zien ree xdiosidi. <sup>23</sup> Abi' chi zizaan ziquian luar lod rbejdxidi xdiosidi, badxejlan tijb luar lod ca ree diidx ni rēb: “Par Dios ad naguieenbeet ree.” Yan, Dios rbejdxidi sin guial ad nünbeetidi laaman, xtiidxaman naj ni zidguien lojdi.

<sup>24</sup> 'Dios guin been guidxliuj con graczi ni yu' lojn, laaman rniabee xanyabaa nē loj guidxliuj. Ad za'taman lēn yadoo ni rüjn ree bejn. <sup>25</sup> Ad riaadx tēētaman chu güün xhienin par laaman, din laaman naj bën razaladx bi nabajnnē' ree, laaman

razaladx guialnaban duloj ree në ree ni rayaadx ree.

<sup>26</sup> 'Por tijb bejn been Dios din chu' zienloj bejn loj guidxliuj din cwe reeman guidib loj guidxliuj. Abi' ma naj xhie tiamp guiban reeman ban tëë cwe reeman. <sup>27</sup> Din yaguuil reeman Dios majsi zi'c chi rgan bejn chi raguuilaman xhienin, zian güün reeman din yadxejlaman. Majsi diidxiczi ad zijtt za'man par gra bejn. <sup>28</sup> Din por Dios nabajn ree, por laaman raniib ree radxoo tëë ree, por laaman nadxu' ree loj guidxliuj. Zi'c rëb tëë ree xbénrignia'di, chi rëb reeman: "Dunuj ree nayajc xi'n Dios." <sup>29</sup> Zeel bal nayajc ree xi'n Dios, ad rayalt yaguieen ree xgab guial Dios najnë or, o plajt, o guiaj ya zi'c naj ni rüjn ree bejn zi'c naj xixgab reeman. <sup>30</sup> Tiamp gulal cwëjb Dios been ree bejn zi'c naladx reeman guial achetci ragbee reeman, per yan gra ladczi canabeeman gra ree bejn din yayüjn reeman xgab por xtol reeman. <sup>31</sup> Din Dios ma gulej tijb dxej ni yadëed ree bejn cwent lojman, dxej ni güün xguialguxtisaman. Ma gulej tëëman Jesucrist din güünman guialguxtis guin, abi' din guiguien guial gulejman laaman par zian, basbanman laaman chi gütaman.

<sup>32</sup> Chi biguiejn reeman rëb Pab guial baban Jesucrist loj ree bengüt, yu' reeman baze' laaman, yu' tëë reeman rëb:

—¡Zatijb dxej yasnuu yacaagdiajgan ni canal!

<sup>33</sup> Dxel baza Pab lod za' reeman. <sup>34</sup> Per yu' reeman bachajg laaman, abi' bililadx reeman xtiidx Dios. Loj reeman no'ch tijb bën zojbloj lën Areópago laman Dionisio, në stijb bégunaa la Dámaris në ree ben ren.

# 18

## *Bidxin Pab Corinto*

<sup>1</sup> Dxel brii Pab Atenas zëman Corinto. <sup>2</sup> Yagaj bidxaaglojman tijb bën Ponto laman Aquila, zëédaman diaa Israel. Aquila con xbéngunaaman Priscila qui bazari reeman niz Italia guial gunabee rey Claudio yarii gra ree bën Israel Rom. Dxel wej Pab bitixlojman laa reeman. <sup>3</sup> Abi' guial lasa'gajc dxiin ni rüjnman rüjn reeman, rüjnchaaw reeman guid ni rajc ree carp, dxel baya'nnëman laa reeman persi been reeman dxiin guin. <sup>4</sup> Abi' beegaj dxej raziiladx ree bën Israel, rej Pab rigneeman xtiidx Dios lën xyadoo ree bën Israel, zi'c ree bën naj ree bën Israel zi'c ree bën ad najt bën Israel raguuilaman mod din chililadx reeman ni rëbaman.

<sup>5</sup> Chi baza ree Silas con Timoteo niz Macedonia, bidxin reeman Corinto, dxel achetri ni ren been Pab, ganaxzi xtiidx Dios gunee man loj ree bejn, balüü tëëman bën Israel ree guial Jesús naj Cristo bën cabëz reeman. <sup>6</sup> Per guzuloj bidxe'ch reeman Pab abi' gunee reeman diidxguijdx contr laaman. Dxel gudxiip xabaman zi'c tijb sen guial ad ru-zoobt reeman diidx, abi' rëbaman loj reeman:

—Lëjt gajc rajp dol guial guizëëbidi delant loj Dios, ad najt ra'p dol. Diizd yan chiguien xtiidx Dios loj ree bën ad najt bën Israel.

<sup>7</sup> Dxel bariiman lën yadoo guin wejman lidx bën la Justo, rën bën zii Dios, gajxh gajc yadoo guin naj lidxaman. <sup>8</sup> Abi' Crispo, tijb bën rniabee lën xyadoo ree bën Israel, bililadxaman Dad Jesucrist con gra xfamilaman. Në zien ree bën Corinto bililadx chi biguiejn reeman xtiidx Jesucrist abi'

gurobnijs reeman. <sup>9</sup> Tijb guxhin balüüloj Dios loj Pab, rëbaman lojman:

—Ad rdxebil, basnuu gunee da diidxan, ad gucwëëzil, <sup>10</sup> naj za'në' lüj, achutczi zajc güün lüj xhienin, din luguiedx guie zien da't bejn naj par naj.

<sup>11</sup> Zianan zeel baya'n Pab Corinto tibijz garol, balüüman bën guin ree xtiidx Dios.

<sup>12</sup> Per chi goc Galión gobernador Acaya, bën Israel ree bachajg lasa' reeman persi gunaaz reeman Pab binë reeman laaman loj gobernador guin, <sup>13</sup> rëb reeman loj gobernador guin:

—Xin guie ziza cayüjnx gan bejn ree guial guiën reeman Dios zi'c tijb mod ni ad najt loj ley.

<sup>14</sup> Ma niniee Pab, chi gunee Galión rëbaman loj ree bën Israel guin:

—Bal niajcan tijb falt o tijb guialquia narooob beenman zeel zidnëdi laaman, züncwentan lëjt.

<sup>15</sup> Per najn por ree diidx në por laj ree bejn nëtëë por xleydi, zeel lëjt gajc gol gunaj xhienaag güüнди, ad rëntan günan guialguxtis xcwent ree ni guin.

<sup>16</sup> Abi' laa babëë gajcaman laa reeman roy-lay guin. <sup>17</sup> Dxel yagaj gajc gunaaz gra reeman Sóstenes, bën rniabee lën xyadoo ree bën Israel abi' gudijn reeman laaman, per ni'quid beencwëntt gobernador guin laa reeman.

### *Badxin Pab Antioquía*

<sup>18</sup> Zienri ree dxej baya'n Pab Corinto. Dxel bazaadiidx nëman los demazri ree bën rliladx Jesucrist, abi' bazanëman Priscila con Aquila, guyu reeman loj barcw zë reeman niz Siria. Per chi gad reeman grii Cencrea bagaj guiyc Pab, por tijb

promejs ni beenman. <sup>19</sup> Chi bidxin reeman Éfeso, ni basa'n Pab Priscila con Aquila, abi' wejman lèn xyadoo ree bèn Israel zojb ree ni, bigneenëman bèn Israel rado'p ree lèn yadoo guin. <sup>20</sup> Abi' guyën reeman niaglaa Pab ni mazri, per ad cwëjbtaman. <sup>21</sup> Rëbaman loj reeman:

—Ma yaya'n, bal gagnë Dios naj, guidganan lëjt stijb.

Dxel guyuman loj barcw bazaman Éfeso. <sup>22</sup> Chi bidxinman Cesarea, dxel wejman Jerusalén bica-jpdiozaman bèn rliladx ree Jesucrist, dxelri zëman Antioquía. <sup>23</sup> Chi ma gojc xchej za'man Antioquía, dxel briiman zatijb. Wejman tijb gaj ree guiedx riga' niz Galacia në niz Frigia, ragu'man luxdoo gra ree bèn rliladx Jesucrist.

### *Gutie'ch Apolos xtiidx Dios Éfeso*

<sup>24</sup> Tiamp zii bidxin tijb bèn Israel luguiedx Éfeso, laman Apolos, gojlaman Alejandría. Dád radxe-  
jlaman diidx par guinieeman abi' dád rajcaman xtiidx Dios. <sup>25</sup> Basiidaman xtiidx Dios, dxel con gan balüüman bejn ree, zagdxe tëë rüman xtiidx Jesús loj reeman, majsi ad ragbeetaman par xhieri mazri rirobnijs bejn, tijbzi xcwent xguial waroobnijs Waj ragbeeman. <sup>26</sup> Abi' Apolos, sin guialrdxeb guzuloj caneeman xtiidx Dios loj ree bèn Israel lèn xyadoo reeman, zianz chi biguiejn Priscila con Aquila ni rëbaman, dxel bignë reeman laaman lidx reeman. Ni balüü reeman laaman persi basnuu basiidaman mazri xtiidx Dios. <sup>27</sup> Chi been Apolos xgab cheman niz Acaya, gra ree bèn rliladx Jesucrist bèn za'në laaman, badxe' reeman luxdooman din cheman, abi' guxhaal reeman tijb

gui'ch loj ree b́en rliadx Jesucrist b́en zobj ree niz Acaya din yaca' reeman laaman zagdx chi guidxinman niz ni. Chi bidxinman niz Acaya dád beenman yudar b́en ma rliadx ree Jesucrist guial gogně Dios laa reeman. <sup>28</sup> Din delant loj gra ree bejn rēbaman guial ad laat zě ree b́en Israel, abi' achutczi gojc nadxi' xtiidxaman guial graczi ni rēbaman naj diidxli, balüü tēēman loj xtiidx Dios gra luar lod rēb guial Jesús naj Cristo b́en gulěz reeman.

## 19

### *Bidxin Pab Éfeso*

<sup>1</sup> La'tgaj za' Apolos Corinto, wej Pab guiedx riga' ree niz ruguia', abi' bidxinman Éfeso, yagaj bidx-aaglojman bēlzi ree b́en rliadx Jesucrist. <sup>2</sup> Abi' gunabdiidxaman loj reeman rēbaman:

—¿Guyu xSprijt Dios luxdoodi ya chi bililadxidi?

Badxi' reeman laan rēb reeman:

—Ni'quid waguiejntan guial yu' xSprijt Dios.

<sup>3</sup> Dxel rēb Pab loj reeman:

—¿Xhieza naag gurobnijsidi?

Badxi' reeman laan rēb reeman:

—Barobnijsan zi'c balüü Waj bejn ree.

<sup>4</sup> Dxel rēb Pab loj reeman:

—Walican baroobnijs Waj bejn, b́en bayüjn ree xgab por xtol reeman. Per rēbaman guial rayal chililadx reeman b́en zēēd xijchaman abi' laaman naj Jesús, b́en naj gajc Cristo.

<sup>5</sup> Chi biguiejn reeman zian, dxel gurobnijs reeman por Dad Jesús. <sup>6</sup> Abi' chi guxhoob yaa Pab guijc reeman, dxel guyu xSprijt Dios luxdoo reeman, zianz guzuloj canee reeman diidx ren ree.



Dxel guzuloj cudëed reeman xtiidx Dios loj ree bejn. <sup>7</sup> Loj gra reeman naj cost chiptio'p xinguaaw.

<sup>8</sup> Choon bëew wej Pab lën xyadoo ree bën Israel zojb ni. Sin guialrdxeb guneenëman laa reeman xtiidx Dios, guneenëman laa reeman abi' beenman naguejn din güünman gan chililadx reeman xhienaag naj xguialrniabee Dios. <sup>9</sup> Per garol reeman gojc nad ad guyënt reeman nililadx reeman, al guzuloj gune reeman diidxguijdx por xtiidx Jesucrist delant loj ree bejn. Dxel bariica Pab loj reeman con ree bën ma rliladx Jesucrist, binëman laa reeman lën tijb xzcuel bën la Tiranno. Ni balüüman laa reeman guixie guixie, <sup>10</sup> loj tio'p iiz beenman zian. Abi' graczi ree bën zojb niz Asia, zi'c ree bën Israel zi'c ree bën ad najt bën Israel, bacaagdiajg reeman xtiidx Dad Jesucrist. <sup>11</sup> Abi' por xguialrniabee Dios been Pab milagr narooob ree, <sup>12</sup> xt ree xbay Pab në ree lajd rtia lojman zi'c lantar rignë reeman loj ree bënragxuu, abi' rayajc reeman guialguijdx ni rajc reeman, rarii tëë ree xindxab yu' luxdoo reeman.

<sup>13</sup> Per guyu bëlzi ree bën Israel ziza rabëë reeman xindxab luxdoo ree bejn, abi' guyën reeman nüjnnë reeman dxiin laj Dad Jesucrist dxel rëb reeman loj ree xindxab guin:

—¡Por Jesús bën ruza't Pab, rniabeen lëjt, gol barii!

<sup>14</sup> Zian naj ni been gajdx ree xi'ngaan tijb bën Israel la Esceva, bën goc tijb bixhioz rniabee ree bixhioz. <sup>15</sup> Per tib volt tijb ree xindxab guin badxi' xtiidx reeman rëbaman:

—Nünbeen Jesús ragbee tēen chunin naj Pab, per lējt ni'quid nünbeetan lējt.

<sup>16</sup> Abi' bēn yu' xindxab guin luxdoo guzuloj caguinman laa reeman, con gojl ni yu'man beenman laa reeman gan. Dád gudijnman laa reeman abi' baxüün reeman barii reeman lēnü guin, ziladzi reeman nadxeelguijdx tēē reeman. <sup>17</sup> Graczi ree bēn zojb Éfeso, zi'c ree bēn Israel zi'c ree bēn ad najt bēn Israel, gogbee reeman gojc zian, dxel dád bidxeb reeman abi' baza't reeman Dad Jesús zagdx.

<sup>18</sup> Nē zien ree bēn riladx Jesucrist bidxin abi' delant loj gra ree bejn baneero' reeman gra ni mal ma been reeman. <sup>19</sup> Nētēē zien ree bēn been guialbidxaa bidxinnē xlibr reeman abi' baze'c reeman laa reen delant loj gra ree bejn. Chi babēē reeman cwent plac lasajc ree libr guin dxel cost tü'pchii mil milia plajt lasajc reen. <sup>20</sup> Abi' zian bire'ch xtiidx Jesucrist biguien tēē xguialrniabeeman.

<sup>21</sup> Chi ma gudēd gojc zian, been Pab xgab cheman niz Macedonia nē niz Acaya xt yadxinman Jerusalén. Rēb tēēman guial chi ma wejman Jerusalén dxelri cheman nē Rom. <sup>22</sup> Abi' guxhaalaman tio'p bēn rüjn laaman yudar, Timoteo con Erasto, persi wej reeman niz Macedonia la'tgaj baya'nman mazri niz Asia.

### *Gojc nadxeb Éfeso*

<sup>23</sup> Lēn ree dxej zii been ree bēn Éfeso nadxeb por xtiidx Jesús. <sup>24</sup> Din Demetrio, bēn rüjn ree ni plajt, rüjnman figur plajt ni naj ree form xyadoo dios la Diana, ragbeeman guial dád rüjnman gan con ree bēn rüjnnēman dxiin. <sup>25</sup> Dxel bato'paman

laa reeman con ree ben ren b́en rŭjn gajc ree lasa' dxiin guin, abi' rēbaman loj reeman:

—Gol bacaagdiajg, lējt ragbee guial loj dxiin guie raguieen ree gan milia ro'. <sup>26</sup> Per yan lējt ruguiaa rigueijn tēēdi, Pab ziza cayēbix guial dios ni rŭjn ree bejn ad diost reen. Abi' zian cayujnx gan caliladx zien ree bejn laax, ad tijbtizi luguiedx guie, nē guidib niz Asia. <sup>27</sup> Dxel nadxeb yasēēb dux chiin ree, abi' ad tijbtizi dux chiin ree, nē xyadoo dios Diana ad zayagbeetri ree bejn laan zi'c nŭnbee reeman laan yan abi' achutri guidxga' xguialrniabee dios Diana, b́en rēn ree bejn guidib niz Asia nē guidib loj guidxliuj.

<sup>28</sup> Chi bigueijn reeman zian, bidxe'ch reeman abi' gurixdiaj reeman rēb reeman:

—¡B́en zojbloj naj Diana, xdios ree b́en Éfeso!

<sup>29</sup> Abi' gurixdiaj ree b́en guiedx guin wajs reeman, gunaaz reeman tio'p ree b́en Macedonia, Gayo nē Aristarco, b́en rzanē ree Pab. Dxel guxoobyuj reeman laa reeman, binē reeman laa reeman lod rajc xgabilt ree b́en guiedx. <sup>30</sup> Guyēn Pab niuman yagaj din ninieenēman bejn ree, per ad cwējbt ree xcompniaraman, b́en ma rliladx ree Jesucrist. <sup>31</sup> Nētēē loj ree guxtis Asia guin no'ch b́elzi ree xmiw Pab, laa reeman guxhaal ruson lojman guial mejorli ad chu'man ni. <sup>32</sup> Zianz gurixdiaj ree b́en guin rēb reeman ni rent ni ren, been reeman nadxeb abi' zien reeman ni'quid ragbeet par xhie bado'p reeman yagaj. <sup>33</sup> Dxel galay ben zien guin babēē ree b́en Israel tijb xcompniar reeman b́en la Lejandr din guinieenēman b́en guin ree. Dxel beenman sen loj ree b́en guin din yacwēēz ro'

reeman din guinieeman por ree bén Israel delant loj ree bén guiedx guin. <sup>34</sup> Per chi gogbee reeman guial najman bén Israel, tiblazujzi gurixdiaj reeman cost tio'p hor, rëb reeman:

—¡Bén zojbloj naj Diana, xdios ree bén Éfeso!

<sup>35</sup> Dxel chi been squiarban luguedx guin gan bacwëöz ro' reeman, dxel rëbaman:

—Bén Éfeso, gra bénguidxliuj ragbee guial luguedx guie zianczi rnij ree bejn xyadoo dios Diana abi' rën tää ree bejn dios Diana biai b xanyabaa. <sup>36</sup> Lëjt ragbee guial laan naj ni diidxli, zeel ad rayalt güüнди zian, ad gontzi güüнди xhienin sin xgab. <sup>37</sup> Din bén bidnëdi achet ni mal been reeman yadoo guin, ad wanee tää reeman diidxguijdx dux dios ree. <sup>38</sup> Bal Demetrio con ree xcompniaraman bén rüjnnëman dxiin rajp reeman wadijl con ree ben ren, laa roylay naj, laa ree guxtis yu', ni che reeman chitawquia reeman. <sup>39</sup> Per bal xhieri mazri rëndi, chi gac xgabilt bén guiedx dxel gacan reglad. <sup>40</sup> Yan, por ni ma gojc, nadxeb na gobiarn guial dunuj ree caylu' ree bejn diidx din güün reeman wadijl guin, ¿abi' xhieza yaguie'ch ree loj reeman bal guiniabdiidx reeman duloj ree xcwent ree ni cayajc?

<sup>41</sup> Chi gulox rëbaman zian, dxel bare'ch reeman.

## 20

### *Wej Pab Macedonia në Grecia*

<sup>1</sup> Chi babedxe ree bén Éfeso, gurejdx Pab bén rililadx ree Jesucrist persi bagu'man luxdoo reeman. Dxelri bazaadiidxnëman laa reeman abi' zëman niz Macedonia. <sup>2</sup> Bitixlojman bén rililadx

ree Jesucrist guidib niz ni, dád bagu'man luxdoo reeman con xtiidxaman, dxelri bidxinman Grecia <sup>3</sup> lod guzuman choon bëëw. Ma niyman loj barcw din niejman Siria, chi gogbeeman guial nuyën ree bën Israel nüjn reeman laaman xhienin. Dxel mejorli beenman xgab bayejcaman niz Macedo-nia. <sup>4</sup> Binëman Sópater, bën Berea, xi'ngaan Pirro, në Aristarco con Segundo, bën Tesalónica ree, nëtëë Gayo, bën Derbe, con Timoteo, në Tíquico con Trófimo, bën niz Asia ree. <sup>5</sup> Gra reeman guned abi' gulëjz reeman Pab con naj Lujc guiedx Troas. <sup>6</sup> Guiáad dunujn chi gudëd lanij ni raw ree bën Israel guiadxtil ni ad yu't levadur, dxel badxu'n loj barcw badxoon Filipos, abi' ni goc gaay dxej badxinan guiedx Troas lod za' reeman. Ni badxu'n gajdx dxej.

### *Basban Pab Eutico*

<sup>7</sup> Chi bidxin chidumingw, badxajg du lasa'n din yadaawan guiadxtil tijbzi, abi' guial mal been Pab xgab guial yareguiaal griiman, chi bidxin garol guiaal sta caneenëman bejn ree, <sup>8</sup> guiáad lënü la-dya lod rado'pan dád zien ree guij re'c. <sup>9</sup> Tijb xinguiag zobj ro' ventan lax Eutico. Guial xchej da't guneenë Pab laa reeman, dxel xt garej gunaaz bacaal xin guin, abi' gudidya'x diizd yu bayon guin xt luyuj, ma güjtix chi bales reeman laax. <sup>10</sup> Dxel biguiajt Pab lod naga'x, bazuxibaman abi' gudiidxaman laax, dxel rëbaman loj reeman:

—Ad rdxebidi, nabanquix.

<sup>11</sup> Dxel bayë'p Pab zatijb, gula'man guiadxtil abi' gudaw reeman, dxel basnuu guneenëman laa

reeman xt bareguiaal. Chi bareguiaal bayune-  
 jzaman ziaman. <sup>12</sup> Abi' xin gudidya' ro' ventan  
 guin, nabanx zigné reeman laax, dxel dád nix yu'  
 luxdoo reeman.

### *Wej Pab Mileto*

<sup>13</sup> Dxel dunujn badxu'n loj barcw baneedan  
 bio'n par luguiedx Asón, lod baya'nan diidx yaca'n  
 Pab, din beenman xgab nej guia'man ni. <sup>14</sup> Chi  
 badxajg du lasa'n con laaman luguiedx Asón, dxel  
 badxu'ně'n laaman loj barcw bio'n lod la Mitilene.  
<sup>15</sup> Ni badxoon, chi bareguiaal badüüdan niz lod la  
 Quío. Chi bareguiaal stijb badxinan lod la Samos.  
 Dxel chi bareguiaal stijb badxinan Mileto, per  
 chi gad yagaj guidxin badxu'dxen lod la Trogilio.  
<sup>16</sup> Been Pab xgab ad zejtaman Éfeso, ad guyëntaman  
 niaglaaman niz Asia guial nuyënman diob nadxin-  
 man Jerusalén, din xixgabaman naj guial bal zajc  
 yadxinman lanij Pentecostés.

### *Bazaadiidxně Pab bejn ree Mileto*

<sup>17</sup> Chi nadxu'n Mileto, gunabee Pab bi't ree bën  
 rniabee loj ree bën rliladx Jesucrist, bën zojb ree  
 Éfeso. <sup>18</sup> Chi bidxin reeman dxel rëbaman loj ree-  
 man:

—Diizd dxej yaloy ni bialan niz Asia xt yan, lëjt  
 ragbee xhienaag cayünan. <sup>19</sup> Loj guidib tiamp  
 ni za'ně'n lëjt cayünan sirv Jesucrist con pasens,  
 majsi xt ronan abi' gra loj guialzi ma gudëëdan por  
 ni rën ree bën Israel güünně reeman naj. <sup>20</sup> Per  
 majsi zian ad bacwëëzt rnin lojdi ni naj ni zagdxe  
 par lëjt, tant delant loj ree bejn ně lidxidi balün  
 lëjt. <sup>21</sup> Abi' zi'c ree bën Israel ně ree bën ad najt  
 bën Israel, ma rën loj reeman din yayüjn reeman

xgab por xtol reeman yadxi' tée loj reeman loj Dios chililadx tée reeman Dad Jesucrist. <sup>22</sup> Yan ma yaya'n Jerusalén lod caxhaal xSprijt Dios naj, ad ragbeetan xhie cabéz naj ni. <sup>23</sup> Tijbzi ni ragbeen naj guial guidib lod ran rugojn xSprijt Dios naj guial ladxguiib në zro' da't guialzi naj ni cabéz naj. <sup>24</sup> Per par naj achet güünan por zian, majsi guiëtan per con nix yu' luxdon cayünan ni rayal günan xt lod gactizan, gün tée mandad ni banee Dad Jesús naj guial gatiechan xtiidxza'caman xhienaag rën Dios dunuj ree.

<sup>25</sup> 'Yan naj ragbee guial ni'qui tijbidi bën ma ben diidx loj xhienaag naj xguialrniabee Dios, ad zuguaatrudi naj. <sup>26</sup> Zeel ganin lojdi yan guial ad achetri dol ra'pan bal id nabandi xnejz. <sup>27</sup> Din ma bagojnan lëjt gra xhienaag naj xixgab Dios achetzi baquiechan. <sup>28</sup> Yan, gol gojp lëjt gajc, gol gojp tée ree bën rliladx Jesucrist, bën ma banee xSprijt Dios lojdi din guiniadi laa reeman zi'c tijb bën rajp xiil ree, din Jesucrist con xrejnman ma gudixaman por xtol reeman. <sup>29</sup> Naj ragbee guial chi yazaan gui't ree ben ren zi'c gajczi rtie'ch cuyojt xiil ree, zian naj xixgab reeman güünnë reeman bën rliladx ree Jesucrist. <sup>30</sup> Loj gajquidi grii ree bën gulüü ganax ni rusquiee, din güün reeman gan güüncwent ree bën rliladx Jesucrist xtiidx reeman luar güüncwent reeman xtiidx Dios. <sup>31</sup> Zeel gol guzujsin, gol gojp cudad, gol basaaladx, loj choon ijz ad bacwëëzt gunenë'n lëjt xt ronan banen lëjt consejw.

<sup>32</sup> 'Yan, compniar raliduladx ree Jesucrist, gusa'nan lëjt con Dios con xtiidxza'caman. Laan

rajp guialrniabee par gagnën lëjt, din gusnuu gagbeedi xhienaag rënman guibandi gunee tëëman lojdi ni ma rëbaman gudëédaman loj ree bën ma naj xbejnman. <sup>33</sup> Achut xmilia achu tëët xab rzëëbladxan. <sup>34</sup> Lëjt ragbee zagdxe guial con quijb yan benan dxiin persi gudawnë'n bën guzu ree con naj. <sup>35</sup> Abi' balün lëjt guial zian rayal güün bejn dxiin din güünman yudar bën ryaadx ree xhienin. Gol basaaladx xtiidx Dad Jesús chi rëbaman: “Mazri nix yu' luxdoo bën razaladx guial loj bën rtia'.”

<sup>36</sup> Chi gulox rëb Pab zian, dxel bazuxibaman gurejdx gunabaman Dios con gra reeman. <sup>37</sup> Gra reeman biin, gudiidx reeman Pab abi' gudaw reeman laaman xid. <sup>38</sup> Dád guyunaya reeman por ni rëbaman loj reeman guial ad zuguaatri reeman laaman. Dxel biglu'nejz reeman laaman xt lod za' barcw.

## 21

### *Wej Pab Jerusalén*

<sup>1</sup> Ni basa'nan laa reeman, abi' badxu'n loj barcw bio'n tibli niz Cos, yuj riga' loj nijsdoo. Chi bareguiaal badxinan niz Rodas nëgajcan riga' loj nijsdoo, abi' ni badxoon bio'n guiedx Pátara. <sup>2</sup> Ni badxaaglojn tijb barcw ni ma che niz Fenicia zianz badxu'n lojn. <sup>3</sup> Chi zio'n dxel dux lad ruvejsan baguiaan lod la Chipre, basnuu bio'n niz Siria. Abi' guial naj lat barcw guin luguiedx Tiro dxel badxu'n luguiedx guin. <sup>4</sup> Ni badxaaglojn bën rliiladx ree Jesucrist abi' badxu'në'n laa reeman gajdx dxej. Bën guin ree por xSprijt Dios rëb



reeman loj Pab guial ad bal cheman Jerusalén. <sup>5</sup> Per chi baza' gajdx dxej guin, dxel badxoon luguiedx guin, dxel gra reeman con xbéngunaa reeman con xi'n reeman, biglu'nejz reeman dunujn xt ro' nijsdoo. Ro' nijs guin badxu'xiban barejdx banaaban Dios. <sup>6</sup> Dxel bazaadiidxnë'n laa reeman abi' badxë'pan loj barcw guiáad laa reeman zia lidx reeman.

<sup>7</sup> Chi badxoon luguiedx Tiro bio'n luguiedx Tolemaida, ni gulox dux viajn loj barcw, bio' tēen bugneenë'n bēn zojb ree ni, bēn rliladx ree Jesucrist abi' baya'nān con laa reeman tib dxej. <sup>8</sup> Chi bareguiaal, dunujn con Pab badxoon Tolemaida bio'n Cesarea lod bio'n lidx Felip, bēn rtie'ch xtiidx Jesucrist. Felip guin naj tijb ree bēn gajdx cwabee din qui's reeman ni rayal tia' ree bēnprob abi' baya'nān lidxaman. <sup>9</sup> Yu' tajp xi'ndxa'paman bi-inxtijb ree abi' laa reem rudēēd xtiidx Dios loj ree bejn. <sup>10</sup> Ma gojc zien dxej nadxu'n lidx Felip, chi bi't tijb bēn la Agabo nēgajcaman rudēēd xtiidx Dios loj ree bejn, zēēdaman niz Judea. <sup>11</sup> Chi bi'taman cwa'man xcinch Pab guxhii guia' gajcaman con yaaman, abi' naman:

—XSprijt Dios na guial Jerusalén ze guixhii ree bēn Israel bēn naj xcinch ni guie, abi' yayü reeman laaman loj ree bēn ad najt bēn Israel.

<sup>12</sup> Chi baguiejnan zian, dunujn con ree bēn rliladx Jesucrist luguiedx guin baguieenan naguiejn loj Pab ad cheman Jerusalén. <sup>13</sup> Per badxi'man laan, naman:

—¿Chexc zeel roondi abi' rgu' nayadi naj? Par naj achet güünan majsi guixiin o majsi guiētan Jerusalén por Dad Jesús.

<sup>14</sup> Chi bayagbeen guial ad zaguieentan gan yadsoonan laaman chitëë cheman, achetri baguie'chan lojman, tijbzi ni raguie'chan lojman: —Gac zi'c rniabee Dios.

<sup>15</sup> Chi gudëd ree dxej guin dxel baguieenan purvinid bio'n Jerusalén. <sup>16</sup> Bunë'n bëlzi ree bën Cesarea rliladx ree Jesucrist, laa reeman binë dunujn lod baya'nan lidx tijb bën Chipre, ma gojc xchej rliladxaman Jesucrist, laman Mnasón.

### *Bignaj Pab Jacob*

<sup>17</sup> Abi' ree bën Jerusalén rliladx Jesucrist dád nix guyu luxdoo reeman baca' reeman dunujn. <sup>18</sup> Chi bareguiaal bunë'n Pab bugnajn Jacob, ni riga' gra ree bën rniabee loj ree bën rliladx Jesucrist. <sup>19</sup> Chi gulox bagajpdiozan laa reeman, dxel bagojn Pab laa reeman tijb gaj ni beenman por xguialrniabee Dios delant loj ree bën ad najt bën Israel. <sup>20</sup> Chi biguiejn reeman zian, baza't reeman Dios zagdxë, zianz rëb reeman loj Pab:

—Lüj ragbee guial entr loj ree bën Israel zien da't reeman ma bililadx Jesucrist, abi' gra reeman rëb guial rüjn naguiejn güün bejn zi'c rniabee xley Moisejs. <sup>21</sup> Ma biguiejn tëë reeman guial lüj culüü bën Israel ree, bën ad zojbt ree loj nacion Israel guial ad züjncwentt reeman xley Moisejs, rëb tëël loj reeman guial ad rüjnt naguiejn chu' xi'n reeman sen ru ree bën Israel ad zinal tëët reeman dux costumbr ree. <sup>22</sup> Yan, ¿xhienaag gag? Laa reeman guchajgczi lasa' reeman chi gagbee reeman guial ma bi'til. <sup>23</sup> Zeel mejorli güünl ze: Yu' tajp ree xin no'ch du lojn xin rayal ree güün cumplid ni cwëb reex loj Dios. <sup>24</sup> Binë reex, gol been zi'c rëb loj ley

din gaquidi naya, gudijx tēē por laa reex din gac ya guijc reex. Zian gagbee gra bejn guial rüjnquil zi'c rniabee ley, guial ad wali tēēt ni biguiejn reeman xcwentil. <sup>25</sup> Abi' por ree bēn ad najt bēn Israel, bēn ma bililadx ree Jesucrist, ma baxhaalan tijb gui'ch loj reeman zi'c baguieenan xgab guial ad rayalt chu' reeman xgab por xley Moisejs. Per ad rayalt gaw reeman ni rbej loj ni naj ree xdios reeman, ad gaw tēē reeman rejn ni'qui bēēl rberejn, ad sunē tēē reeman ben ren bēn ad najt lacheel reeman.

### *Gunaaz ree bēn Israel Pab*

<sup>26</sup> Dxel binē Pab guidap ree bēn guin, abi' chi bareguiaal been reeman zi'c rniabee ley par gac reeman naya. Dxel guyu reeman lēn yadooro' Jerusalén din gugojn reeman goc yayaaloj dxej güün reeman zi'c rniabee ley, dxej rayal chinē tijb gaj reeman tijb be guiēt zi'c tijb gon par Dios.

<sup>27</sup> Chi ma yayaaloj gajdx dxej ni naj güün reeman zi'c rniabee ley, yu' ree bēn Israel zēēd niz Asia, baguiaa reeman Pab lēn yadooro' Jerusalén abi' gurixdiaj reeman wajs reeman, gunaaz reeman laaman, <sup>28</sup> rēb reeman:

—¡Bēn Israel, gol been yudar! Xin guie naj xin ziza gra lad caneeguidxix bēn Israel ree nē dux yadoo ree, rēb tēēx loj ree bejn guial ad güün reeman zi'c rniabee dux ley ree. Abi' ad tijbtzi laan, nē ma badxe'x bēn ad najt ree bēn Israel lēn dux yadoo ree ni naj ni nada par dunuj ree ma beenx laan zi'c tijb luar ad rüjnt sirv.

<sup>29</sup> Rēb reeman zian guial baguiaa reeman Pab zizaman ni con tijb bēn Éfeso bēn la Trófimo, zeel

gunaladx reeman binë Pab laaman lën yadooro' Jerusalén.

<sup>30</sup> Dxel been reeman nadxeb guidib luguiedx guin, ruxüün ree bejn bidxin reeman. Abi' gunaaz reeman Pab, guxoobyuj reeman laaman babëë reeman laaman lën yadoo guin laa basiaaw gajc reeman port guin ree. <sup>31</sup> Za mer nugüjt reeman laaman, chi bidxin ruson guin loj suldad rniabee ree suldad guial gra ree bén Jerusalén cayüjn nadxeb. <sup>32</sup> Laa bato'p gajc suldad rniabee guin xsuldadix në za tio'p choon ree suldad rniabee, baxüün reex wej reex lod riga' ree bén guin. Chi baguiaa ree bén guin bidxin suldad rniabee guin con ree xsuldadix, dxel bacwëëz gudijn reeman Pab. <sup>33</sup> Dxel gubig suldad rniabee guin, gunaazix Pab gunabeex guxhii reex laaman con tio'p caden. Abi' gunabdiidix chu laaman xhie tëë beenman. <sup>34</sup> Per gurixdiaj reeman rëb reeman garent garen, guial rbixdiaj da't reeman achet gojc niagbeex, dxel gunabeex bignë reex Pab lod yu' ree suldad. <sup>35</sup> Chi bidxin reex loj ree scliar lod yu' ree suldad guin, gulejn reex Pab guial dád nadoxh rüjn ree bén zien nal laa reex, <sup>36</sup> abi' gra reeman rbixdiaj, rëb reeman:

—¡Gol bagüjtix!

### *Gunee Pab loj ree bejn*

<sup>37</sup> Chi ma chu'në reex Pab lod yu' ree suldad guin, gunabdiidxaman loj suldad rniabee guin, rëbaman:

—¿Zajc ganenë'n lüj ya?

Badxi' suldad guinan rëbix:

—¿Rajc rnieel diidx grieg ya? <sup>38</sup> ¿Nid lüj naj xin Egipto guzu contr gobiarn ya, abi' laa bigxüün gajquil niz loj yujbidx con tajp mil ree xbejn, bén bagüjt ree bejn?

<sup>39</sup> Dxel rëb Pab lojx:

—Bén Israel naj. Goolan luguiedx Tarso tijb ree guiedx zojbloj ni riga' niz Cilicia. Baneesii mod ganenë'n bén guie ree.

<sup>40</sup> Dxel cwëjb suldad guin, abi' guzuli Pab loj ree sclar guin beenman sen loj ree bén guin con yaaman din yacwëöz ro' reeman. Chi bacwëöz reeman, dxel guneenëman laa reeman diidx hebreo, rëbaman:

## 22

<sup>1</sup>—Lëjt bengol në los demazridi, gol bacaagdiajg ni ganin por naj.

<sup>2</sup> Chi biguiejn reeman caneenëman laa reeman diidx hebreo, mazri bacwëöz reeman. Abi' basnuman rëbaman loj reeman:

<sup>3</sup> —Bén Israel naj. Goolan luguiedx Tarso tijb guiedx riga' niz Cilicia, per Jerusalén guie guni'san. Abi' mextr Gamaliel balüü naj gra zi'c naj xley dux bén gulal ree. Guiáad naj guidib luxdon benan xgab güünan sirv Dios zi'cgajc lëjt yan. <sup>4</sup> Dxel guzunaalan bén rliladx ree Jesucrist, xt bagüjtan laa reeman abi' zi'c ree béngunaa zi'c ree xinguaaw gunaaan badxe'n ladxguuib. <sup>5</sup> Bixhioz mazri zojbloj rniabee graczi ree bixhioz në gra ree guxtis Israel ragbee guial najn ni wali. Din laa reeman banee tijb gui'ch par gulün loj du lasa' bén Israel ree, bén zojb ree luguiedx Damasco din chile' yaguilan bén rliladx ree Jesucrist luguiedx

guin, ganaaz tëen laa reeman guidnë'n laa reeman Jerusalén din tëd reeman casti.

*Be Pab diidx xhienaag bililadxaman Jesucrist  
(Hch. 9:1-19; 26:12-18)*

<sup>6</sup> 'Per chi za'n lunejz par Damasco, chi ma caxinan ni cost garol dxej, dxejczy brii tijb guij xanyabaa balaan bacha' guidibczy lod cazaan, <sup>7</sup> abi' breeyujn. Dxel biguiejnan cha' bën na: "Saulo, Saulo, ¿chexquiza zeel rzunalil naj?" <sup>8</sup> Abi' gunabdiidxan rën: "¿Chu lüj Dad?" badxi'man laan naman: "Naj naj Jesús, bën Nazaret, bën rzunalil." <sup>9</sup> Bën zinë' reen baguiaa reeman bacha' guin abi' bidxeb reeman, per ad bignia't reeman ni na cha' bën gunee naj. <sup>10</sup> Dxel gunabdiidxan rën: "¿Xhie rayal günan Dad?" Abi' na Dad Jesucrist lon: "Bixche, basnuu xnejzil wej Damasco. Ni na reeman gra ni rayal güünl." <sup>11</sup> Abi' guial bascajy bacha' guin lon, dxel bën zinë' reen gunaaz reeman yan, binë reeman naj luguiedx Damasco.

<sup>12</sup> 'Ni zojb tijb bën la Ananías, rüjnman cumplid gra zi'c rniabee xley Moisejs. Abi' gra ree bën Israel zojb luguiedx Damasco nünbee laaman guial nabanman xnejz. <sup>13</sup> Ananías guin bidganaj naj, chi bi'taman naman lon: "Saulo, ma zajc yaguaal stijb." Loj hor guin gajc baguian stijb abi' baguian laaman. <sup>14</sup> Dxel naman lon: "XDios dux béngulal ree ma bacaabee lüj din gagbeel xhie rënman güünl, abi' guguaal Jesucrist guien tëël cha'man, bën rüjn zi'c rayal. <sup>15</sup> Din chigneel xtiidxaman loj gra ree bénguidxliuj, gü tëël diidx loj reeman ni baguiaal ni biguiejn tëël. <sup>16</sup> Yan, ad rbëzil mazri,

guzuli gurobnijis tëë gurejdx gaj Dad Jesucrist din chisüdaman xtolil.”

*Be Pab diidx xhienaag wejman loj ree bén ad najt bén Israel*

<sup>17</sup> 'Chi baguialan Jerusalén, wan lèn yadooro' persi guredx gunaaban Dios, abi' guza'can zi'c rulüü cane'xhchalan. <sup>18</sup> Baguian Dad Jesús naman: “Baquiejn. Cari barii Jerusalén, din ad züjncwentt reeman ni guiëbil por naj.” <sup>19</sup> Abi' rën lojman: “Dad, laa reeman ragbee guial naj wa gra lèn ree yadoo gunaazan bén rliladx ree lüj, badxe'n laa reeman ladxguiib gudin tëën laa reeman. <sup>20</sup> Në chi bagüjt reeman Esteban, bén guneex tiidxil, laagajc naj za' ni rën zagdx naj guiëtaman abi' xt gunan xab ree bén bagüjt laaman.” <sup>21</sup> Per na Dad Jesús lon: “Wej, naj gaxhal lüj zijt loj ree bén ad najt bén Israel.”

*Badxe' reeman Pab lod yu' ree suldad*

<sup>22</sup> Xt quintzi naga'loj bacaagdiajg reeman ni rëb Pab dxel guzuloj gurixdiaj reeman rëb reeman:

—¡Ad rayalt guiban xin guin! ¡Gol bagüjtix!

<sup>23</sup> Abi' guial cabixdiajz cabixdiaj reeman, ruzaal xab reeman niz ladia ruzaal tëë reeman yuj niz ladia. <sup>24</sup> Dxel gunabee suldad rniabee guin cu' reeman Pab lod yu' ree suldad abi' gunabeex qui'n reex laaman din yaneero'man chexc zeel rbixdiaj ree bén guin zian contr laaman. <sup>25</sup> Per chi guxhii reex Pab din quin reex laaman, rëbaman loj tijb ree suldad rniabee za' ni:

—¿Zajc quindi tijb bén Rom ya, chi gadidi gagbee xhie beenman?

<sup>26</sup> Chi biguiejn suldad rniabee guin zian, dxel bicojnx suldad rniabee ree suldad guin, rëbix lojx:  
—Goj p cudad ni güünnël xin guin, din xin Roman.

<sup>27</sup> Dxel wej suldad rniabee guin lod za' Pab, abi' gunabdiidix lojman rëbix:

—¿Walín ya xin Rom lüj?

Badxi' Paban rëbaman:

—Walican.

<sup>28</sup> Abi' rëb suldad rniabee guin lojman:

—Naj zro' milia gudixan par gacan xin Rom.

Abi' badxi' Paban rëbaman:

—Per naj diisd goolan najn bën Rom.

<sup>29</sup> Chi biguiejn ree suldad niguin Pab, guial bën Rom najman, laa bisüd gajc reex. Xt në suldad rniabee guin bidxeb chi gogbeex guial ben Rom naj Pab guial gunabeex guxhii reex laaman.

### *Bazuj reeman Pab loj ree guxtis*

<sup>30</sup> Chi bareguiaal, guyën suldad rniabee guin niagbeecheawix chexc zeel za' ree bën Israel contr Pab. Abi' baxhiequix Pab, dxel gunabeex bado'p ree bixhioz rniabee ree bixhioz në ree guxtis. Abi' babëëx Pab bazujx laaman loj gra reeman.

## 23

<sup>1</sup> Baguiaa Pab loj ree guxtis guin, abi' rëbaman:

—Compniar Israel, loj guidib ni nabanán xt yan, achet naladxan delant loj Dios din naj ragbee xhienaag nabanán.

<sup>2</sup> Dxel Ananías, bixhioz mazri zojbloj rniabee graczi ree bixhioz, gunabeeman bën za' ree gajxh cwë' Pab din ca'p reeman ro'man. <sup>3</sup> Per badxi' Paban rëbaman loj bixhioz guin:



—¿Ziangajc ca'p Dios ro'l, bén rusquiee! ¿Id zobjil yagaj ya par güünl guialguxtis zi'c rniabee ley? Abi' ¿chexquiza zeel rüjnl zi'c ad rniabeet ley, rniabeel ca'p reeman ro'n?

<sup>4</sup> Abi' ree bén za' yagaj rëb reeman lojman:

—¿Zian rusaglojl xbixhioz zobjloj Dios ya?

<sup>5</sup> Dxel rëb Pab:

—Gol been perdon, ad gogbeetan guial laaman naj bixhioz mazri zobjloj. Din loj xtiidx Dios rëb: “Ad gusaglojl bén rniabee ladxil.”

<sup>6</sup> Chi gogbee Pab guial garol reeman naj bénsaducew za garol reeman naj bénfarisew, dxel guneeman rejs rëbaman:

—Naj naj bénfarisew, xi'n bénfarisew naj. Abi' guial rliladxan yaban ree bengüt zeel za' ree bejn contr naj.

<sup>7</sup> Chi rëbaman zian, guzuloj cadildiidx ree bénfarisew con ree bénsaducew abi' gojc reeman tio'p lala'. <sup>8</sup> Din bénsaducew ree ad rliladxt reeman guial yaban ree bengüt, ad rliladx tëët reeman guial yu' ree anjl në ree sprijt, per ree bénfarisew rliladx reeman gra ree ni guin. <sup>9</sup> Abi' been reeman naquie' yagaj. Dxel guzuli bëlzi ree bénfarisew naj mextr rulüü ley, rëb reeman:

—Achet ni mal wayüjn bén guie. Wed tijb sprijt o tijb anjl guneé laaman, gol gojpp cudad ad niad contr Diosan nadxu' ree.

<sup>10</sup> Chi baguiaa suldad rniabee guin mazri cadildiidx reeman, dxel bidxebix nuroox reeman Pab. Abi' gunabeex bi't ree suldad din yabëë reex laaman galay ree bén guin, chinë tëë reex laaman lod yu' ree suldad stijb.

<sup>11</sup> Chi gure guiaal stijb, balüüloj Jesucrist loj Pab, rëbaman lojman:

—Bagu' luxdool Pab, din zi'c guneel por naj luguiedx Jerusalén guie, ziangajc guinieel por naj luguiedx Rom.

*Been reeman xgab gugüjt reeman Pab*

<sup>12</sup> Chi bareguiaal, garol ree bën Israel baya'n reeman diidx din gugüjt reeman Pab, rëb tée reeman guial achet gaw reeman achet tëet guië' reeman xt gugüjt reeman laaman. <sup>13</sup> Nadëd tiuu naj ree bën rëb zian. <sup>14</sup> Abi' wej reeman bigneenë reeman bixhioz ree bën rniabee ree bixhioz në ree xbengol ree bën Israel, rëb reeman loj reeman:

—Dunujn ma raguie'ch guial achetdzi yadaawan xt chi ma bagüjtan Pab. <sup>15</sup> Yan lëjt con gra ree guxtis, gol gunab loj suldad rniabee guin din guidnëx laax lojdi guixie, con gol badxiib guijc guial rëndi gagbeechaawidi xhienaag naj xcwentix. Abi' dunujn ma yadxu'sinan din yagüjtan laax chi gadix gui't guie.

<sup>16</sup> Per xi'ngaan bizan Pab biguiejnx guial cayëb reeman zian, dxel wejx lod yu' ree suldad bicojnx Pab. <sup>17</sup> Zianz gunee Pab tijb ree suldad rniabee guin, rëbaman lojx:

—Binësii xin guie loj suldad rniabee din gudëex tijb ruson lojman.

<sup>18</sup> Binë xin suldad guin laax loj suldad rniabee guin, rëbix lojx:

—Pab, xin yu' ladxguiib guredx naj abi' gunabix guidnë'n xin guie lojl din guneex tijb ruson lojl.

<sup>19</sup> Abi' suldad rniabee guin gunaazix yaa xin guin, binëx laax tibladd, gunabdiidix lojx rëbix:

—¿Xhie rēnl nal lon?

<sup>20</sup> Abi' rēb xin guin lojx:

—Bén Israel ree ma baya'n reeman diidx din guiniab reeman lojl guixie din chinēl Pab loj ree guxtis, con gudxiib reeman guijc guial rēn reeman gagbeechaaw reeman xhienaag naj xcwentaman.

<sup>21</sup> Per ad bal chililadxil laa reeman, din nadēd tiuu naj ree bēn cwēz laaman guquie'chloj reeman lunejz, abi' ma rēb reeman guial achet gaw reeman ache tēēt guiē' reeman xt gugūjt reeman laaman. Yan za'sin reeman cabēz reeman ni guiēbil.

<sup>22</sup> Dxel rēb suldad guin loj xin guin:

—Baguiaj. Achu loj guiēbil ni ma nal lon.

### *Guxhaal reeman Pab loj gobernador Félix*

<sup>23</sup> Dxel gunee suldad rniabee guin tio'p ree xsuldadix, abi' gunabeex laa reex din güün reex porvinid tio'p gayuu suldad che guia', nē za gayojnchii ree suldad cwib way, zatio'p gayuu ree suldad tia' lans din che reex Cesarea raca gaa guxhin. <sup>24</sup> Abi' gunabee tēēx güün reex porvinid way cwib Pab, rēbix loj reex guial guinia reex Pab din guidxinman zagdxē loj gobernador Félix.

<sup>25</sup> Abi' guxhaalnēx laa reex tijb gui'ch ni rēb:

<sup>26</sup> “Naj Claudio Lisias, rugajpdiozan lūj gobernador Félix, lūj guial najl bēn zojbloj. <sup>27</sup> Bén Israel ree gunaaz xin guie ma nugūjt reeman laax. Per chi gogbeen guial xin Roman, dxel wan con ree da suldadan buglēēn laax loj reeman. <sup>28</sup> Abi' guial rēnan gagbeen xhie rūjn x zeel rdxe'ch reeman laax, dxel bazun laax loj ree guxtis Israel.

<sup>29</sup> Dxel gogbeen guial por xcwent xley reeman zeel rdxe'ch reeman laax, per ad najtan ni rayal

guiëtix ni'qui guial chu'x ladxguiib. <sup>30</sup> Nē guial ma gogbeen guial xixgab ree bēn Israel naj gugūjt reeman laax, zeel cayxhalan laax lojl. Abi' ma rēn loj ree bēn rdxe'ch laax guial con lūj gūūn reeman reglad ni rajp reeman contr laax. Laanan rugojnan lūj.”

<sup>31</sup> Been ree suldad guin zi'c gunabee suldad rniabee guin abi' guxhin binē reex Pab luguiedx Antípatris. <sup>32</sup> Chi bareguiaal suldad zē ree guia' bayejc reex lod yu' ree suldad, guiáad ree suldad dxiib way zinē reex laaman luguiedx Cesarea. <sup>33</sup> Chi bidxin reex Cesarea, badēēd reex gui'ch guin loj gobernador guin, bayū tēē reex Pab lojman. <sup>34</sup> Chi gulox biil gobernador guin gui'ch guin, gunabdiidxaman loj Pab ban zaman. Dxel chi gogbeeman guial Cilicia zēēdaman, <sup>35</sup> dxel rēbaman lojman:

—Chi gui't ree bēn za' ree contr lūj, dxel gucagdiagan ni nal.

Abi' gunabeeman gap reex Pab lēn xpalas Herodes.

## 24

### *Ni gunee Pab loj gobernador Félix*

<sup>1</sup> Chi goc gaay dxej, Ananías, bixhioz mazri zobjloj rniabee graczi ree bixhioz, bidxinman Cesarea con tio'p choon ree guxtis Israel nē tijb licenciad laman Tértulo. Abi' wej reeman loj gobernador guin din cwe'c reeman xguialquia Pab. <sup>2</sup> Chi bidxinnē reex Pab, guzuloj Tértulo caneeman contr laaman, rēbaman loj gobernador guin:

—Quixtēē lūj dad gobernador, por lūj nadxu'dxen, nē por xguialrajquil zien ree ni

rüjn sirv cayajc du ladxan. <sup>3</sup> Gra ladczi za' ree bejn conform por gra ni cayüjn! dad gobernador Félix, lüj naj bén zobjloj, quixtéeczi lüj. <sup>4</sup> Per chitëë günlaan lüj mazri, rniaaban lojl din gucaagdiajguil ni yanan lojl tibrajtoczi. <sup>5</sup> Dunujn bayagbeen xin guie naj zi'c tijb guialguijdx loj ree bén Israel, guidibczi guidxliuj zizax rustijlix laa reeman abi' laax rniabee loj tib cwaa ree bén rniee reeman nazaren. <sup>6</sup> Abi' guyën tëëx nüjnx dux yadooro'n zi'c tijb luar ad rüjnt sirv, zeel banaazan laax bayënan naguieenan guialguxtis zi'c naj dux leyan. <sup>7</sup> Per laa bi't gajc suldad Lisias con ree xsuldadix, babëëxuu reex laax du lojn. <sup>8</sup> Abi' rëb suldad rniabee guin guial lojl gui't ree bén rbe'c xguialquia Pab, yan lüj gajc zajc guiniabdiidx lojx din gagbeel zagdxe guial walican ni ranan xcwentix.

<sup>9</sup> Abi' ree bén Israel za' ni rëb reeman guial waliqui gra ni guin. <sup>10</sup> Dxel been gobernador guin sen loj Pab din guinieeman, abi' rëb Pab:

—Guial ragbeen diizd gocli rniabeel nacion Israel, zeel ad yu'nawëëgtan yadxi'n ni rudxiib reeman guican. <sup>11</sup> Abi' lüj gajc zajc cwe'quil ruson din gagbeel guial qui gojcri chiptio'p dxej badxinan Jerusalén din ganajchi'n Dios. <sup>12</sup> Abi' achut banaaznë reeman naj cadildiidxnë'n, ni'qui guial gabën wadijl lën yadooro' Jerusalén, ni'qui lën yadoo ren ree ni yu' ree ni, ni'qui luguiedx guin. <sup>13</sup> Bén guie ree ad zajct na reeman lojl guial ni diidxli naj ni rudxiib reeman guican. <sup>14</sup> Per ni naj diidxli naj guial rliladxan Jesucrist, nejzcüb guin naj ni zinaalan, cayünan sirv loj xDios dux béngulalan, abi' na ree bén guie guial ad xnejzt

Diosan, per cayünan zian guial rliladxan gra ni zëed loj ley në ni bacaa ree bën badëed xtiidx Dios loj ree bejn. <sup>15</sup> Abi' zi'cgajc rliladx ree bën guie Dios, ziangajc rliladxan laaman guial yaban ree bengüt stijb, zi'c ree bën goc benza'c në ree bën goc benmal. <sup>16</sup> Zeel rünan naguiejn gabajnan zagdxë chitëë xhie ganaladxan delant loj Dios ni'qui delant loj ree bejn.

<sup>17</sup> 'Ma gojc zien ijz nariin, xt yan baye'c ladxan bidganë'n ni baxhaal ree bejn par ree bënprob, bidganë' tēen gon ni rayal gudëdan loj Dios. <sup>18</sup> Laan naj ni cayünan lën yadooro' Jerusalén chi bi't ree bën Israel za niz Asia baguiaa reeman naj, per mal benan zi'c rniabee ley din gacan naya. Abi' ad zient bejn riga', ad cabë tēetan wadijl. <sup>19</sup> Yan, bën gunaaz ree naj, laa reeman naj bën rayal su guie din na reeman xhie rünan xhie pornin rdxe'ch reeman naj. <sup>20</sup> O balguiza, bën za' ree guie na reeman xhie da dolan badxejl reeman chi guzun loj gra ree guxtis Israel. <sup>21</sup> Tijbzi ni benan chi za'n galay reeman gurixdiajn rën: “Guial rliladxan yaban ree bengüt, zeel za' ree bejn contr naj yan.”

<sup>22</sup> Chi biguiejn gobernador Félix zian, abi' guial ragbeeman xhienaag naj xnejz cüb Jesucrist, dxel basa'nman guialquia guin par stijb dxej, rëbaman loj reeman:

—Chi gui't suldad Lisias, dxel gagbeen zagdxë xhienaag naj xcwentidi.

<sup>23</sup> Dxel gunabee gobernador guin tijb ree suldad rniabee guin din gusnuu guinia reex Pab, per guslaa reex güünman ni rënman ad gudxoon tēë reex chignaj ree xmiwaman laaman.

<sup>24</sup> Chi goc tio'p choon dxej, bidxin gobernador Félix stijb con lacheelaman Drusila, laaman naj bén Israel. Dxel gunabee gobernador guin bidxin Pab, abi' bacaagdiajg reeman ni rëbaman xcwent guialrliladx bejn Jesucrist. <sup>25</sup> Per chi guzuloj cayëbaman guial rayal guiban ree bejn xnejz, gucwëëz tëë xixgab mal reeman, guial guidxin tëë dxej yadëed ree bejn cwent loj Dios, dxel dád bidxeb gobernador guin abi' rëbaman loj Pab:

—Baguiaj. Ganetan lüj chi chu'n luar stijb.

<sup>26</sup> Per Félix në milian rbëzaman gudëed Pab lojman din guslaaman laaman, zeel gurejdxaman laaman zien volt din guinieenëman laaman. <sup>27</sup> Zian gudëd tio'p ijz abi' barii Félix guial gobernador, dxel bayu Porcio Festo xluaraman. Abi' guial guyën Félix naya'nman zagdxe loj ree bén Israel, zeel basa'nman Pab ladxguib.

## 25

### *Gunee Pab loj Festo*

<sup>1</sup> Chi goc choon dxej ni bidxin Festo Cesarea par chu'man guial gobernador, dxel wejman Jerusalén. <sup>2</sup> Yagaj, bixhioz rniabee ree bixhioz con ree bén Israel mazri zojbloj, wej reeman lojman bile'c reeman xguialquia Pab, <sup>3</sup> abi' gunab reeman lojman din guixhiaalaman Pab Jerusalén. Zian guyën reeman din xixgab reeman naj gugüjt reeman Pab runejz. <sup>4</sup> Per badxi' Festo xtiidx reeman rëbaman guial Cesarea nayaaw Pab guiáad laaman nayob yaguaajman ni, <sup>5</sup> abi' rëbaman loj reeman:

—Bén rajp ree guialrniabee lojdi, laa reeman sa Cesarea, abi' bal xhie ni mal been xin guin, ni na reeman xhienin beenx.

<sup>6</sup> Cost xhujn o chiï dxej guzuj Festo Jerusalén, dxelri ziaman Cesarea. Chi bareguiaal, gurej loj xyagxhilaman lod rniabeeman, abi' gunabeeman chica' reex Pab. <sup>7</sup> Chi bidxinnë reex laaman, bén Israel guza ree Jerusalén, gubig reeman abi' zien ree niguijdx badxiib reeman guijcaman, majsi ni'qui tijb ni rëb reeman ad gojct nulüü reeman guial najn ni wali. <sup>8</sup> Dxel badxi' Pab xtiidx reeman, rëbaman:

—Naj, achet ni mal wayünan xley ree bén Israel, ni'qui yadooro' Jerusalén, ni'qui rey César.

<sup>9</sup> Per Festo guyënman naya'nman zagdxe loj ree bén Israel, dxel gunabdiidxaman loj Pab, rëbaman:

—¿Rënl ya chel Jerusalén? Ni yanajn bal rajpil dol o ad rajptil dol ya ni rudxiib reeman guijquil.

<sup>10</sup> Badxi' Paban rëbaman:

—Loj ree guxtis Roman za'n, lod rayal gac reglad xhienin benan. Lüy ragbee zagdxe guial achet ni mal wayünan bén Israel ree. <sup>11</sup> Bal xhie tijb ni mal benan ni rayal guiëtan, ad zabexuutan guiëtan. Per bal id wali ni na reeman benan, achut rajp derejch yayü naj loj reeman. Zagdxeli naj gadëëdan loj rey César.

<sup>12</sup> Dxel chi gulox guneenë Festo bén naj ree xbejnman, bén rëb ree ni rayal gac, rëbaman loj Pab:

—Lüy na tädil loj rey César, yan lojman tädil.

### *Za' Pab loj rey Agripa*

<sup>13</sup> Chi gudëd tio'p choon dxej, rey Agripa con xbéngunaaman Berenice bidxin reeman Cesarea



bitixloj reeman gobernador Festo. <sup>14</sup> Abi' guial zien dxej da't guzuj reeman ni, dxel be Festo diidx loj rey Agripa xcwent Pab, rëbaman:

—Guie yu' tijb xin basa'n Félix ladxguiib. <sup>15</sup> Chi wan Jerusalén, bixhioz rniabee ree bixhioz con ree bén rniabee loj ree bén Israel gule'c reeman xguialquiax, gunab reeman ganabeen guiëtix. <sup>16</sup> Per naj rën loj reeman guial guxtis Rom ree ad najt xcostumbr reeman nabee reeman guiët tijb bejn chi gadaman su loj ree bén cabe'c xguialquiaman din guiëbaman walin ya o ad walitan ni rudxiib reeman guiycaman. <sup>17</sup> Zeel chi bi't ree bén Israel guin guie, achet guial niaglaan, bareguiaal gajc gure loj da yagxhilan, abi' gunabeen bidnë reex xin guin. <sup>18</sup> Per ree bén bi't gule'c xguialquiax, achet ni nadxeb na reeman zi'c gunaladxan ninia reeman por laax. <sup>19</sup> Tijbzi xguialquiax ni gule'c reeman naj por xcostumbr reeman në por tijb bén la Jesús, bén ma güjt, per Pab rëb naban Jesús guin. <sup>20</sup> Abi' guial ad ragbeetan xhie günan por zian, dxel gunabdiidxan loj Pab bal rën xchex Jerusalén din gac reglad ni guin ree ni. <sup>21</sup> Per laax gunab téd loj rey César din gac reglad ni rëb reeman por laax, zeel gunabeen yaawsiix xt chile' yaxhalan laax loj rey César.

<sup>22</sup> Dxel rëb rey Agripa loj Festo:

—Bal zian chile'n, nëgajc naj rën gucagdiag laax.

Abi' badxi' Festo laan rëbaman:

—Guixie gucaagdiajguil laax.

<sup>23</sup> Chi bareguiaal, dád zagdxe ca' xab rey Agripa con Berenice bidxin reeman con ree bén rniabee suldad con los demazri ree bén zojbloj luguiedx

guin, bidxin reeman guyu reeman lēnū lod gucaagdiajg reeman ni guiēb Pab. Dxel gunabee Festo bica' reex Pab. <sup>24</sup> Abi' rēb Festo:

—Rey Agripa nē los demazridi dad za'nēdi dunujn guie. Bén ruguiaadi guie, gra bén Israel, zi'c Jerusalén zi'cgajc guie ma bi't reeman bidganaj reeman naj rniab reeman guiētix. <sup>25</sup> Naj, achet xfaltix radxejlan guial rayal guiētix. Guiáad laax gunab tēd loj César Augusto lod gac reglad xcwentix, abi' ma benan xgab yaxhalan laax. <sup>26</sup> Per ad radxejltan ni gucan por laax loj gui'ch ni gaxhalan loj rey César, bén rniabee naj. Zeel nuzun laax lojdi zi'c naj quijb lojl rey Agripa, din chi ma gulox gunabdiidxidi ni rayal guiniabdiidxidi lojx dxel ma yu' ni gucan por laax. <sup>27</sup> Din naj rulūū ad xnejzt naj yaxhalan tijb bén yu' ladxguiib loj rey César abi' ad zētān xhie beenman.

## 26

### *Ni gunee Pab loj rey Agripa*

<sup>1</sup> Dxel rēb rey Agripa loj Pab:

—Ma zajc guinieel por lūj.

Abi' gules yaa Pab guzuloj rēbaman:

<sup>2</sup> —Dád nix yu' luxdon guial bile' za'n lojl yan rey Agripa, par ganen lojl yadxi' tēen gra ni rudxiib ree bén Israel guican. <sup>3</sup> Din lūj ragbee zagdxe gra xcostumbr ree bén Israel, nē conin rūjn persi rdildiidx reeman. Zeel rniaaban lojl gapil pasens gucaagdiajguil ni ganin.

### *Zi'c guban Pab gocli*

<sup>4</sup> 'Gra ree bén Israel ragbee xhienaag gubajnan con laa reeman zi'c ladxan zi'c Jerusalén, diizd

xindoon. <sup>5</sup> Ragbee tää reeman abi' zajc na reeman laan bal rën reeman, guial diizd xindoon najn bénfarisew, abi' ree bénfarisew naj bén mazri zinal xley ree bén Israel. <sup>6</sup> Abi' yan za'n guie, badëöd reeman naj loj ree guxtis guial rliladxan yasban Dios bengüt ree zi'c beenman promisejs loj ree dux béngulal ree. <sup>7</sup> Gra guidxiptio'p cwa' ree bén Israel cabëz dxej güün Dios zian, zeel rën reeman laaman rüjn tää reeman sirv lojman dxej guiaal. Abi' yan guial rliladxan laan zeel rbe'c ree bén Israel da guialquian, rey Agripa. <sup>8</sup> ¿O naladxidi ya nawëög yasban Dios bengüt ree?

*Be Pab diidx xhienaag guzunalaman bén rliladx ree Jesucrist*

<sup>9</sup> 'Guia'xchej benan xgab rayal günan xhienin bén rliladx ree Jesús, bén Nazaret, <sup>10</sup> abi' zian benan Jerusalén. Con xtiidx ree bixhioz rniabee ree bixhioz, zien ree bén rliladx Jesucrist badxe'n ladxguuib. Abi' chi rugüjt reeman laa reeman, në naj rë guiëtri reeman. <sup>11</sup> Zien volt benan laa reeman xhienin din günan naguiejn gusa'n reeman guialrliladx reeman Jesucrist. Zian benan lën gra ree yadoo, abi' guial tant rdxe'chan laa reeman dxel guzunaalan laa reeman xt luguiedx ren ree.

*Be Pab diidx stijb xhienaag bililadxaman Jesucrist*

*(Hch. 9:1-19; 22:6-16)*

<sup>12</sup> 'Abi' par zian za'n Damasco, con quijb xtiidx ree bixhioz rniabee ree bixhioz. <sup>13</sup> Per ganin lüj rey Agripa, lunejz baguian tijb xbacha' xanyabaa zi'c garol dxej, per mazri naynin guial loj ni rusni gubijdx, abi' basnin guidib lod za'n con ree bén

zinë'n. <sup>14</sup> Abi' dugraczan bareeyuj, dxel bigu-  
 iejn nan cha' bën gunee naj con diidx hebreo, na-  
 man: “Saulo, Saulo, ¿chexc zeel rzunalil naj? Lüj  
 gajc rguuil xguialnaal zi'c go'n rudxegua' loj yag  
 rulaagnë reeman laab.” <sup>15</sup> Dxel rën: “¿Chu lüj  
 Dad?” Badxi'man laan naman: “Naj naj Jesús bën  
 rzunalil. <sup>16</sup> Per bixche, guzuli, din balülön lojl par  
 güünl naj sirv gü tēēl diidx ni baguiaal yan nē ni  
 gulün lojl. <sup>17</sup> Naj gaxhal lüj loj ree bën Israel nē  
 loj ree bën ad najt bën Israel, abi' naj gagnë' lüj  
 chitēē xhie güün reeman lüj. <sup>18</sup> Gaxhalan lüj loj  
 reeman din guixhialil loj reeman gusa'n reeman  
 nejz mal, chinal reeman nejz zagdxē. Ad tiēbri  
 reeman nabee xindxab laa reeman, chinal tēē  
 reeman xnejz Dios. Abi' chililadx reeman naj  
 din gac xtol reeman perdon yayal tēē reeman ni  
 rayal gra ree xbejn Dios, bën ma naya ree delant  
 lojman.”

### *Bazoob Pab diidx ni balüüloj lojman*

<sup>19</sup> Zian gojc, rey Agripa, bazoban diidx benan ni  
 na Jesucrist lon chi guneeman naj diidx xanyabaa.  
<sup>20</sup> Yaloj luguiedx Damasco gutiechan xtiidxaman,  
 dxelri Jerusalén nē guidib niz Judea nē loj ree bën  
 ad najt bën Israel. Rën loj reeman din yayüjn  
 reeman xgab por xtol reeman, yadxi' loj reeman  
 loj Dios güün tēē reeman ni rayal güün reeman  
 din guiguien guial ma bidxaa mod naban reeman.  
<sup>21</sup> Abi' por zian, gunaaaz ree bën Israel naj lēn  
 yadooro' Jerusalén, guyēn reeman nugüjt reeman  
 naj. <sup>22</sup> Per con xyudar Dios laa naj guie xt yan  
 cusnuu cayün xtiidxaman loj gra ree bejn, zi'c ree  
 bën zojbloj zi'c ree bën ad zojblojt. Abi' gra ni rën

loj reeman naj ganax ni bacaa ree b́en badëe xtiidx Dios loj ree bejn nē ni bacaa Moisejs xhienaag naj ni gac, <sup>23</sup> guial Cristo naj guial tédaman guialzi, guiétaman. Per chi ma güjtaman yaløj laaman naj b́en yaban loj ree bengüt, abi' gugojnman b́en Israel ree nē ree b́en ad najt b́en Israel xhienaag gap reeman perdon.

### *Nuyën Pab nililadx Agripa Jesucrist*

<sup>24</sup> Chi cayëb Pab zian, dxel gudidxa' Festo rëbaman:

—¡Rajcguijquil Pab! guial tant rusiidil ma rajc guiijquil.

<sup>25</sup> Per badxi' Pab laan rëbaman:

—Ad guictan rajc, gobernador Festo. Ni canin najn xnejz nē diidxli. <sup>26</sup> Laa rey Agripa za' guie, laaman ragbee ni canin, zeel sin guialrdxeb canen delant lojman. Naj ragbeechaaw guial laaman ragbee gra ni canin, din ad canitan ni goc ralan lod achut zajc gagbee laan. <sup>27</sup> ¿Rliladxil ni rëb ree b́en badëed xtiidx Dios loj ree bejn ya, rey Agripa? Naj ragbee guial rliladxil.

<sup>28</sup> Dxel badxi' rey Agripa laan rëbaman:

—Sta'nczi nüjnl naj gan nililadxan Jesús.

<sup>29</sup> Abi' rëb Pab:

—Majsi sta'nz o majsi ryaadxri, na Dios guial ad tijbtzi lüj, nē gra ree b́en cucaagdiajg ni canin yan, guidxin dxej chililadxidi Jesús zi'c naj, majsi ad nēt ree caden guie.

<sup>30</sup> Dxel bisu rey Agripa con gobernador Festo con Berenice nē gra ree b́en zojbnē laa reeman ni.

<sup>31</sup> Chi bariica reeman tiblax guzuløj cayünē lasa' reeman diidx, rëb reeman:

—Achet wayüjn xin guie ni rayal guiëtix, o chu'x ladxguiib.

<sup>32</sup> Dxel rëb rey Agripa loj Festo:

—Zile' naslaa reex, balidix niniab tédix loj rey César.

## 27

### *Baxhaal reeman Pab Rom*

<sup>1</sup> Chi rëb reeman ma yaxhaal reeman dunujn Italia, dxel bayü reeman Pab con sta'n ree bén yu' ladxguiib loj tijb suldad rniabee la Julio, laax rniabee tib cwaa ree suldad la Augusto. <sup>2</sup> Abi' Cesearea badxu'n loj tijb xbarcw ree bén Adramitio, barcw ni ma grii chen guiedx riga' ree niz Asia. Në Aristarco bunë'n, bén Tesalónica, guiedx riga' niz Macedonia. <sup>3</sup> Chi bareguiaal, badxinan Sidón, lod goc Julio xinza'c da't con Pab, cwëjbix bitixloj ree xmiw Pab luguiedx guin abi' badëed reeman ni ryaadxaman. <sup>4</sup> Chi badxoon Sidón badiaawan Chipre yuj riga' loj nijsdoo, basa'nanan dux ladruvejsan chitëë yachaaglojn zro' bi, din niz du lojn rliaj bi guin. <sup>5</sup> Badüüdan loj nijsdoo gajxh Cilicia në Panfilia abi' badxinan Mira, tijb guiedx nulen Licia.

<sup>6</sup> Ni bidxaagloj suldad rniabee guin tijb barcw Alejandría ni che Italia, zianz nax yadxu'n lojn.

<sup>7</sup> Loj zien dxej bio'n chaawladx, con guidib tarbajw badxinan niz lod la Gnido. Abi' guial sta rliaj bi niz du lojn, dxel zagdxeli badüüdan niz Salmón, badiaawan lod la Creta yuj riga' loj nijsdoo. <sup>8</sup> Gadëd ro' yuj guin zio'n loj nijsdoo, per con guidib tarbajw, xt badxinan tijb luar la Buenos Puertos, gajxh niz lod naj guiedx la Lasea.

<sup>9</sup> Abi' zi'ct ma bayaglaan, ma naj nadxeb yasnuu yo'n loj nijsdoo, din ma zidyob tiamp nayaag. Zeel gunee Pab, <sup>10</sup> rëbaman loj reeman:

—Dad, ad zagdxet yo' ree bal yasnuu yo' ree, din nadxeb guize'n barcw guin abi' guire'ch gra ni yu' lojn loj nijs guin, xt në dunuj ree nadxeb yayëjt ree.

<sup>11</sup> Per suldad rniabee guin mazri beencwentix bën rusa barcw guin në bën naj xbarcw laan, guial loj ni rëb Pab. <sup>12</sup> Abi' guial ad zagdxet tëët naj yagaj par yadüüdan tiamp nayaag, dxel mazri zien reeman been xgab zagdxeli naj yariin yagaj, yaguieenan nagueijn yadxinan Fenice, tijb guiedx nulen Creta lod ad rbi' tëët bi, ni yadüüdan tiamp nayaag.

### *Gubi' tijb bidoxh loj nijsdoo*

<sup>13</sup> Dxel guzuloj cabi' tijb bi chaawladx ni zëäd lad sur, abi' gunaladx reeman ma bile' zi'c naj xixgab reeman, zeel bariin bio'n loj nijsdoo gadëd ro' yuj Creta. <sup>14</sup> Per ad wayajct xchej zio'n chi birii tijb bidoxh la Euroclidón loj nijs guin. <sup>15</sup> Abi' guzuloj bi guin culadxaan barcw guin. Në guial niz du lojn zëäd bi guin dxel ad gojctri nusnuu barcw guin niejn niz lod rayal niejn, abi' baslaa reeman binë barcw guin dunujn niz lod cucadxaa bi guin laan. <sup>16</sup> Dxel badüüdan xijch tijb yujdobëz la Clauda riga'n loj nijs, lod ad rbi'tri bidoxh guin, abi' canu naxii xan barcw guin con guidib tarbajw balë'panan loj barcw guin. <sup>17</sup> Dxel chi gulox balë'pan canu guin loj barcw guin, batiejl reeman duu lad barcw guin chitëë yaze'nan. Abi' guial rdxeb reeman chëëztiej barcw guin lën üx la Sirte, dxel gulet reeman xlon ree barcw guin

din cwentzi chinë barcw guin dunujn niz lod rucadxaa bi guin laan. <sup>18</sup> Chi bareguiaal, zian-gajc rbi' bidoxh loj nijs guin, zianz guzuloj cuzaal reeman ni nüü barcw guin loj nijs guin. <sup>19</sup> Ni bayon dxej, cwa' reeman gra ree ni rüjnnë barcw guin dxiin bazaal reeman loj nijs guin. <sup>20</sup> Zien dxej ad biguient gubijdx ni'qui ree bajl xanyabaa por bidoxh gubi' loj nijs guin, dxel dunujn ad nagueientri du luxdoon yalaan loj nijs guin.

<sup>21</sup> Abi' guial ma gojc zien dxej ni achetdzi wadaawan, dxel guzuli Pab galay reeman, rëbaman:

—Dad, zagdxeli nucaagdiajguidi da diidxan ad nariit ree Creta, zian ad nadüüdt ree tarbajw guie achet tëet nasëëb ree. <sup>22</sup> Per achet güünan, ad rdxebidi din ni'qui tijbidi ad zëjtt, tijbzi barcw guin yaze'n. <sup>23</sup> Din Dios rniabee naj, bën cayünan sirv guxhaal tijb xi anjlaman balüüloj lon yan guiaal. <sup>24</sup> Abi' na anjl guin lon: “Pab, ad rdxebil, din rayal sul loj rey César, abi' por lüj ni'qui tijb ree bën zëëd loj barcw guie ad zuslaat Dios guiët reeman.” <sup>25</sup> Zeel yan dad, gol badxe' luxdoodi zagdxe, din naj rliladxan Dios, ragbee tëën zagdxe guial gac zi'c na anjl guin lon. <sup>26</sup> Per gag barcw guie niz ro' tijb yuj riga' loj nijsdoo.

<sup>27</sup> Chi goc chiin gubijdx ni zio'n loj nijs guin, guxhinzii badxinan niz loj nijsdoo la Adriatico, niz ni niz guie zë barcw guin loj nijs guin por bi guin. Abi' ree bën nulen barcw guin, guxhinzii zi'ct garol guiaal gogbee reeman guial zamer yadxinan loj yuj. <sup>28</sup> Dxel bare'xh reeman plact naxhit nijs guin, najn zi'ctiubitib mejtr naxhit. Mazri delant bare'xh reeman laan zatijb ma najn gajlbiadx



mejtr naxhit. <sup>29</sup> Abi' bidxeb reeman laro' barcw guin guiaj ree, dxel niz xijch barcw guin bazaal reeman tajp ganch guiib loj nijs guin din chile' sudxe barcw guin, abi' ma rën nejzdoo reeman yareguiaal. <sup>30</sup> Bén nulen ree barcw guin, been reeman bén sta cuzaal ree ganch guiib guin loj nijs guin niz loj barcw guin, naabzi par calet reeman canu chu' reeman par guxüün reeman. <sup>31</sup> Per bagojn Pab suldad rniabee con ree xsuldadix, rëbaman loj reex:

—Bal id ree bén guin yaya'n loj barcw guie, ad zalaatridi.

<sup>32</sup> Dxel batüüg ree suldad guin ni naxii canu guin persi zinë nijs canu guin. <sup>33</sup> Chi ma cayni luyuj, rëb Pab loj reeman din gaw reeman, rëbaman loj reeman:

—Ma gojc chiin gubijdx ni ad raayëjstidi achet tëet wayawidi. <sup>34</sup> Naj rni lëjt, gol gudaw din guibandi, din gradi ni'qui tijb guidxguijquidi ad zusëëbtidi.

<sup>35</sup> Chi rëb Pab zian, cwa'man tijb guiadxtil, abi' badëëman quixtëë loj Dios niz loj gra reeman, dxel gula'man guiadxtil guin guzuloj cayawaman.

<sup>36</sup> Dxel bayu luxdoo gra reeman, guzuloj nëgajc laa reeman cayaw. <sup>37</sup> Tio'pgayuu gayojnchiibixho'p nayajc dugran zio'pan loj barcw guin. <sup>38</sup> Chi gulox gudaw reeman xt bixienladx reeman, dxel bazaal reeman trigo loj nijs guin persi bacha barcw guin.

### *Bize'n barcw loj nijsdoo*

<sup>39</sup> Chi bareguiaal, bén nulen ree barcw guin, ad bayünbeet reeman yuj badxin reeman. Per baguiaa reeman tibda'n nijsdoo guin riga' üx

gadëed ro'n, abi' been reeman xgab badxig reeman barcw guin yagaj. <sup>40</sup> Dxel batüüg reeman ni naxiinë ree ganch guib guin ni rüjn yudar par sudxe barcw guin loj nijs, basa'n reeman ganch guin ree loj nijs guin, abi' baxhiee reeman yag ni rüjn yudar par sa barcw guin din suloj san. Dxel gules reeman lon ni naj niz lucwaj barcw guin din guiniaazan bi, zianz guzuloj cayriica barcw guin niz ro' nijs guin. <sup>41</sup> Per wëéztiejn loj üx zien lod bigagan. Niz guijcan wëéz lën üx abi' ni'quid rniibtan, guiáad niz xan guin guzuloj cayze'nan con gojl rliaj nijs guin ladan. <sup>42</sup> Dxel nuyën ree suldad guin nugüjt reex bën prejs guin ree, chitëe nixoobnijs reeman abi' nuxüün reeman. <sup>43</sup> Per suldad rniabee guin ad cwëjbtix niajc zian guial ad rëntix niëjt Pab, dxel gunabeex guial bën rajc rxoobnijs ree, yaløj laa reeman chu' loj nijs guin güün reeman nagueijn yarii reeman ro' nijs guin. <sup>44</sup> Dxelri ma guidnal gra reeman loj ree tabl o loj ree yag ni baze'n barcw guin. Zian balaan, dugran badxin ro' nijs guin.

## 28

### *Bidxin Pab Malta*

<sup>1</sup> Chi gulox barii dugran lon nijs guin, dxel bayagbeen yuj lod badxinan lan Malta riga'n galay nijs. <sup>2</sup> Bën naj ree bën ni, dád benza'c gojc reeman con dunujn. Been reeman tijb bajl guial nayaag nëtëe guial cayal guia, abi' na reeman du lojn din yubiigan cwë' bajl guin. <sup>3</sup> Dxel bato'p Pab ta'n yagbidx, zianz chi cudxe'man laan loj bajl guin briyaal tijb bëel lën yag guin por xi xliaa bajl

guin, abi' gudawya'b yaa Pab nalbëztib yaaman. <sup>4</sup> Chi baguiaa ree bën Malta guin nalbëz bëël guin yaa Pab, dxel rëb loj lasa' reeman:

—Xin guie bejn bagüjtix, zeel majsi gulaax loj nijsdoo, per guiëtczix por ni beenx.

<sup>5</sup> Per gudxijp yaa Pab abi' biajb bëël guin loj bajl guin, guiáad laaman achet gocaman. <sup>6</sup> Gra reeman cabëz saaguij yaaman, o dxejlczi yabaman guiëteman. Per chi gojc xchej, chi baguiaa reeman achet gocaman, bachaa xixgab reeman abi' guzuloj rëb reeman guial tijb dios najman.

<sup>7</sup> Gajxh lod badxu'n naga' ree xguidxliuj tijb bën zojbloj loj yuj riga' loj nijs guin, laman Publio. Naman du lojn yo'n lidxaman, ni badxu'n choon dxej, dád benza'c tée gojcaman con dunujn. <sup>8</sup> Nadxel naga' xdadaman, ragxuuman, yu'man xliaa rajc tēeman yoobrejn. Abi' guyu Pab lod naga'man, zianz chi gulox gurejdx gunabaman Dios por laaman, dxel guxhoob yaaman guijcaman abi' bayajcaman. <sup>9</sup> Chi gogbee ree bënragxuu zojb ni ni goc, bi't reeman lod za' Pab persi bayüjnman laa reeman. <sup>10</sup> Dxel dád zien ni bazaladx reeman du lojn por zian. Abi' chi badxu'n loj barcw par yadxoon yagaj, banee reeman gra ni rayaadxan lunejz.

### *Bidxin Pab Rom*

<sup>11</sup> Choon bëëw badxu'n loj yuj zii, dxelri badxu'n loj tijb barcw Alejandría, ni bitéd ni tiamp nayaag. Niz lucwaj barcw guin ca tio'p ree dxan bën la ree Cástor në Pólux. <sup>12</sup> Dxel badxinan tijb guiedx la Siracusa, yagaj badxu'n choon dxej. <sup>13</sup> Abi' yagaj badxoon bio'n gadéd ro' nijsdoo xt badxinan

guiedx la Regio. Chi bareguiaal, chi badxoon yagaj, briei tijb bi lad sur dxel ni barojp dxej badxinan luguiedx la Puteoli. <sup>14</sup> Yagaj badxaagan tio'p choon ree bèn naj ree bèn ni në reeman rliladx Jesucrist, dxel na reeman du lojn yaya'nnë'n laa reeman abi' baya'nnë'n laa reeman toxman. Zian gojc, dxelri zio'n Rom. <sup>15</sup> Guiáad ree dux compniaran bèn rliladx ree Jesucrist, bèn zojb ree Rom, ma ragbee reeman guial yadxinan yagaj. Dxel briei reeman bidgachaagloj reeman dunujn xt lod la Foro de Apio në luguiedx la Tres Tabernas. Chi baguiaa Pab laa reeman, babaaman abi' badëëman quixtëë loj Dios. <sup>16</sup> Chi badxinan Rom, dxel bayü suldad rniabee guin bèn prejs guin ree loj tijb ree suldad rniabee ni. Per cwëjb reeman gurej Pab stijb yu ren lod gojp tijb suldad laaman.

### *Gunee Pab xtiidx Jesucrist Rom*

<sup>17</sup> Chi goc choon dxej badxinan Rom, gurejdx Pab bèn Israel zojbloj ree ni. Chi badxajg lasa' reeman, dxel rëbaman loj reeman:

—Compniar Israel, achet wayünan contr ree bèn Israel ni'qui contr xcostumbr ree dux béngulal ree. Guiáad laa reeman gunaaz reeman naj Jerusalén, bayü reeman naj loj ree guxtis Rom. <sup>18</sup> Abi' ree bèn Rom guin chi gulox badëdan cwent loj reeman, dxel nuyën reeman nuslaa reeman naj, guial gogbee reeman achet benan par guiëtan. <sup>19</sup> Per ree bèn Israel guin badxoon reeman abi' zagdxeli gunaaban gadëëdan loj rey César, per ad guial ra'ptan xhienin contr ree bèn Israel. <sup>20</sup> Zeel guredxan lëjt, din guidganajdi naj din ganin lojdi guial por ni rliladxan guial yaban ree bengüt zi'cgajc rliladx

gra ree du lasa' b́en Israel ree, zeel naxiin con ree caden guie.

<sup>21</sup> Dxel rēb reeman lojman:

—Dunujn ni'qui tijb xtiidx ree b́en Judea ad waca'tan lod na reeman xcwentil, nē ni'qui tijb b́en duladx ree b́en raza ree Judea achet wana reeman du lojn contr lūj. <sup>22</sup> Per rayēnan yaguiejnan xhienaag naj xixgabil, din dunujn rayagbee guial gra ladczi rniee reeman contr religion cūb guin.

<sup>23</sup> Dxel bazuj reeman tijb dxej ni yadxajg lasa' reeman. Chi bidxin dxej guin, dád zien bejn bido'p lod zojb Pab. Abi' diizd rsil xt wadxeguneenēman laa reeman xhienaag naj xguialrniabee Dios. Beenman naguiejn chililadx reeman Jesús, baza't tēēman lod rniee xcwent Jesús loj xlibr ley Moisejs nē ni bacaa ree b́en badēē xtiidx Dios loj ree bejn. <sup>24</sup> Yu' reeman bililadx ni rēb Pab, per yu' reeman ad bililadxt. <sup>25</sup> Abi' guial ad rdxaagt gü reeman diidx, guzuloj bare'ch reeman. Dxel rēb Pab loj reeman:

—Waliqui ni rēb Isaías b́en badēēd xtiidx Dios loj ree dux b́engulal ree guial rēb xSprijt Dios:

<sup>26</sup> Wej, güjdx loj ree b́en guin:

Majsi rigujen reeman, per achetczi chignia' reeman,  
abi' majsi ruguiaa reeman, per rulüü ad ruguiaat reeman.

<sup>27</sup> Din been luxdoo reeman gojl,  
abi' rüjn reeman zi'c rulüü ad ruguiaat reeman,  
ad rigujen tēēt reeman, chitēē guguiaa reeman,  
abi' guien reeman chignia' tēē reeman.  
Din ad rēnt reeman gui't reeman con naj,  
abi' günan laa reeman perdon.

<sup>28</sup> Zeel gol gogbee guial diizd yan, loj ree b́en ad najt b́en Israel guire'ch diidx xhienaag gap reeman xperdon Dios, abi' laa reeman zaliladx reeman diidx guin ree.

<sup>29</sup> Chi gulox ŕeb Pab zian, dxel zia ree b́en Israel guin, cadildiidxńe lasa' reeman.

<sup>30</sup> Tio'p ijz gurej Pab ni, yu lod gudixaman. Ni rnieńeman gra ree b́en rtixloj laaman. <sup>31</sup> Sin guialrdxeb ŕebaman loj reeman xhienaag naj xguialrniabee Dios, abi' guneeman xtiidx Dad Jesucrist loj reeman sin guial chu nudxoon.

**Xtiidx Dios**  
**New Testament in Zapotec, Santo Domingo Albarradas**  
**(MX:zas:Zapotec, Santo Domingo Albarradas)**

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

**Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Santo Domingo Albarradas

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files  
dated 29 Jan 2022

fb4ebcb8-e1f4-5bfc-b08c-f590e137d86d